

# KHRISTIAN THUGIN ZILNA



*Publication Board*  
**ZOU PRESBYTERIAN CHURCH SYNOD**



# KHRISTIAN THUGIN ZILNA



*Publication Board*  
ZOU PRESBYTERIAN CHRUCH SYNOD

# Kristian Thugin Zilna

© *copy right reserved*

1st Edition – 2004

No. Copies: 500

2nd Edition-2019

No of Copies: 1500

Published by:

The Zou Presbyterian Church Synod, PCI



## THUMAPUI

Amasapen in, kum 2019-tan a Hattuumte hing mapui a, Tahsa leh Hagau a hing vangbuohtu i Pasian tung ah lungdam thu i gen masa uhi.

Zou Presbyterian Church Synod khawmpi (Session)- 018, R/ No. 38-in, a puosah bang a, kum 2020- chieng a, Piching Sunday Sekul zillai ding a, “Khristian Thugin Bu” hiding a, i lemsah ban uah, a laibu bawlding a, Session-in, mawpuohna ang pieh bang a zawthei a, ang umtah ziehin hingma puitu i biech Pasian min ka phat sawnsawn hi.

Tualeh, tami laibu toh kibang sim ‘Thugin Zilna’ bu A 48-veina, Manipur Gam Presbytery Khawmpi, 2003, R/No. 23-in apuasah bangin, kum 2004-in zong, ‘Senior Pawl’ zil dingin, Thugin Zilna Bu zong kana bawlta hi. Tuami laibu khu tuni dawngin a kizangtou lai hi. Ahin, tami Laibu sung ah, adiehin, ‘Hun Nukhie’ lam a siltung dingte a i sui deu uhi. A zieh ahileh, hun nukhie a um i hitah ban uah, zilsahna leh ngaidan tuomtuom a tamtah ziehin, eima thugin ma thei a dindet chin ten angaita hi.

Tami, laibu bawlta a hing kithuopi Office Staff-te leh lawm-le-paite tung ah zong lungdam thu ka gen hi. Mangpa’n tam laibu guoljawl in, Hattuumte’n gindan tuomtuom lah a kipat a Thudih, Thuman i theiua i zuitheina diing un hing guoljawlta hen.

*Rev. Dr. Hangpi Manlun*





**The Presbyterian Church of India**  
**ZOU PRESBYTERIAN CHURCH SYNOD**

*Regn. No. 198 of 2005 Under the Manipur Societies Registration Act, 1989 (Act. No. 1 of 1990)*

Zomi Colony, Churachandpur, Manipur, India. Post Box-48, PIN-795128

Website: [www.zousynod.org](http://www.zousynod.org) | Contact: (03874)235105 | [zpcs@rediffmail.com](mailto:zpcs@rediffmail.com)/[zousynod04@gmail.com](mailto:zousynod04@gmail.com)/[info@zousynod.org](mailto:info@zousynod.org)

## FORWORDING

15<sup>th</sup> Zou Presbyterian Church Synod Session Resolution No. 38 phasahpina toh kum 2020 a Piching Sunday School subject ding **Khristian Thuginpi** zil ding a phasah ahia, **a Hilchien bu** bawl ding in Rev. Dr. Hangpi Manlun Zou guot ahi bang in a hing zaw tah zieh in a tung ah lungdam thu i puong uhi.

Tu kum 2020 Nipi Sang zillai ding Khristian Thuginpi khu Gingtute a ding a poimaw mama ahi ziehin koipou in pawnthaw tah a zil leh theisiem sawm chiet ding in i kingen uhi. Tam Khristian Thuginpi Zilna Laibu Mangpa Pasian in guolzawl in simtu zousie leh a zil dingte tung ah Ama nua zui siemna leh Hagau lam pichinna hing pe chiet taken.

Tam Laibu khu Hattuum Mi Siengthoute a ding a Pasian thu poimawtah ahizieh in Mangpa nna gin-umtah a sem thei ding in Mangpa'n hing umpi taken.

Mangpan simtute zousie guolawlina hing pe taken.

(REV. KHAMCHINKHAI)

Executive Secretary  
i/c Sunday School



## KUM KHAT SUNG KIZAH DING DAN

| <i>Hamin</i> | <i>Ni</i> | <i>Bung</i>                             | <i>Thupi</i>                 | <i>Laimai</i> |
|--------------|-----------|-----------------------------------------|------------------------------|---------------|
| January      | 12        | <b>ZPYF REVIVAL/LEADERSHIP TRAINING</b> |                              |               |
|              | 19        | 01                                      | Khristian thugin genna       | 001           |
|              | 26        | 02                                      | Thugin kisiemkhiet dan       | 006           |
| February     | 02        | 03                                      | Bible                        | 011           |
|              | 09        | <b>MISSION KHAWMPI</b>                  |                              |               |
|              | 16        | 04                                      | Bible kigel masahna hamkamte | 017           |
|              | 23        | 05                                      | Bible leh Aprocrypha         | 022           |
| March        | 01        | 06                                      | Pasian leh a minte           | 027           |
|              | 08        | 07                                      | Pasian a mi thumte           | 032           |
|              | 15        | <b>ZPWF KHAWMPI</b>                     |                              |               |
|              | 22        | 08                                      | Mihing mizie leh hinate      | 037           |
|              | 29        | 09                                      | Mihingte khelna a pua thu    | 043           |
| April        | 05        | <b>PALM SUNDAY</b>                      |                              |               |
|              | 12        | <b>ESTER SUNDAY</b>                     |                              |               |
|              | 19        | 10                                      | Jesu Khrist mizie leh hinate | 048           |
|              | 26        | 11                                      | Jesun tatna nna a sepna      | 053           |
| May          | 03        | 12                                      | Hundamna thu                 | 058           |
|              | 10        | 13                                      | Hagau Siengthou              | 062           |
|              | 17        | 14                                      | Hagau Siengthou nasep dan    | 066           |
|              | 24        | <b>KUMKIM NIPI SANG ETKHIETNA</b>       |                              |               |
|              | 31        | <b>PENTECOST</b>                        |                              |               |
| June         | 07        | 15                                      | Hattuum leh Nicea thugin     | 070           |
|              | 14        | 16                                      | Hattuum hinna kamteng        | 075           |
|              | 21        | 17                                      | Presbyterian Hattuum         | 080           |
|              | 28        | 18                                      | Presbyterian Church of India | 086           |

|           |    |                                    |                                      |     |
|-----------|----|------------------------------------|--------------------------------------|-----|
| July      | 05 | 19                                 | Hattuom zilsahna                     | 092 |
|           | 12 | 20                                 | Sacrament-te                         | 097 |
|           | 19 | 21                                 | Baptisma                             | 104 |
|           | 26 | <b>HAITHA LOPNA</b>                |                                      |     |
| August    | 02 | 22                                 | Mangpa nitah ann toh kisai           | 110 |
|           | 09 | 23                                 | Gingtute bawl dingte                 | 116 |
|           | 16 | 24                                 | Rapture, Tribulation & Second Coming | 120 |
|           | 23 | 25                                 | Thawkiana & kum sang vaihawmna       | 025 |
|           | 30 | <b>KHAINGLAI NI (PYF DAY)</b>      |                                      |     |
| September | 06 | 26                                 | Nambat 666                           | 130 |
|           | 13 | 27                                 | Nambat 666 leh Aadhaar Card          | 136 |
|           | 20 | 28                                 | Gawtmun                              | 140 |
|           | 27 | <b>SEPGUOL KISUHTUO</b>            |                                      |     |
| October   | 04 | <b>DISTRICT PYF</b>                |                                      |     |
|           | 11 | <b>KUMTAWP NIPI SANG ETKHIETNA</b> |                                      |     |
|           | 18 | <b>DISTRICT PWF</b>                |                                      |     |
|           | 25 | <b>DISTRICT KHAWMPI</b>            |                                      |     |
| November  | 01 | <b>PRESBYTERY KHAWMPI</b>          |                                      |     |
|           | 08 |                                    |                                      |     |
|           | 15 |                                    |                                      |     |
|           | 22 |                                    |                                      |     |
|           | 29 |                                    |                                      |     |
| December  | 06 | <b>SYNOD SESSION</b>               |                                      |     |
|           | 13 |                                    |                                      |     |
|           | 20 |                                    |                                      |     |
|           | 27 |                                    |                                      |     |

## Bung - I

# KHRISTIAN THUGIN GENNA KAMTENGTE, BIBLE, HATTUOM LEH THUGIN KIZOPDANTE

### *Thuchiin:*

*Hinanleh nangpen in Thugin dihtah toh kituoh thute genin,”  
(Tita 2:1)*

### **1). Thugin umzie:**

‘Thugin’ chi khu gendan tuomtuom aum thei a, ahivang in ataangpi in isui diing uhi. Thugin chi khu Latin ham in ‘credo’ chi a kipat a lah ahia, tuakhu ahileh thuhilna amaw zilsahna (teaching) china ahi. Ahin umzie ahileh ‘Ka gingta’ (I believe) china ahi. Tualeh, Sapham in ‘doctrine’ amaw ‘creed’ akichi hi. Greek ham in ‘dogma or ‘pisteuein’ achi uhi. Tualeh, thugin khu thudih leh hoi, sahkhuo leh hinkhuo puihuoina diing a mi’n thudih ahi chi-a, apomdet uh khu ahi. Jack Rogers in “Thugin khu zilsahna toh kizawh khawm ahia, Khristiante a dingin pen Pasion thu in ang zilsahte khu ahi” achi hi.

Tualeh, sakho zousie’n thugin anei chiet ua, ei Khristiante thugin alamdand tuomna khu mihing pilna in a bawl khiet ahi sih a, leitung a Mangpa Jesu Khrist tungtawn a Pasion kipuonna (God’s self disclosure)-a pat a hing piengkhe ahi. Pasion leh ahundamna puonna khu Khrist ah bukimtah in ang kilangta hi. Tuakhu, Bible (Pasion thu)-ah imu uhi. Tuaziehin, thugin kingahna pen (source of authority)- khu Bible ahi.

Atomkimin, Thugin genna kammal tuomtuomte lah ah apoimaw diehte ahi uh leh Doctrine- khu ‘Kizilsahna’ china ahi. Khristiante kizilshana leh gindan pumpi genna diing a zah ahi. Tualeh, Dogma- khu ‘Eima lama hina ang nei zieh a igintat/ ahinahi chia ipom’ uh china ahi. Tuabanah, Creed- khu Thuchiin chinate ahi uhi.

## **2). Thugin hing pienkhieh dan.**

Hattuum ang din chillai a kipatin, athupawm ding leh akingahna dingin ‘Thu’ anei ngal uhi. Tua athu kingahna uh khu ‘Thugin’ ahi. Hattuum dinchil lai a, athugin masa pen uh ahileh, “Jesu khu Mangpen” ahi chi ahi. Hun hing pei tou zelzelin, hattuumten zilsahna chituomtuom a nei chietua, tuaziehin, hattuumte akingahna ding u’leh azui dingun thugin tuomtuomte ang piengkhe hi. Azieh ahileh, hattuumten kingahna ding leh zuiding apoimaw uhi.

## **3). Thugin puonkhiehna (Confession).**

Hattuum chin teng in, i Thugin ding un i pawm u’leh zui ding ineichiet uhi. Tuabang ma in, eima hattuum peidan leh Pasian thu ipawmdan u’toh kituoh a gelkhieh/siemkhieh khu “Thugin puonkhieh” (confession of faith) akichi hi. Gam tuomtuom leh hattuum chin tengin zong amauh tenna leh hindan toh kituohin, Thugin puonkhieh anei chiet uhi. Etsahna’n ei Presbyterian Church of India (PCI)- in thugin puonkhieh sawm (Ten Articles of Faith)- i neite uh bang in, hattuum pawl tuomtuomten zong amau hattuum ah thugin tuomtuom aneite uh genna ahi deu pen hi.

## **4). Khristian Thugin poimawnate:**

Awle, tuin ei Khristiante a ding a thugin poimawnate isui ding uhi.

4.i). Thugin dih leh hoi nei ban ah thei khu tahsa-le-hagau a ding a khanletna ahi. Azieh ahileh, Bible thu dih theisiemna lampi ah gingtute apui hi. Thugin khu theichien a, hinpi diing a zil ding ahi.

4.ii). Tuabang ahichiengin, thugin ziltu/theitu hinkhuo khu hattuum leh Pasion dei bangin ang khanglien in zahthei ang hiding uhi.

4.iii). Pasion thu (Theology)-dihtah thei dingin gingtute apui/panpi hi. Tuabanah, hattuumte zong akipum khat sah hi. Tua leh thugin dihin zilsahna dihlou leh silbawl (practice) dihlou lah ah hattuumte avengbit hi.

4.iv). Thugin in gingtute leitung sil leh hattuum silte khentel theina aneisah hi. Tuabanah, thugin in zilsahna dih leh zilsahna dihlou theisiem dingin gingtute apanpi hi. Tualeh, hattuum a luttha dinge kung ah hattuum dinna zieh zong atheisah hi.

## **5). Bible, Hattuum leh Thugin kizopdan.**

Bible, Hattuum leh Thuginte khu akikhentheilou votlou khau zangthum a kihuol khawm bang ahi uhi. Hattuumte khu thugin siemtu leh zuitute ahi uhi. Tualeh, thugin in hattuum mite kalsuon ding dan ahil a, a langkhat lamah hattuumte khu thugin kemtute zong ahi uhi.

Gingtute hagau hinkhuo khu Pasion a kipat a imu uleh itanchiet uh ahi. Thuginte khu Bible tungtawn a, adihthei pen ding a kisiem ahi. Tuabanah, Bible, hattuum leh Hagau hinkhuo khu akizawm chiet ua, tuakhu, thugin kingahna bulpi zong ahi uhi. Tuaziehin, thugin in Bible zilsahna leh mimalte hagau hinkhuo khu angaisah zing hi.

Tuabanah, gingtute hinkhuo supichingtu leh khangsahtute khu Bible, Thugin leh Hattuumte ahi uhi. Tami thumte khu Pasion kipuonna ahi ua, khat uong gen/tawisang adang khat ngai nep

tuomthei zong ahisih uhi. Ahin, hattuum leh thuginte maimai ngaisang a mani hagau hinkhuo ding ngaisahlou a um adih tuom dieh sih hi. Tuabang ma in, Bible leh hagau hinkhuote maimai ngaisah a, hattuum ngaisah kia lou khu zong adih tuom dieh sih hi. Tuaziehin, gingu hinkhuo ah Bible zilsahnate, Hattuum leh akivaihawmnate leh Thuginte khu akizop sieng uhi.

#### **6). Thugin hoi khu Hagau hinkhuo a diing in ann hoitah ahi.**

Thugin hoitah nei a zui khu hagau lam-le-tahsa lam a ding in khanna diing a haguam ann hoitah ahi hi. Tualeh, thugin (doctrine) theina in ginna ah ang khangliensah diing a, tuaban ah Hagau hinkhuo ah hausatna zong ang pe diing hi. Hattuum khen khat ngelin nichin hun chin in Pasian gam nnasep ding leh Khristian hinkhuo pichinna ding a kizilsah sangin, amauh thuginte maimai kihilin atangkoupi ua, alien aneu-in alungtang uah athugin uh hoidan leh midangte a, ahoilou dan chii atuzing uhi. Tuaziehin, eima thugin hoi tah a theina in gindan tuomtuomte a kipatin ang vengbit ding hi.

#### **7). Thukhum sin.**

Eite'n i doctrine-te ukhu thei kisawmlouin, ikim ipam ua midangte tawndan leh hinate bang ingaisang zaw uh abangta hi. I doctrine leh ikipui huoidante uh ingaisahlou laisie uh tahsa-le-hagau ah igensa bangun ikhang tahtah sih ding uhi. Tuabanah, gingu piching leh Hattuum piching zong ikichithei sih ding hi.

Azieh ahileh, thugin hing kipat dantah khu Pasian leh gingu kikal a kilemna ahi. Pasian in, gingu khu ahoupai a, gingu in Pasian khu adawng hi. Tuaziehin, thugin dih zuina in Pasian toh ikal ang siem hoi banah, gingu-le-gingu kikal leh leitung toh ikal tanpha ah zong angpui hoi hi. Bangteng hinanleh, iBible ukhu ikiteena uleh izui diing pen uh hileh buoinate leh peikhielna bei in ipeidih thei diing uhi.

**Dohnate:**

- 1). Thugin umzie bang e?
- 2). Thugin kingahna bulpi khu bang e?
- 3). Thugin puonkhiehna (Confession) umzie bang e?
- 4). Khristian Thugin poimawnate bangbange e?
- 5). Bible, Hattuum leh Thugin kizopdan tomkim in gen in?
- 6). Thugin hoi khu Hagau lam hinkhuo a diing in apoimawna gen in?

~~~~~

## Bung- 2

# HATTUOM DINCHILLAI A KHAWMPITE A THUGIN TUOMTUOMTE ANA SIEMKHIEH DAN UH

### *Thuchiin ding:*

*“I Mangpa leh hundampa Jesu Khrist lungsietna leh pilna sung ah khanglien zel zaw uh. Ama kung ah loupina tu leh tangtawn dong in umzelta hen, Amen” (II Peter 3:18).*

### **1). Thumapui:**

I gensa bangun, Thuginte khu ang pawng um mai ahisih ua, masanglai a gingtute in amauh hinkhuo a Pasian thu amudan u'toh kituoh leh Laisiengthou tungtawn a ang bawlkhieuh uhi. Tualeh, ahun leh amun dungzui in, khawmpi tuomtuomte tungtawn a Thugin hing kisiemte isui ding uhi. Tuate:

### **2.i). Jerusalem Khawmpi.**

Pentekost nua-in, Jentail-ten Jesu Khrist ang gingta un ang pomta uhi. Khrsitianten, adin mun uh asuhchieng uh ang ngaita hi. Tuachin, Jerusalem ah khawmpi aneita uhi. Athupuasah uhi ahi leh, “Tuaziehin, Jentailte lah a Pasian lam a hing kiheite khu subuoi dalei chi ka ngaidan ahi. Milim biehnna, sil bua nehte, kingaina siengloute, hehlup sa leh sisan nehte, tawpsan dingin a kung uah laigiel lei ka chi zaw hi” achi uhi (Nasepte 15:19-20).

## **2.ii). Naisia Khawmpi.**

Tami khawmpi aneina ziehun ahileh, Aria kichipa zilsahna agenchien nuom ziehuh ahi. Aria in, “Jesu khu Pasian silsiem khat ahi, Pasian toh akikim/kibang sih” chiin azilsah hi. Lengpa Constantine khu Khristian ang hitahin, Khristiante lah a Aria zilsahna zieh a buoina umte asuvengta hi. Tuachin, thugin bawl ding in khawmpi anei ua, Constantine in, “Hattuum sung a kilemlouna khu kidouna sang in azau um zaw” achi va-ia hi.

## **2.iii). Apostolte Puonkhieh Thugin.**

Awle, ‘Apostol Thugin’ imu masahna pen uh ahileh AD 390- a Milan khawmpi-a, Synod khawmpi aneilai un, Pope ‘Siricius’ kungah Apostol Thugin (Symbolum Apostolorum)-gelthaw in athawt uhi. Agintat dan un, Milan Bishop Ambrose gel hidingin agingta uhi. Ambrose khu German mi ahi a, mi thupitah khat tapa ahi a, laisiem leh dan thei mi zong ahi.

Tualeh, Apostolte Thugin genzauna (exposition) khu T. Rufinus (A.D. 345-410)-vellai a pan ageldan in, “Thugin hing pienkhieh dan tambangin imu uhi. Mangpa Jesu Van a akatounua ni sawm (10)-ahi in, Judate ging/zau a nuazuite aumkhawmlaiun, Mangpa a kung uah Hamuonna thu a tung sah hi. Ahing tuntahin, meikuong bangin atungsah a ham chituom tuomte theithei na zong anei uhi. Tuachin, nuazui sawm-le-nite (12)-te in thugin (thuvon)-a puongkheta uhi. Tambang in:

**Peter-in:** “Bangkim bawlthei, Pa Pasian, Lei leh Van siempa khu ka gingta hi” achi hi.

**Andru-in:** “Atapa neisun Jesu Khrist, i Mangpa Jesu Khrist zong ka gingta hi” achi hi.

**Jakob-in:** “Ama khu Hagau Siengthou in agaisah a, Mari in nungah ahilaiin ahingkhie hi” achi hi.

**Johan-in:** “Pontia Pilatin huoisietahin athuoh gimsah a, Singlamte ah kilbehin aum a, Ashita a, phumin aum a” achi hi.

**Thomas-in:** “Mi shi khuo ah avahaw a, Nithum ni’n mishi lah a pat athoukiata hi” a chi hi.

**Jakob-in:** “Van ah katou kia in, Bangkim bawlthei, Pa Pasian zietlang ah atouta hi” achi hi.

**Philip-in:** “Khuna patin hing kumsuh kia va’n, mishi leh mihing vaihawmsah dingin” achi hi.

**Bartholomai-in:** “Tuachi’n Hagau Siengthou ka gingta a” achi hi.

**Matthiu-in:** “Mi zousie a ding a Hattuum Siengthou um zong ka gingta hi. Mi siengthoute kipawlkhawmna zong ka gingta hi” a chi hi.

**Simon-in:** “Khel ngaidamna ka gingta hi” achi hi.

**Thaddai-in:** “Tahsa thawkiana ka gingta a” achi hi.

**Mathia-in:** “Kumtawn a hinna toh Amen” chiin a khumsinta hi.

## **2.iv). Athanasia thu vawn.**

‘Athanasia Thuvawn’ (Athanasian Creed)-chi a hattuumte’n ikipiehsawn zelzel uh khu kum zabi 4-na hunlai a, Pasian Khat a Mihing Thum um (Trinity)- thugin leh Jesu Khrist Pasian ahina thugin kembittu minthang, Egypt gam a Alexandria khuo Bishop, Athanasia (296-373)-in ang guonggal tou ahi. Tami Thugin in ‘Pasian khat a Mihing thum (Trinity)- thugin leh Khrist hina (nature) thuginte tawmnou khat in ahilchien in apuongkhie’ hi.

## **2.v). Chalcedon Thuvawn.**

Hattuum masaten, ‘Chalcedon Thuvawn’ (Chalcedonian Creed)-chi a, izui/kipiehtou zelzel uhkhu kum AD 451-a, Chalcedon khuo (tua Turkey gam a umta), Hattuum khawmpi lien li veina (4)-in

Khrist hina (nature) tungtang a zilsahna dihlou umte genchetna ding leh dawnna ding in a pomta hi. Tami, Thugin in, ‘Khrist in hina chini (mihing ahina leh Pasian ahina)-mi khat a umkhawm anei a, tuachin ginna dih khu apuongkhie’ uhi. Aumzie ahileh, Mangpa Jesu khu za-a-za (100%) Pasian hinna nei ahibangan za-a-za (100%)-mazong mihing hina nei ahina genchetna uh ahi.

## **2.vi). Westminster Confession (Thugin).**

Tami thugin hing kipat dan ahileh, June 12, 1643-in, England leengnu/kumpinu solkalin, Hattuum kivaipuoh dan leh Pasian biehdan leptuohna ding leh zilsahna dihlou leh thugin hilchet dan dihloute suhtuohna dingin Pasian ging/zau mite kimukhawmna (Assembly)-neina dingin Dan asiem hi. Tuachin, July 1, 1643 a kipat March 25, 1652, sung in ‘Westminster Abbey Assembly of Divines’ a siemkhieh ahi. Tuachin, tami thugin asiem/bawl tungin, Pastor mi za-le-sawmni leh khat (121), mipi (lay men)-Parliament member mi sawmthum (30), leh Scottist khawmpi siemtu (observer), mi guh (6)-ten tami thugin asiem uhi.

Tami Assambly khu ‘Church of England’ thugin biehdan bawlhohi na ding leh Pasian Lai-sien-thou toh kituohlou zousie suhbei a, Parliament-in ahathkawm a kibawl ahi. Tualeh, thuginte, biehdan dante leh Hattuum kivawn/kepdante khu a siemphat ban uah, thu kidawngtuo a bawlsien ding chi in theitawpin pan anala uhi. Tualeh, tami thugin khu Pasian Lai-sien-thou pawm zousie in zong angaisang uhi. Scotch mi khat, Thomas Carlyle in, thu kidawng masa pen, ‘Mihingte i umna zieh uh bang e? chi donna khu ‘Pasian pahtawi ding leh Ama a kipah zing ding’ chite khu “I hing upat deudeu ua, kumtawn kotkhah bul a idin leh ka naupan lai a kana zilte ka lungtang sung ah ang kilang deudeu hi” a chi hi.

Tuabanah, John Calvin, zilsahna dung zui a thugin apuonkhieh uh zong ahiziehin, tuni dawngin ei Presbyterian Hattuumten thugin bulpi pen khat in ineita uhi. Tami thugin

bawlna a tam pente khu Presbyterian hattuumte ahi uhi. Tuabanah, tami Assembly ah hattuum pawl tuomtuom lamkai-Episcopalian pawlte, Presbyterian pawlte, Independent pawlte leh pawl tuomtuomte zong a pang uhi.

### **3). Pasion thu gen chienna (Theology).**

Theology khu Grik ham a, Theos chi leh Logos, a pat a kilain, Sapham in Theology akichi hi. Tualeh, ‘Theos’ khu Pasion china ahia, ‘Logos’ khu thu china ahi. Atomkimin, Theology khu “Lungsim leh ngaituona chimtah zang/mang a Pasion thu zilna leh genchetna’ ahi. Akhen chiengin, ‘Thugin’ chi-a lekhieh leh zah hun zong aum hi. Ahin, Theology ichi chiengun, Pasion tungtang maimai zilna ahi sih a, Pasion tungtang ahitheh tan a suina, mihing leh asilsiem dangte toh akichimatna leh adang dangte zong ahuop hi.

Tualeh, ginglou mi mipil leh siem Plato leh ama sangshie/zilsahtu, Socrates-in zong theologia chi khu Grikte Pasiante (gods)-te tungtang genna in anazang zouta uhi. Hattuum masate hun lai a, puitu, Clement of Alexandria leh Origente hun lai a kipatin Theology chi kamteng khu Trinity tungtang leh Mangpa Jesu tungtang genna in zong ana zang/mangta uhi. Tamna igen nuom ahileh, ‘Theology leh Thuginte’ zong kikhenthei lou leh kizop ahidan uh igen nuom uh ahipeh hi.

#### **Dohnate:**

- 1). Jerusalem Khawmpi thupuasah bang e?
- 2). Bangzieh a Nisia Khawmpi anei uh e? Lengpa Constantine panlah dan tawmkimin gen in?
- 3). Apostolte (Puonkhieh) Thugin tawmkim in gen in?
- 4). Chalcedon Thugin in a puasah bang e?
- 5). Westminster Confession (Thugin) abawldan uh gen in?
- 4). Theology bang china e?

~~~~~

### Bung - 3

## BIBLE MIN UMZIE, PASIAN HUHAKHUM AHIDAN, KIKHENDAN LEH ATUPTÉ

### *Thuchiin ding:*

*“Laisiengthou zousie, Pasion huhakhum ahia, thutah kihilna diing mawng ahi. Dihlounate phawh in khelnate sudih in hindan hoi theina diing un thu apie hi’ (II Tim. 3:16).*

### **1). Bible min umzie:**

“Bible” chi umzie khu Greek ham a ‘Biblion’ leh ‘Biblio’ chite a pat a lah ahia, aumzie khu ‘laibute’ china amaw ‘laizuolpi’ chinate ahi. Bu khat sang a tamzaw genna ahi leh ‘Ta bablia’ ‘laibute’ akichi hi. Ahinlah, Thuhun Lui ah Bible chi kammal zahkhah in aumsih a, ‘Pasion Laibu’ ‘Laisienghtoute’ ‘Laibute’ chi-a gen ahi uhi (Dan. 9:2; Mak. 1:56; 3:48; 12:9).

Kumzabi 5-na ah, Greek Hattuom puitute’n ‘Biblia’ chi khu Khristiante Pasion laibu pumpi genna in anazangta uhi. Tualeh, Latin ham zangte’n zong tam ‘Bablia’ ana zui uhi. Bible chi khu laibu khat sang a tamzaw ahia, Bible bupumpi genna in ahing kizangta hi. Tualeh, Thuhun Lui bute khu Thuhun Tha ah Pasion Laibu (Mat. 21:42). Pasion lai/thu (Mat. 22:23), Laisienghtoute (Rom. 1:2; II Tim. 3:15)-chite ahi uhi. Tuabanah, asung a thute ziehin laibu dang zousie sang in atungnung in aloupizaw a, ‘Bible’ chia igen mai in zong Khristiante sahkhobu

ahi chi' ithei ngal uhi. Tualeh, mihingte kung a silpieh thupi pen khu Khrist leh Hagau Siengthou banah, athumna khu Bible ahi akichi hi. Laibu kizangte lahlah ah Bible khu a upa/tah pen a, tualeh, leitung pumpi a laibu kizua tam pen leh doudalna tuoh pen chilei zong i chi khiel sih ding uhi. Rome leng/kumpi Voltaire in zong ahunlaiin, khawvel pumpi-a Bible zousie haltum sieng a suhbei ding chin pan nasatahin anala hi. Ahin, ana lawsam a, tunin, Bible khu khawvel a laibu kizuatam pen leh silbawlttheipen in gingtute leh ginglouten zong pawm/angai chiet uhi.

## **2). Hagau mi leh mi thupiten Bible hina leh manphat dan agente uh.**

2.i). Mi minthang, Sir Walter Scotta in, adamlaiin laibu tampi khat a giel a, zong Library ah laibu tuomtuom akoikhawm hi. Ahin ashiding kuonin ama tanchin gieltu pa John Gibson Lockharta kung ah, “Laibu khat hing pie in achi hi. Lockharta in athugen leh alaibu gen khu atheizou sih a, Pu, aw bang laibu pen e kang pieh ding chin adongta hi. Aman leitung ah laibu khat maimai aum a, tuakhu BIBLE ahi” achi khum hi. 2.ii). J.W. Chapmanin, “Bible khu na pilna dingin sim/zil in. Na bitna dingin gingta in len, na sienthoua dingin zui/mangin; guntahin zil inlen, athute gingta kawmin thum inlen, zong na zang/mang ngal ding hi. Banah, chiemte inlen midangte zong pesawn in” achi hi. 2.iii). Andrew Jackson in, “Bible khu igam vaihawmna kingahna ahi” achi hi. 2.iv). USA President lui, George Washingtonin, “Bible zaulou/panglouin hoitah leh dihtahin leitung vai akihawmthei sih” achi hi. 2.v). Alfred Tennyson in, “Bible sim khu pilna muna (education)- aching mawngmawng hi” achi hi. Tamte ban ah gending tamtah zong a umding hi.

## **3). Bible Pasian huhakhum umzie:**

I Bible uh Pasian huhakhum ahi chi khu, II Tim. 3:16- ah, imu ua, “Laisiengthou zousie Pasian huhakhum ahia, thutah kihilna

diing mawng ahi. Dihloute phawh in, khielte sudih in, hindan ahoi theina diing in thu apie hi” chi imu uhi. Tam thu panpitu hoitah khat khu Job 32:8 -ah “Hinanlezung bangkim bawlthei Pasion Hagau khu mite tung ah hing tung in pilna apie a” chi imu uhi. Tamte banah, Bible khu Pasion huhakhum ahi chi ngaidan hing kipatna bul ahileh Genesis 2:7 ah, “Mangpa Pasion in hinna hu anahkuo ah ahakhum a, tuachi in mipa in hinna ahing neita hi” chi ahi. Tuabangma in, ‘Pasion khu Bible ah mihingte hinna petu ahithu ang hil hi’ chi imu uhi. Tualeh, II Peter 1:21 ah “Aziehpen, Jawlneite thugen khu mihing ngaidan a hing kipan mai ahisih a, mite khu Hagau Siengthou in athunun a, tuachi in Pasion a hing kipan thute khu agen za uhi” chi zong imu uhi. Bible Pasion huhakhum ahi chi umzie khu Bible gieltute’n Pasion Hagau puina toh agiel uhi china ahi pen a, tualeh Pasion huhakhum chi pen “Pasion in a Hagau in zong asuhing” china zong ahi.

#### **4). Bible sung kikhen dan leh gieltute:**

4.1). Ei Protestan-te pawmdanin, Bible khu laibu 66- kigawm ahi. 4.i). Thuhun Lui ah bu **39-** aum a, Thuhun Tha ah bu **27-** aum hi. 4.ii). Bawng/Bung umzat Thuhun Lui ah **929** aum a, Thuhun Tha ah **260** aum a, akigawmin bung **1189** aum hi. 4.iii). Tualeh, tang umzat ahileh Thuhun Lui ah tang **23214**, aum a, Thuhun Tha ah **7958**, aum a, akigawmin **31173** ahi. 4.iv). Tualeh, Bible pumpi a bung sau peh ahileh **Late 119-** ahi a, tang **176** anei a, banah, Bible pumpi a bung tawm pen **Late 117** ahi a, tang ni (2)-chau anei hi. 4.v). I Bible pumpi a a laita pen (middle)-pen ahi leh **Late 117** ahi. 4.vi). Bible pumpi ah thummal umzat ahileh-**775,693** um in misiementen agen uhi. .

4.2). Agielte khu Jawlneite, Leengte, Doctorte, sie-dongte, lengpa tapate, laphuoh siemte, mipilte (philosophers) leh alah ua khenkhatte ahileh laisiemlou ngasaman mi leh adangdangte ahi uhi. Mi tuomtuom sawmli (40)-vel in kum 1600- sung vingveng

a gel ahi. Tualeh, agelna mun leh hunte zong akibang sih ua, akhente khu akigel hun kum 1000- val bang kikaah/kigamla ua, hinanlehzong kikum kal leh kituohlou chi mawng mawng zong um keilou in, mikhat gel/khut suoh abang uhi. Azieh ahileh agelsahtute lungsung a nnasem leh theisahtu khu Pasion ahizieh ahi. Ageltute sil asuhlat utte uh zong akibang chiet ua, tuaziehin, akituohlou/kikumkal kha aum sih hi. Paul in tam bang in agen hi, “Laisiengthou zousie, Pasion huhahkhum ahia, thutah kihilna diing mawng ahi. Dihlounate phawh in khelnate sudih in hindan hoi theina diing in thu apie hi’ (II Tim. 3:16) ah achi hi.

## **6). Bible a Laibu umte khen dan tangpite:**

I Bible uh khu atangpiin, Thuhun Lui leh Thuhun Tha-te khu lompi nga (5) in akikhen uhi. Tuate:

### **6.1). Thuhun Lui bute:**

- 6.1.i). Mosi laibute, khu ‘Pentateuch’ akichi hi. Tuate ahileh, Genesis a pat Deutronomy tan ahi Bu nga (5) apha
- 6.1.ii). Mihing tangthu kigelna Laibute ahi leh Joshua apat Esther tan Bu Sawmleni (12) ahi uhi.
- 6.1.iii). Labute Job apat Solomon late Bu nga (5)-ahi.
- 6.1.iv). Jawlnei liente Isai a pat Daniel tan Bu nga (5)-ahi.
- 6.1.v). Jawlnei neu/mengte Hosia apat Malaki tan Bu sawmleni (12)-ahi uhi. Tualeh, Thuhun Lui laibu khu akigawm in Bu sawmthum-le-kuoh (39) apha hi.

### **6.2). Thuhun Tha bute:**

- 6.2.i). Khantanhoi bute Mathiu a pat Johantan Bu li (4)-ahi. 6.2.ii). Hattuom kipatna bu Nasepte (1). 6.2.iii). Paul laihahte, Romte a pat Philimon tan, Bu Sawm-le-thum (13)-ahi. 6.2.iv). Laibu dangte Hebrai a pat Juda tan Bu giet (8)-ahi. 6.2.v). Mangmuna/ Kihilna Bu khat (1) chite ahi. Akigawm in Bu sawm ni-le-sagi (27)- apha uhi.

## **7). Atangpi a Bible in agente/suhlat asawmte:**

I Bible in atangpi a suhlat atupte/sawmte i theilou zieh un, buoina tamtah ituohlawthei uhi. Bible in suichetna toh kituoh (Scientific)- in sil asuisawm sih a, tualeh, thu-leh-laa hoi tahtah leh khangthute kizom ditdet in zong asut sawm diehsih hi. Ahin, i Bible in suhlat asawm/tup tangpite ahileh Pasian in mihingte (Israelte /hattuomte)-te hinkhuo a hundamna nna asepdante, apuidante leh a itdante suhlat asawm hi chi lei ichi khiel sihdung uhi. Tuabanah, i Bible in suhlat atup thupi pen khu Hundamna thu ahi. Mihingte hundamna apoimawna zieh ua, hundampa diing ua Pasian in abawl dante agenna ahitangpi hi. Bible in suhlat asawm thupite theichet kiphamaw a, theikhelkhah khu sil khawhvawt ahidiing hi.

Tualeh, Etsahna dingin, Leitung nungahte leh Pasian tapate kipawl in hah-le-suon anei thu uh imu uhi (Gen. 6:1-4). Tuabanah, Melkisedek thute (Heb. 7:1-3) ah imu uhi. Tam thute in suhlat asawm khu ahileh, amasa pen in, khelna huoisietdan agenlang ut a, a nina pen in, Khrist khu Siempu bukim ahidante agen ut ahideu pen hi.

Tamte ban ah, Thuhun Lui in Dan thu agen a, Thuhun Tha in itna/lungsietna thu agen hi. Thuhun Lui in abul apan a, Thuhun Tha in asubukimta hi. Thuhun Lui khu Sinai Muol lah ah akiviel a, Thuhun Tha ahileh Kalvari ah akinga hi. Thuhun Lui khu Mosi toh akijop a, Thuhun Tha ahileh Jesu Khrist toh akijop hi. Thuhun Lui khu alim ahia, Thuhun Tha ahileh atahtah/abukim in ang kilang hi.

## **8). Thukhum sin:**

Ei Presbyterian Hattuum in Bible bu 66-te bou khu Pasian thu, Pasian huhakhum in in i pom uhi. Tam Bible Thugin a i kibahpiloute uh. Hattuum dangte toh ikibahlounate uh-Roman Catholic Hattuum toh Bible pomdan ah i kituoh theisih uhi.

Aziehpen, amau'n Bible bu 73-a pom uhi. Aprocrypha bute khu i pompi theisih uhi. Church of Christ Hattuum in Thuhun Lui laibute/thute khu apawm seng sih uhi. Ahin Thuhun Tha laibu 27-teng bou khu Pasion in Hattuumte a pieh Laihengthou ahi chi in a pom uhi. Thuhun Lui paimangna leh Bible bung khenthangna ahijhie in i Bible leh Presbyterian Doctrine toh a kikal hi. Tualeh, Bible Bu 66-umte khu Pasion huhakhum a ipom sihle Hattuum dih kihitheilou diing hi. Tuaziehin, tulai a Bible 66-sang a tamzaw ahisih leh tawmzaw pomte toh ithugin uh kibang sih china ahimai hi.

**Dohnate:**

- 1). Bible chi thuteng khu bang ham a kipat a hing kilahdoh e?
- 2). Bible Pasion huhakhum umzie bang e?
- 3). Bible gelna in hun bangtan alut ei? Mi bangzaten a giel uoi?
- 4). Thuhun lui leh Thuhun tha ten Bawng/Bung bangza anei uoi?
- 5). Atangpi a Thuhun Lui leh Thuhun Tha ten genlawh asawmte gen in?
- 6). Unau Roman Catholic hattuum leh Church of Christ-te toh Bible pawmdan tungtang a i kibah lounate uh bangte e?



## Bung - 4

# BIBLE GEL MASAHNA HAMKAMTE LEH ALEKHIEHNA TUOMTUOMTE

*Thuchiin:*

*“Ka thu khu meikuong bang ahia, tuachieng in suong satnathei  
Sehpi toh kibang ahi hi” - Jeremai 23:29.*

### 1). Thumapui:

I Bible uh tulaitah ainei/zah bang ua achil a pat a Pasian in amite kung a Van a kipat ang khiehsuh/houpi bang phiel a ngaidan nei tulai gingtute lah ah atam hi. Tambang, ngaidan khu adih sih a, i Bible ua'khu ham tuomtuom a pat a hing kiletkhie in, kum tamtah nua in Bible inei thei pan uh ahi chi itheisiemna diing un ang kipatdan isui diing uhi.

### 2). Bible kigelmasahna hamte:

Bible gelna diing a ham kizangte khu Hebrai, Aramic, Greek leh Aramaic hamte in ang kigel masa hi. Thuhun Lui khu Hebrai ham a gelmasah pen ahi. Thuhun Tha khu Greek ham a gel masah pen ahi. Tam atung a ham li (4)-te atomkim in isui diing uhi.

#### 2.i). Hebrai ham:

‘Hebrai’ ham a, thuteng umzie khu ‘Eber’ chi a pat lahkhiat ahi. Aumziehtah khu, ‘Kaantu, makheltu’ (The one who passes over) china ahi. Tualeh, Hebrai ham hing kipatdan khu Sem hahte ham

zah a pat a hing kila ahi. Israel leh Judate'n azang uhi. Suria gam Mallam Tuipi pieu a teengte, Phoniki-te leh Moab-te ham toh zong kinaina anei hi. Bible ah 'Kanante ham' (Joshua 19:18) chite 'Juda ham' (I Leengte 18:26) chite in gel ahi.

Hebrai ham ah Consonant (amatang a gingtheilou thuteng), zietlam a pat in veilamnaw in agiel uhi. Achiil in, vowel anei sih ua, ahivang in, Juda laisiemte'n AD, Kumzabi guh (6)-vel in ang siemkheta uhi. Tuachin, Thuhun Lui Bible khu Hebrai ham a gel masah pen ahi.

## **2.ii). Aramaic ham:**

Armaic ham khu BC kumzabi 8-leh-7- kikal vel a kipat a zah hidiing a gintat ahi. Assuria leh Babylonte in Suongpeh a thu agelnate uah tam ham azang uhi. Tualeh, Aramaic ham khu Hebrai ham toh kisutna/kibahna bangtan ahei khat anei hi. Aramaic khu Parsis (Kaldai) ham ahia, BC 550-450, vel in aleengpa un ham in anazang hi. I Bible uah zong mun khen khat ah tami ham khu akizang hi. Thuhun Lui ah tam Bible taangte ah, Aramaic ham in akigiel hi. Tuate –(Ezra 4:7-7, 18; 8:12-26; Jeremia 10:11; Dan. 2:4-7, 28; Gen. 3:47) ah imu uhi. Tualeh, Genesis 31:47 ah, Laban thugen 'Jegar Sahaduth' chi khu Aramaic ham ahi. Assuriate'n gam dangte toh kihouna hamzah (II Lengte 18:26; Isaia 36:11) zong ahi. Tabrimon min (I Lengte 15:18) leh Hazael chite zong Aramaic ham ngen ahi.

Tualeh, i Mangpa Jesu ngei in zong Aramaic ham in thu agen hi. Greek ham leh Hebrai ham zong azang zelzel hi. Thuhun Tha ah Aramaic ham atam mama hi. Tuate khui – Etsahna ding in: Talitha kumi (Mak.5:41), Ephatha (Mak. 7:34), Eloi, Eloi, Lama Sabakthani (Mak. 27:46; Mak. 15:34). Maranatha (I Kor.16:22), Abba (Mk. 14:36) leh Akeldama (Nasepte 1:9)- chite ahi uhi. Bible pumpi zong Aramaic ham a gel in ana um hi.

### **2.iii). Greek ham:**

Greek ham khu akizah chiillai hun khu asawtta mama hi. BC 800-vel a kipat a zah ahitabou hi. Greek ham ang kithethangna zieh khu Alexander gamlahna zieh ahideu hi. Amapan khun Palestien gam, Suria leh Aigupta gamte khu BC 322-vel in anglazouta a, tuachin Alexandria khuo khu Aigupta (Tulai a Egypt) gam din ang bawlta hi.

Ahamte uh khu Judate'n tam hunlai a pat in ang zangta uhi. Tualeh, AD 869-vel in, Hattuomte'n vaihawmna leh kikhopna ah ana mang/zangta uhi. Greekte'n ham tuomtuom anei ua, tuate khu Attic, Acolic, Doric leh Ionicte ahi uhi. Thuhun Tha khu Greek ham a gelmasah pen ahi. Agieltute Luk chilou ngal khu Juda mi ngen ahi uhi. Nidanglaiin, Greek ham khu Palestine, Suria leh Egypt gam mite ham zah leh thei pen ahi hi.

### **2.iv). Latin ham:**

Tami ham khu Bible geltute Bible gelna diing a, azah uh ham ahi chet sih hi. Ahin, Thuhun Tha ah, bangza ahei khat zah ahi. Tamkhu, Romante ham zah pen khat ahia, akumpi/ solkal ham uh (State language) zong ahi.

Mangpa Jesu hunlai in zong Palestine gam ah, Hebrai ham, Greek ham leh Aramaic hamte akizang khawm chiet hi. Thuhun Tha ah zong, Latin ham zah ahi (Luk. 23:38; Johan. 19:20) ah imu uhi. Thuhun Tha ah khu Latin ham 30-vei vel aum a, apoimaw deute khu: - Census (Kisimpina) Rome Kumpi ham ahizieh in, Jesu Singlamte tung ah zong 'Judate kumpipa ahi' chi in Latin ham in agiel uhi. Tualeh akizah dante khu: Centurian (Gaalkap bupa), Denaria (Makhai), Legion (Tampi), Praitorian leh Quadrans chite ahi uhi.

### **3). BIBLE LEKHIEHNA TUOMTUOM TE**

#### **3.i). Septuagint:**

Hebru khu gam chin a Pasian thu gingloute lah ah akithezah ua, aham uh theizou talou in, Greek ham zang atam uhi. Tuata zah diing in Aigupta gam Alexandria khuo ah Greek ham in aletkheta ua, amin diing in Septuagint ahisah uhi. Mi 72-vel in, aletkhie ua, Juda laisiemte in azang pen uhi. Jesu pien masang kum 286-laivel a lekhiet ahi. Jesu damlai in zong tam khu azahpen uh ahi.

#### **3.ii). Vulgate:**

Tami khu Latin ham a koi lekhiet e? Bangchihlai a kilet e? chi zong akichientah aum sih hi. Tam ham khu, Roman Catholic Hattuum in azah pen uh ahi. Jerome damlai leh Jesu pien nua AD kumzabi lina (4)-tan in azang uhi. Kumzabi lina tawplam ah Jerome in Hebrai ham a pat in aletkhie hi. Kumzabi sagina (7)-na a kipat in, Pope Gregory-I na-in, lekhietna dih in apom a, zong azangdenta uhi. Tunitan a, azah pen uh khu, alui pen khu a endih ua, kumzabi sawm leh sagi (17)-na lam ah, Trent Khawmpi ah zah/man diing in a puongkhieta uhi.

#### **3.iii). English (Sapham):**

English (Sapham)-a, Bible alekhietna masah pen uh khu AD 1219 vel lai ahi. Aletkhetu masa pen khu zong thei ahisih hi. Ahin AD 1318- lai in, John Wycliffe, Siemphatna (Reformation)- in Vulgate a pat in ang letkhie hi. Khum hunlai in laisutna khawl (Press) aum sih a, ahamsa mama a, mizousie in Bible asinding uh zong phal ahisih hi. Tua hunlai in, Thuhun Tha bu khat man khu \$ 40-(India sum in Rs.560)-vel ahiding hi. Tambang khop a, vang leh mantam hilehzong mite'n simchiet a ut ua, asimkha zousie in sahkhoham leh khotaang hinkhuo ah masawwna amulaw zelzel uhi. Roman Catholic Hattuum leh alamkaite uh dihlounate uh khu Bible a pat in ang kilangta hi. Tam khu Hattuum lamkaite a diing in sil buoihuoi leh nanoh ahing suohta hi. Kum 1408-ah, Oxford khuo

ah akhawmpi un thupieh asuota ua, “Koima’n Sap-ham a Bible lekhiatlou diing, Wycliffe lesa zong khu abu-in, ahisihleh afeh a simtheilou diing’ chite in agenta uhi. Gawtna leh bawlsietna zau zieh in Bible sim diing zauhuoina lienpitah ang tungta hi.

Bangtan aheinua in, William Tyndale in Thuhun Tha bu khu Antwert khuo ah Sapham in khawl in ang sunta hi. Tuate khu, England gam ah ahawmzahta hi. Roman Catholic Hattuumte a diing in ang nawngkaita mama hi. London a Bishop in amu zousie khu alei a, ahaltum sieng hi. Ahin atamzaw sem sut in ang umta, tam khu khawl a Bible sutmasahna pen ang hita hi.

Tuachi’n, AD 1535-ah Miles Coverdale in Bible pumpi khu Sapham a let in ang sun kiata hi. Tuakhu, Leengpa Henry VIII-kung ah apeta hi. Kum 1568 tan in Bible lekhietna zieh a hamsatna khu apeitou zelzel hi. Tam khu, Bishop Bible ahisah ua, kum 50-sung vel azang uhi. Kum 1603- in, James-I England Leengpa in Bible umsate khu dihkimlousahna anei a, alettha diing in mi 54- aguot hi. Ahing lekhiat tahtah un mi 47-vel in, asem thei giap uhi. Kum 1607 ah akipan ua, kum thum zou in azou uhi. Kum 1611 in London a Robert Barker on khawl ah asunta uhi. Tam lekhietna khu ‘Authorised Version’ ahisahta uhi. Tunitan a Sapham a um Bible minthang pen khat ahita hi.

#### **Dohnate:**

- 1). Bible gelmasahna hamkam chilite bang hamte ahi uoi?
- 2). Hebrai ham hei a hing kipan e?
- 3). Bang hamte in Thuhun Lui Thuhun Thate akigiel masa pen uoi?
- 4). Thuhun Tha a Aramiac ham thum hing gen in?
- 5). Septuagint Bible koi lekhiat masah pen e?
- 6). John Wycliffe in bang e abawl?

~~~~~

## Bung-5

# BIBLE GENTENA KAMMALTE LEH APROCRYPHA THU

### ***Thuchin ding:***

*“Na thu khu keima hing chingkip Meivah ahi a, ka lampi a diing in khovah ahi”.(Late 119:105).*

### **1). Thumapui.**

Bible gentena kammalte leh eiten Pasion huhakhum ding a ipawmtheilou Aprocryphate isui ding uhi. Ahin buching tah leh kimtahin vang isuizou sih ding uhi.

### **2). Bible thu gentenate:**

#### **2.i). Namsau:**

Hebrai 4:12-ah, “Pasion thu khu ahing a, sil abawlthei a, namsaau alangni a kitathiem sang in ahienzaw a, tahsa leh hagau kizopmatna gu-leh-taang kisuhtuona hawm chintuigu umna tanpha pailet in asattan hi. Tuachi in mihing deidaan leh ngaituona tanpha tung ah thu aneithehi hi” achi hi. Tammin, Bible khu sil bawltheitah leh mi lungsim leh ngaituona sulamdang thei ahidan atahlang hi.

#### **2.ii). Sehpi:**

Jer. 23:29, ah, “Ka thu khu Meikuong bang ahia, tuachieng in suong satnathei Sehpi toh kibang ahi” ach hi. Tami in sil abawltheidan leh adaltute azawthei dan a ensah hi.

### **2.iii). Chii setheilou:**

“Chii dihlou leh setheilou lah a pat hilou in Pasion thu hingzing leh chii setheilou a pat piengthasa nang hita uh” chi ahi (I Pet. 1:23). Asilbawltheidan leh asawtdaan alangsah hi.

### **2.iv). Hiim lang:**

“Pasion thu in mihing dinmun leh Pasion khantante, akikal thute chiengtah leh feltah in tahlang zing hi” (Jakop 1:23-24).

### **2.v). Meikuong:**

“Na hing thupieh ka sung ah Meikuong bang in asa” hi (Jer. 19:9). Pasion thu in sil abawltheidan etsahna ahi.

### **2.vi). Meivah:**

Late 119:105-ah, “Na thu khu keima hing chingkip Meivah ahi a, ka lampi a diing in khovah ahi” achi hi.

### **2.vii). Ann hoi leh dawn diing a hoi tui ahi:**

I Pet. 2:2; Heb. 5:12-14; I Kor. 3:2; Rom. 10:17-te ah imu uhi. Tualeh, damtheina diing, khanletna leh hatna diing a neh diing leh dawn diing tui zong ahi chite imu uhi.

## **3). Aprocrypha laibute:**

I Lai siengthou ah laibu 66- aum a, ahin Greek ham a kigiel Thuhun Lui khu ei a sang in bu 14- in, atamzaw hi. Azieh ahileh, Aprocrypha bute atuon ziehin ahi. Roman Catholic-ten, tam Aprocrypha-te apom ua, igensa bangun ei Protestanten ahileh ipomsih uhi.

### **3.1). Tualeh, Aprocryphate laibute khu tam anuoi a te ahi uhi:**

3.1.i). Esdras laibu masa (Esdras laibu thumna zong kichi hi).

3.1.ii). Esdras laibu nina (Esdras laibu lina zong kichi) hi. 3.1.iii).

Tobit. 3.1.iv). Judith. 3.1.v). Esther laibu belapna. 3.1.vi).

Solomon pilna. 3.1.vii). Ekklesiastikas ahisih leh Serach tapa Jesu

pilna bu. 3.1.viii). Baruch laibu. 3.1.ix). Jeremia lai hah. 3.1.x).

Azaria thumna leh tangval thumte laa. 3.1.xi). Susana laibu 3.1.xii). Bel leh Dragon. 3.1.xiii). Maccabee laibu khat 3.1.xiv). Maccabee laibu ninate ahi uhi.

Tam laibute pen BC 200-AD 100- hunsung vel a gel ahia, Khristian masate leh Hattuum lamkaite'n Pasion huha khum hidiing in apomsih uhi. Tuaziehin, i Bible uh bu 66-toh zong ana simkhawm ngai mawngmawng sih uhi. Origan (AD 400), Alexandria a Bishop, Eusebius (340-AD), Jerusalem Bishop Cyril (400-AD), Alexandria a Bishop Athanasius (365-AD) leh adangdangten zong Laisiengthou bulah a, apom/simnuomlou ban uah, abute zong simlou diing ana chi uhi. Ahin, unau Catholic Hattuumte in Bible in apom ua, tam khu i Thugin ua i kikalna uh khat ahi hi.

#### **4.). Aprocrypha Laibute Pasion huhakhum ding a akipomlouna ziehte:**

4.i). Mangpa Jesu leh Khristian masate'n Thuhun Lui Laibute a pat in thu tuomtuomte lasawn nan u'leh zong, Aprocryphate a pat in tengkhat zong alasawn sih uhi. Jesu leh Sawltah te'n zong Pasion thu in apomsih uh china ahi. 4.ii). Judate laigieltu minthangte Philo, Josephus leh Jamnia a Jewis Council (AD 90) leh Khristian laigieltu Origan leh Jerome-ten zong Laisiengthou in a pom sih uhi. 4.iii). Laisiengthou thu zilsahna peipi toh kikal in zilsahna tuomtuom a piengsah thei hi.

#### **5). Aprocrypha Laibu sung a kigen ipomtheiloute uh:**

5.i). 2 Macc. 12:43-45 ah, 'Purgatory' zilsahna thudihlou atuong hi: Tuabanah, Jerusalem a khelna kithoina diing sum/dangka-eng tang'neen 2000-a khieh chieng tua ... mishisaten a khelna ua pat tatna amu theina diing un, mishite a diing in anabawl zel uh chi thu agen hi. 5.ii). Tualeh, Ekklesiaticas 3:30- ah, Nasep hoi zieh a hundamna muthei dan in agen hi. 5.iii). Tobit 6:58 ah Laisiengthou toh kikal 'Dawi biehma' chikhat atuong a, "Dawi ahiei ahisihleh

hagau gilou in mi koi ahei khat asuhbuoi leh ngasa lungtang, asin-le-asinkha mei a halna khu in a hawlkhethai a ..... tang 17-ah, tua dawi in gimnam azah chiengin ataimang diing a, tuachi in ahing kinuale non sih diing hi” achi hi. 5.iv). Tobet 12:8-9-ah, “Sana/Dangka lawmkoikhawm sang in silpieh pieh ahoizaw a, azieh ahileh shina a kipat hunkhie in khelna zousie a lamangsiengthei hi” chi in nnasep-le-silpiehte a hundamna lawkhiet thei diing dan agen hi. 5.v). Baruch 3:4- ah, Pasian in mishisate thumna dawng dan in agen hi. ‘Avanglien Mangpa aw, nang Israel Pasian in Israel shisate thungetna na dawng hi ....’ chi in agen hi. Tamkhu, Lai-siengthou zilsahna toh akikal mama hi. 5.vi). Khangthu leh Leitung gam thu ah thudihlou bungkhat atuong hi. Judith 1 leh 2 isim leh Nebukanezar General Holofernes in Nineveh khopi ah Assuriate avaihawmkhum chi in kigiel hi. Adihtah in, Holofernes khu General ahia, Nabukanezzer pen khu Babylon Leengpa ahi. Tamte ziehin, ei Presbyterian Hattuum in Aprocrypha bute khu Pasian thu in ipom theisih ua, vangsiethuoitah in igam uah zong Aprocrypha dei-leh-deilouna ziehin hattuum tanpha ina kikkenlaw va-ia uhi.

## **6). Bible leh Hattuum:**

Bible leh Hattuum khu Pasian in Ama aw leh vanzat in amang zing a, tuazieh in ithugen leh silbawl zousie Bible toh kite/ki-et kah zel diing ahi. Isep-le-bawl zousie khu Bible toh kikal ahileh pomtheilou leh pomtahlou ahidiing hi. Mi khen khat in Bible khu Pasian thu ahi chizel kawm in Hattuum angaipoimaw zaw ua, Bible khu Hattuumte bawlkhieth ahi achi uhi. Hinanlezong abu bou khu Hattuum khut suoh ahi a, abu sung a thutah khu Hattuum phuttute leh Hattuumte sang a upa zaw hi. Alelamkhat ah mi khenkhatte’n Bible khu akoi sang seng ua, Hattuum khu bangma a ngailou pawl aumkia uhi. Bible khu Hattuumte vahna diing leh etkolna diing a gel ahizaw hi. Tuaziehin, Bible leh hattuum zong akikhenthei sih chi zong ithei ding uhi.

**Dohnate:**

- 1). Bible gentena hamzah tuomtuom bangte e?
- 2). Aprocrypha laibute bangza ahiei?
- 3). Bang dia Aprocrypha bute eiten ipom theilou uh e?
- 4). Bible leh hattuom kichimatnate gen in?

~~~~~

## Bung -6

### PASIAN LEH A MINTE

#### *Thuchiin diing:*

*“Mangpa na Pasian khu na lungsim zousie, na Hagau zousie, na hatna zousie toh na it ding ahi”. (Deut. 6:4).*

#### **1). Thumapui:**

Khristiante thugin ah khun, ‘Pa Pasian’ khu apoimaw pen ichi thei ding uhi. Bangkim bawlthei Pa Pasian Lei leh Van siemtu khu ka gingta’ chi khu Khristiante thugin pipen khat ahi. Tualeh, Pasian khu tahsa lam a diing in zong Pa aching hi. Leitung leh asung a um zousie siemtu, athuthu a umsahtu ahina in zong Pa aching hi. Tambang, a Pa hina dinmun lientah leh hoitah khu sakhuo dangte in a thei pha sih uhi.

Tualeh, Mangpa Jesu ngel in zong Pasian khu, ‘Ka Pa’ chi-a, ahat ziehin Pa ahina ithei chieng deudeu uhi. Leng leh vaihawmtu ahina mang tuomlou in, ‘Pa’ ahina khu Khristiante in ingai poimaw tahzet uhi. Tualeh, ‘Pa’ chi sang a umzie thuh zaw in Mangpa Jesu’n a Pa khu, ‘Abba’ chi’n ahan hi (Mak. 14:36). ‘Abba’ khu ‘Aramaic’ ham ahi a, kitanauna nai, kilungsietna leh kipawl na thuh tah a zah kammal ahi. Tualeh, Paul in ei gingtute’n Hagau Siengthou ziehin, Pasian khu ‘Abba’ (Ka Pa) chi in ihan thei giap uh chi in ang hil hi (Rom 8:15; Gal. 4:6).

**2). Tuin Thuhun Lui leh Thuhun Tha a Pasian minte (names)-igending uhi:**

**2.1). Thuhun Lui a Pasian minte:**

**2.1.i). EL:** chi leh Elohim ichi in Pasian khu ahah a, sil abawlthei a, zaudiing ahi chi a ensah hi.

**2.1.ii). ELYON:** chi khu in mizie loupitah, tungnung pen zatad diing leh biehd diing ahi chi a ensah kia hi.

**2.1.iii). ADONAI:** chi khu Mangpa chia lekhieh ahi hi. Mihing zousie neitu leh vaihawmtu ahidan a ensah hi.

**2.1. iv). SHADDAI or El –SHADDAI:** Tam in Pasian khu asilsiemte toh lawm bang a kijopna nei ahi chi a ensah hi.

**2.1.v). JEHOVAH (YAHVEH:** Tualeh, Pasian min Judate'n azatat mama uh khu Jehovah (Yahveh) ahi. Ang kipatna khu Exo. 3:14,15-ah alang hi. Pasian khu aum ngai a um zing leh Amite toh akijopna ah athuhun in asudanglam ngai sih a, athuchiem suhbukimna ah agin-um zing hi. 'Sepaite Mangpa' chi min khu apozing hi.

**2.2). Thuhun Tha a Pasian minte:**

Thuhun Tha a minte khu Thuhun Lui a umsa, Greek ham a zah ahi pen hi. Tam minte khu ataangpi in tamte ahi uhi.

**2.2.i). THEOS:** Tam min khu Pasian china ahi mai hi. Thuhun Tha a zah ahi taangpi hi. Akizahdan khu, 'Ka Pasian', 'na Pasian', 'i Pasian' chite a zah ahi uhi. Khrist ah khun, Pasian khu atate zousie Pa ahi. Tambang in, 'Israelte Pasian' chi khu Thuhun Lui ah atam mama hi.

**2.2.ii). KURIOS:** Tam khu Mangpa china ahi. Tam min Pasian min mai hilou in, Khrist min a diing in zong zah ahi. Silbangkim tung a vaihawmtu leh thu neitu ahi chi asulang hi.

**2.2.iii). PATER:** Tam min khu Thuhun Tha ah min tha bang in agen hi. Ahi'n tam khu a dih tahtah sih a, 'Pa' min khu Thuhun Lui a lahdoh in, Pasian in Israelte akizoppi tuom dan a ensah hi (Deut. 32:6; Isai 63:16). Thuhun Tha ah, Pasian khu mi zousie Pa bang in akilang hi. Achang chieng in, Pasian khu sil zousie siemtu bang in alang sah a, (IKor. 8:6; Eph. 3:14). Tualeh achang chiengma in zong, Pasian a min thum lah a khat 'Khrist Jesu Pa' bang in agen hi (Johan 14:11; 7:1).

### **3). Pasian hina (Attribute):**

Pasian khu aumdan mawngmawng ah sildang banga tawp hun neilou, lamdang theilou ahi. Tuaziehin, Pasian mizie/hinate khu lawm ni in akhen hi. Tamte khu:

#### **3.1). Apien phung a hina ikitanpi theiloute uh:**

3.1.i). Pasian khu Kumtawn/Taangtawn pa ahi. 3.1.ii). Pasian khu munchinteng a um ahi. 3.1.iii). Pasian khu bangkim thei ahi. 3.1.iv). Pasian khu bangkim bawlthei leh bangkim thei ahi. Tamte khu tawp hun neilou, lamdang theilou ahi. Midangte'n ineipi theilou uh leh ikitanpi theilou uh mizie/hinnate ahi.

#### **3.2). Ahoina ikitanpi theiloute uh:**

3.2.i). Apilna. 3.2.ii). ASienthoua. 3.2.iii). Adihna/dihtatna. 3.2.iv). Ahoinate. 3.v). A itna/lungsietna leh 3.2.vi). Aginuminate leh adangdangte ahi uhi. Tam atung a te khu Pasian leh Hagau Siengthou panpina toh eima'n zong ineithe uhi.

### **4). Pasian khat bou aum hi:**

Pasian khat bou aum a, Ama bou khu bieh diing ahi. Bible khu Pasian kipuonna bu ahi a, tam Bible sung ah, Pasian bangkim siemtu leh bangkim tung a vaihawmtu khu khat bou ahi chi alang chieng hi. Khristiante thugin ah, Pasian khu khat bou ahi thu imu uhi. Mangpa Jesu'n, 'Ka Pa, na pa, ka Pasian, na Pasian' (Johan 20:10) chi-a, agen in Ama gingtute a diing in, Pasian khat

bou inei uh chi atahlang hi. Khum Pasion lou ngal Pasion dang mawngmawng aum sih a, tua Pasion bou khu bie diing leh giin diing ahi (Deut. 6:4). Mangpa na Pasion khu na lungsim zousie, na hagau zousie, nahatna zousie toh na it diing ahi (Mat. 22:37).

Tualeh, Pasion khat bou aum hi chi thugin khu ei India gamte ah apoimaw dieh a, azieh pen Hindute leh sahkho dang bie-ten pasien tampitah anei un a bie uhi. Ahi'n, Israelte (eite)-Pasion vang khat bou ahia, 'Keima lou ngal Pasion dang aum a mah? Khat ma zong ka thei sih' (Isai 44:8). Jeremiah in, 'Nang Mangpa Pasion dihtah khu na hi, nang Pasion hing khu na hi a; kumtawn Lengpa khu nahi' (Jer. 10:10), ah chi hi.

#### **5). Pasion khu Hagau ahi:**

Pasion khu thu a hing um ahi. Mosi kung ah Pasion in, 'Aum pa ka hi ....' achi hi. Israel hah-le-suonte kung a khun, 'A um Pa in na kung uah mi ang sawl hi' achi hi (Exodus 3:14). Pasion bou in 'aum pa ka hi' achi thei giep hi. Bang chilai pou in, Pasion in umlou hun anei ngai sih hi. Ama-le-ama hing ummai ahi koima dang zieh a um zong ahi sih a, Ama-le-ama a um ahi mai hi.

Pasion khu Hagau ahi a, mu thei leh khoi thei ahi sih hi. Mun chin teng ah aum a, hagau dang zousie leh sildang zousie lah a pat lamdang leh tuom vilvel ahi. Tueleh, Hagau ahiziehin abieh diing dan zong khu Hagau leh thutah aphut hi. I hagau ngei un ibediing ua, tueleh thutah leh amizie leh adei dan toh kituoh in ibe diing uhi.

#### **6). Hagau dangte toh akibang sih hi:**

Pasion khu Hagau, kumtawn mi, hagau dang zousie tung a um, atung ua vaihawmtu leh thuneitu ahi. Bible-in, 'Aziehpen, Mangpa khu silbawlthei Pasion ahi. Pasiante tung a Lengpa khu' ahi achi hi (Sam 95:3). Tueleh hagau tampi um nanlezong, Pasion lou ngal giintah leh biehtah aum sih a; Pasion lou ngal khu Pasion a nei tah zong leitung ah aum sih hi.

### **7). Pasion khu athawn a petu ahi:**

Sakhuo dang betute khu, apasiente un abetute kung ah silpieh angen zing ua, silpieh tawi lou in abediing in apei/kuon ngai sih uhi. Ahi'n, ei Khristiante Pasion in hing sui in atapa ang le pieh hi. Silpieh tangtu hi sang in, apekhetu hi a utzaw hi. A sil pieh lien pen khu a Tapa neisun i Mangpa Jesu ang piehna ah akilang hi (Johan 3:16).

### **8). Pa Pasion khu suitu ahi:**

Sakhuo dangte leh Khristiante kibahlouna khu sahkhuo dang betute'n apasiente uh asui tho ua, Khristiante Pasion in vang amite ang le suizaw hi. Khrist khantanhoi lamdangna khu Pasion in amite asuina thu ahi. Mangpa Jesu'n gentena thu ni ang hil hi. Tuata khu belam mang leh makhai mang sui thute ahi uhi (Luk. 15:1-10). Pasion in migiloute khu agitlouna bang ua, thuh mai lou in ang sui in ang hundam zaw hi.

### **Dohnate:**

- 1). Khristiante thugin ah khu bang ding a Pasion apoimaw gen e?
- 2). 'Abba' bang ham a pat hing kilahdoh e?
- 3). Thuhun Lui a Pasion minte bangbang e?
- 4). Thuhun Tha a Pasion min Greek ham-ate hing gen in?
- 5). Pasion pienphung (Ahinate) i kitanpi theiloute gen in?
- 6). Bang diing a Pasion khat bou um thu India gam a poimaw dieh e?
- 7). Pasion hagau ahiziehin bang chi bang a bieh diing aphut ei?



## Bung -7

# PASIAN A MI THUMTE LEH A NNASEP DAN UH KILAH DAN

### *Thuchiin:*

*“Tuachia Jesu’n Baptisma atanzou in Tui sung pan in ang pawt a, khum in Van kihong in Pasian Hagau Vakhu bang a hing kum in atung ah atuong a, tuanah Van pan a aw khat in “Tam, ka Tapa, ka lungdamna mama khu ahi” (Mat. 3:16-17) achi hi.*

### **1). Thumapui:**

Trinity chi thu gin khu genchien leh theichien hamsa mama thugin poimaw tah khat ahi. Pasian ah mihing thum aum a, Pa, Tapa leh Hagau Siengthou ahi uhi. Amaute khu hina kibang, kumtawn/tangtawn a umzing khu ahi uhi. Hinanlezong, Pasian thumtah um china vang hizawlou in Pasian khat ah hina/mihing thum a um china ahizaw hi.

Tami thugin khu mihing hilchet phahlou sil ahi a, hilchet teitei sawm sang in Bible a imu bangbang a pom khu ahimai hi. Masanglai in mi khen khat in “Pasian khat bou ahi-a, achiil in Pa bang in ang kilang a, tuazou in Tapa bang in ang kilangkia a, tu-in, Hagau Siengthou bang in ang kilang hi’ achi uhi. Mi khen khatte’n, Pasian khu hun tuomtuom ah, hina tuomtuom nei a hing kilang/kilah bang in angai ua, tuakhu, i Bible uh zilsahna toh kituohlou ahi hi. Tam thugin khu Sebellia hing gendoh ahi a, tuazieh in tam thugin min khu ‘Sabellism’ akichi hi. Tam thugin/zilsahna khu achiillai in mitamtah in apom ua, ahivang in Thuhun

Tha zilsahna toh a kikal a, tuaziehin, Kumzabi thumna (3)-lai in, Hattuomte'n ana nuolta uhi. Ahin, eite lah ah zong tambang ngaidan pawmpawl aum uhi.

## **2). Bible a Trinity kilah dan:**

Tualeh, Genesis ah, Pasian in mihing asiem lai in (Grammar dihtah isui leh thuteng/kammal khu khat sang a tamzaw/plural)-azang a, “Eima lim-leh-mel sun in eima bang ngel in ... Lei ah thu ineisah diing uh” (Gen. 1:26) chi imu uhi. Tami khu Bible siemten Thuhun Lui a Pasian a mithumte (Trinity)-kilahna masa pen ahi achi uhi. Tuabanah, Thuhun Lui ah Pasian khu ami Israel tate kung ah Meikuong leh Meipi in akilah/lang hi (Exo. 19:17).

Tualeh, Thuhun Tha ah Pasian Tapa bang in ang kilah na thu isui ding uhi. Lei kisiem masang in Thu khu ana um ahitabout a, thukhu, Pasian toh umkhawm in Pasian bang in aum hi. Tua thu khu mihing a hing pieng in.... (Johan 1:1). Tueleh, Mangpa Jesun Baptisma atanlai in, Pa Pasian khu Van a kipat in ahing hamdoh a, Tapa Pasian in Tui in Baptisma atang a; Hagau Siengthou Pasian khu vakhu bang in Tapa Pasian tung ah ang tuong/tu hi (Mat. 3:12-17). Tamkhu, Pasian thum bang a ang kilahna ahi hi.

Tuabanah, Jesu'n, baptisma tansah diing dan ahilna ah – “Gam chin ah pei unlen mizousie ka nuazui in siem un; Pa, Tapa leh Hagau Siengthou min in baptisma bawl un” (Matt. 28:19) achi hi. Tueleh, Sawltah Paul in zong, “Mangpa itna, Pasian zangaina, Hagau Siengthou pawlna” (II Kor. 13:14)- chi'n agen hi.

## **3). I Bible ua Trinity nnasepdan khen khatte:**

**3.1). Silsiem a akilah dan uh:** - Pa Pasian in - “Vah hing umhen achi hi” (Gen. 1:3). - Tapa Pasian - “Achil in thu ana um a, thu khu mihing a hing pieng in” (Johan 1:1, 14), - Hagau Pasian - “Pasian Hagau khu Tui tung ah avah kawikawi a” (Gen. 1:2; Job 26: 12-13), ah imu uhi.

**3.2). Jesu pienna ah:** - Pa Pasian - Tapa khattang neisun petu (Johan 3:16), ahi. - Tapa Pasian - Leitung ah ahing pieng a (Luk 2:1). Tualeh, - Hagau Siengthou Pasian - Mary naupaisahtu (Luk 1), ahi hi.

**3.3). Hundamna nasepna ah:** - Pa Pasian - Tapa kipumpiehna pomtu (Heb. 9:14), ahi a, - Tapa Pasian - Amite a dia kipetu (Heb. 9:14), ahi. Tualeh, - Hagau siengthou Pasian - Tangtawn a diing a sudettu (Heb. 9:14), ahi.

**3.4). Thumna ah:** -

Pa Pasian - Thumna ngaikhetu ahi a (Johan (6:13), - Tapa Pasian - Ama min a thunget diing (Johan 16:23), ahi, tualeh, - Hagau siengthou Pasian - Lungsim heilamdangtu leh mite piengthasahtu (Johan 3:3-6), ahi hi.

**4). Dihpen chet sih leh zong etsahna chituomtuomte tungtawn in/zangin Trinity hina gen i sawm ding uhi:**

I gensa bangun, Pasian a mithumte tungtang mihingte pilna toh genchet leh sutthei tahtah ahisih hi. Ahivang in, Ama (Pasian) hina neukhat beh itheitheina diing un etsahna chituomtuomte toh igen ding uhi. Ahin, tamte in Trinity hinatah agenchieng thei hi china vang ahi sih hi. Tuate:

**4.i). Tui toh tekaah talei:**

Tui khu chithum in ahina muthei in aum hi. Etsahna ding in, tui khu Pasian hita leh (Tui=Pasian), Tuikhal/vua khu Tapa Pasian hita (Tuikhal=Tapa Pasian) leh, Tuihu ahileh Hagau Siengthou Pasian (Tuihu=Hagau Siengthou Pasian)-chite in, genta lei tui ah hina chithum kikhentheilou imuthei uhi. Khat hingal chithum a hina kilangthei china ahi.

**4.ii). Ni (Sun) toh tekah kiatalei:** Nisa (Sun) hina zong chithumin isuithei uhi. Nisa pen Pa Pa Pasian hita (Nisa= Pa Pasian)-leh, Nivah khu Ta Pasian hisahta leh (Nivah=Tapa Pasian), Nisatna/

lumna khu Hagau Siengthou Pasian (Nisatna/lumna=Hagau Siengthou Pasian)-chite in zong isuithei uhi.

#### **4.iii). Singkung toh tekah kiatalei:**

Sing zung khu Pa Pasian hita (Singzung=Pa Pasian) leh, Singkung khu Tapa Pasian (Singkung=Tapa Pasian) leh sing-ga khu Hagau Siengthou Pasian (Sing ga= Hagau Siengthou Pasian)-chite in igenthei ding uhi.

#### **4.iv). Mei (Fire) toh takah kialei:**

Mei khu Pa Pasian hita leh (Mei= Pa Pasian), Meikuong khu Tapa Pasian (Meikuong= Tapa Pasian), leh Meivah khu Hagau Siengthou Pasian (Meivah= Hagau Siengthou Pasian), chite-in zong itekahthei ding uhi. Tamnah, Mei in lumna ahisihleh satna leh vahna zong anei hi. Ahivang in athum un Mei ahi uhi. Etsahna tamtah gen diing umkha diing a, hinanlezong igen chieng theituom sih diing uhi. Tua igensate a kipat in Trinity umzie ithei belap uh ilam-en hi.

#### **5). Trinity tungtang a ikibahpiloute uh:**

I gensa bang in ei Presbyterian Hattuum in Pasian a mi thumte-Pa, Tapa leh Hagau Siengthou khu a um thu leh dinmun kibang nei ahi thu uh i pom uhi. Tam thugin a, i kibahpilou Hattuumte-United Pentecostal Church (UPC)-te in Pasian a mi thumte a pom sih ua, Pasian khu khat bou ahia, Thuhun Lui hun ah Pa bang in akilah a, Thuhun Tha hun ah Tapa in hing kilah in tualeh tuhun in, Hagau Siengthou bang in ang kilah hi chi in a pom uhi. Pa, Tapa leh Hagau Siengthou kichia atuom thum a umsih hi. Mangpa Jesu bou khu Pasian ahi achi uhi. Tualeh, 'Church of Jesus Christ' pawl in zong Pentecostal-te mabang in Pasian a mi thumte a pom sih uhi.

**Dohnate:**

- 1). Sabellia in Pasian a mihing thumte kilahdan bang chibang in agen ei?
- 2). Bible sung a Trinity kilahna masa pen bung leh tangte gen in?
- 3). Mangpa Jesun Jordan lui a baptisma atan lain Trinity (Pasian a mi thumte)-bang chi'n ang kilang uoi?
- 4). I Bible ua Trinity nnasepdan khen khatte bangbangte e?
- 5). Trinity gentena/etsahna ni hing gen in?
- 6). Trinity nasep dan silsiemte ah bangchibang in imu thei ei?
- 7). Mangpa Jesun anuazuite koi min a baptisma tangsah din asawl ei?
- 8). Trinity hina tuomtuomte hing genvawi.
- 9). Mi'n Trinity atheichet theilou zieh a, abuai leh bang achi diei?



## Bung – 8

# MIHING MIZIE LEH HINATE BIBLE IN AGENTE

### ***Thuchin ding:***

*“Khum in Mangpa Pasian in Leitang themkhat ala a, tuachi’n mihing asiem a, tuachieng in hintheina hu anahkuo ah a hakhum a, tuachi in mipa in hinna ang neita h” (Gen. 2:7).*

### **1). Thumapui:**

Mihingte khu eima-leh-eima, kittheichet ahasat mabang in, mihing khu bang ahiei? chi genchien hasatah ahi hi. Mihing hinna/hina khu pulam a langthei silte a pat in, i enchien/tekah/’theichien theibep ua, tuate khu hinna nei, sie-leh-pha thei, akhangzel, dihtatna neithe chite ahi hi.

Tualeh, bang ding a Pasian in mihing asiem e? Bible a kilahdan in akipawlp i diing a, adei zieh ahi thu imu uhi. Pasian in akipawlp i/lawm diing adei khu ama mizie bang puo, ama toh kipawl utna nei ahi diing hi. Tuabanah, Pasian ging in athu piehte sang diing in, azieh pen mihing hing kisiemsan pen khu tami ahi chi imu uhi (Thuhiltu 12:13).

**2). Tu in mihing khu bang hi mawngmawng e? chi ngaidan tuomtuomte igen diing uhi.**

### **2.i). Suichienmite (Scientists) Ngaidan in:**

Mihing khu gamsa bang a hing piengkhe leh kisiemkhe mai bangin agen uhi. Tuaziehin, mumal neilou leh ahinsung un zong mitphietkal sung bangmai a tom ahidan leh adinmun siet dan lam agen uong uhi.

## **2.ii). Hinkhosuttute (Humanists) Ngaidan in:**

Amute in mihing leh ahinate angaisang mama uhi. Mihing in pilna, silbawltheina anei a, ama kizilsiemna leh asilbawltheina in Leitung athazaw thei hi achi uhi.

## **2.iii). Communists Ngaidan in:**

Mihing damsan leh umna zieh u'khu ki-uhna/solkal hoi-le-dettah, umсах khu ahi achi uhi. Alom a umkhawm theina ki-vaihawmna hoi-leh-detdou neina/siemna diing in mimal chinteng in mawpuohna anei uh achi uhi.

## **2.iv). Evolutionists Ngaidan in:**

Mihing khu ganhing a pat a hing piengkhe ahi achi uhi. Mihing khu mawltah a kipan a awlawl a hing hoi deudeu a, hing khanglien zing leh hing pilsemsem bang in agen uhi.

## **2.v). Hindute Ngaidan in:**

Hindu (Hinduism)-te ngaidan ahikia leuleu leh silbangkim khu pasien ahi-a, mihing zong pasien neu khat ahi achi uhi. Tualeh, adamsung ua silhoi bawlte khu ashinua chieng un ang pieng kia ua, adamlai ua mihoite khu mi hoi leh thupi tahin ang pieng kia ua, ahin adamlai ua mi hoiloute khu ang pienkia chiengun Ui, Aah leh ganhing ahisih leh mihing a, apientah uleh zong mi zong leh gentheitah in ang pieng uh achi uhi.

## **2.vi). Islam (Muslim)-te Ngaidan in:**

Mihing khu Pasian (Allah) siem ahizieh in, Pasian thuthu a ummai diing a, deitelna leh zaleenna zong pieh/nei lou ahi achi uhi. Tami ngaidan khu ei Khristiante ngaidan toh akituoh sih hi.

## **2.vii). Greekte Ngaidan in:**

Mihing khu Pasian them (beh nengkhat) ahia, tahsa lam ah muolthei ahi, Hagau lam ah Pasian bang ahi achi uhi. Mihing tahsa khu hagau umna inn ahia, tahsa ashi chieng in Hagau zong azaleenta hi achi uhi.

Tambang in, Bible in mihing hina agente leh tam atung a igente uh akibang sih uhi. Tua zieh in Bible in mihing khu bang chibangin agen ei chi i en kia diing uhi.

### **3). Thuhun Lui in mihing hina agen dan khu:**

Mihing kisiemdan i Bible in mun ni (Gen. 1:26 leh 2:7)-ah agenlang chieng mama uhi. Mihingte khu Pasion bahpi a siem leh Pasion in ahu ahakhum zieh a hing piengkhe ahidan agen hi. Bangteng hilezong tam Bible bungte gel a pat in mihing khu: - Pasion kibahpi a siem ahiban ah, silsiemzousie tung a thunei diing leh Pasion toh kipawlkhawm diing a siem ahi chi alang chieng hi.

Tualeh, mihing Pasion bahna khu ahileh silsiem dang zousie khu Pasion in “Hing umta hen” achi a hing um ahi ua, ahinlah mihing khu asiem in lei a lei vuiin asiemzouin, anahkuo ah ama hu ahakhum a, tuachi’n mihing khu ang hingta hi chi imu uhi (Gen. 2:7). Tuabanah, Pasion in hinna hu ahalut khu i hagau uh ahi a, ashitheilou ahi. Tua hagau zieh in ngaituo theinate, sielehpha theina, deiteel theina leh adangdangte ineithe uhi.

### **4). Thuhun Tha in mihing hina azilsah dan:**

Thuhun Tha in Thuhun Lui sang in Pasion a ngaidan/koidan aloupizawh bang in mihing hina a ngaidan zong sangzaw in athupi zaw hi. Thuhun Lui ah, ahileh mihing khu ‘Pasion kibahpi a siem ahithu imu ua’ ahin, Thuhun Tha ah ahileh Jesu Khrist gingtate pen Pasion ‘Tapa/Tanute’ chi a hat ahitazaw uhi. Aziehpén, “Pasion tate hitheina thu apeta” hi (Johan. 1:12), achi hi. Hinan leh zong ‘Ta’ hina tangsa a pieng vang i hisih uhi. Mihing khu Pasion mitmu in amanpha mama mai a, tuami khu Jesu hing pienna leh shina in alangsakta hi.

Tualeh, Thuhun Tha ah mihing khu chi thum in agen hi. Tuate khu - Hagau, lungsim leh tahsate ahi uhi (I Thess.5: 23). Tahsa thu ah ngaidan thum aum hi. Greek-ten zong tahsa khu

hagau suongkul tanna ahisihleh suol/khelna khosahna mun bang in agen uhi. I Mangpa in zong tahsa lim-le-mel ang puohzieh in khelna kingahna bulpi in angaisih a, ahivang in khelna lutna bulpi in angai hi. Paul in zong mihing khu khelna vanzah bang in agen hi.

#### **4.1). Mihing hina Sawltah Paul zilsahna ah tambang in imu uhi.**

4.1.i). Tahsa khu Pasian a ahi (I Kor. 3:16). 4.1.ii). Tahsa khu khelna kipatna bul bang in angaisih a, khelna vanzah in pang thei hi achi hi (Rom. 8:12). 4.1.iii). Tahsa khu mihing chibah khat ahizieh in, Pasian in atanzouta hi (Rom 8:23). 4.1.iv). Lei tahsa a um bang in hagau tahsa zong aum hi. Muotthei a tu a um in muottheilou a kaithawkia ahi diing hi achi hi. 4.1.v). Muotthei tahsa khu Jesu ziehin suhging a kaithaw ahidiing hi (Rom. 8:11), chite ahi uhi.

#### **5). Mihing hina chi tuomtuomte leh manphatnate uh:**

Mihingte khu ama tang a hing theilou, panpitu ngaizing ahi uhi. Pasian sang a midang gintatzawh khu shina ahi hi (Lengte 8:46; Late 51:3; Rom 3:23). Tualeh, mihing ama deitelna ngel toh Pasian dan abotsie a, khelna leh gitlouna ah akibuollutta hi. Khelna a kipat hundam diing in Pasian in atapa neisun ang peta hi. Ama zieh in mihingin hinna inei theita uhi.

Tualeh, Pasian in Ama bang a angsiemte ihizieh un, Pasian masang ah mihingte i thupi/loupi mama uhi ( Luk 15:7, 10; Matt. 6:26)

#### **5.1). Tahsa leh Hagau thu:**

Bible in ang hildan tangpi khu mihing chi in tahsa leh hagau ahuohtel hi. (Gen. 2:7, Num. 16:22; Luk 2:26). Greek leh Hindu khen khat in tahsa leh Hagau khu agen tuom ua, akidou sah uhi. Ahinlah, Bible in gendang tuom selou in pumkhat ahina agen

uong hi. Tahsa leh Hagau chi in mihing pumpi ahuop a, hagau tellou in tahsa khu ashi ahi (Luk 2:26). Pasian in tahsa angaikhoh dan khu ama ngel khu tahsa nei in ang pieng a, damloute zong asudam a, gilkielte zong nehdiing ann apie a, tualeh mishite zong akaithou hi.

Tahsa leh hagau khu khentuom thei ahisih a, tuaziehin, Pasian in mihingte khu atahsa u'leh Hagau uh zong atan in ahundam hi. Thawkia hun ah tam lei tahsa abeidiing a, Hagau tahsa in ang hengta diing hi (Phil. 3:21).

### **5.2). Sienthoua:**

Sienthoua khu Pasian ibahna uh sil poimawtah khu ahi hi. Pasian toh ikijopna zieh ua i nei uh ahia, tuaziehin in suol/khelna a puana ziehin imansuota uhi. Ahivangin, Pasian toh ikijop chieng un inei theikia uhi.

### **5.3). Ngaituona lungsim:**

Tam ngaituothaina khu khelna/suolna a puana in asubeithei sih a, ahivang in, hoilou/dihlou lam ah apuimang zaw hi. I sie-le-pha theina khu zong asubuoizaw hi. Hagau nei a ngaituona lungsim nei zousie in sie-le-pha theina aneingal ua, tamkhu Pasian ibahna khat uh ahi. Tami zieh in, Pasian toh ikipawl thei un, i ut sih u'leh zong ikipawlpi utlou thei uhi. Ganhingte in vang Pasian anai theisih ua zong agamlat theituom sih uhi. Tuabanah, ganhingte in hagau zong a nei sih uhi.

### **6). Thukhumsiin:**

Mihing khu Pasian bang a siem ahiziehin in, mihing ahina zieh pen khu Pasian thei leh ama nnasem zing diing a siemte ihi uhi. Hunchin teng a, Ama bie in Ama toh kipawlna hinkhuo nei zing diing a siemte zong ihi uhi.

**Dohnate:**

- 1). Mihing hinna a pulam a kilangthei khu bangte e?
- 2). Suichienmite leh Humanists-te in mihing hinna khu bangtohbang hi achi uoi?
- 3). Evolutionist-te'n mihing hing piendan bangchibang hi achi uoi?
- 4). Mihing hinna toh kisai in Greekte'n bang ngaidan anei uoi?
- 5). Bible ah mihing kisiemdan mun bangza ah muthei in aum ei?
- 6). Pasian bahna chinite bangte e?
- 7). Thuhun Tha in mihingte hina bang chin agen ei?
- 8). Thuhun Tha ah mihingte chi bang zat in akikhen ei?
- 9). Sawltah Paul in bang chi bang in tahsa azil sah ei le?
- 10). Pasian in mihing asiem zieh hing gen in?

~~~~~

## Bung - 9

# MIHINGTE KHELNA A APUA THU

### ***Thuchin ding:***

*Tuaziehin mi khat ziehin leitung ah khelna a hing lut a, tualeh khelna ziehin shina a hing lut a, tualeh mi zousie ana kheltah ziehin, shina in mi zousie azelsuoh ta hi” (Rom.5:12).*

### **1). Thumapui:**

Khelna thu khu sil gen chieng hamsa leh theihapi khat ahi. Ahin, khelna khu Leitung ah a um ngei ahi chi pen eima mimal hinkhuo chiet leh imit u’leh ibil un nichin, hun chin in i mu un ithei leng uhi. Ei Khristiante mai hilou in, sahkho dang beten zong khelna kipat a hutkhietna thu ahagen mama uhi. Khelna hei a pat hing kipan e? akipatna hei sung e chi khu gendan tuomtuom aum a, tuate khu isui diing uhi.

Tualeh, mipilten khelna thu a ngaidan anei uh khu chini apha hi. Leitung/khawlvvel khu khelna mun ahi. Tualeh, khelna khu eima ngei in ibawl uh ahi. Anina pen khu Bible zilsahna toh akinaizaw deu hi. Tualeh, i Bible un khelna thu ang zilsah dante isuiding uhi:

### **2). Thuhun Lui in khelna azilsah dan:**

#### **2.1). Khelna khu dan bawsietna ahi:**

I Johan 3:4 ah, khelna khu dan bawsietna ahi thu imu uhi. Genesis bung thumna (3)-ah mihing masa pente (Adam& Evi)-te khu akhel thu uh imu ua, tuakhu Pasian dan bawsietna masa pen ahi. Azieh ahileh, nehlou diing, sie-le-pha theina singga kichi a neh

ua pat in mihing khu ama ut thu ngei in, Pasion dan abotseta chi thu imu uhi. Tualeh, Pasion in Adam leh Eviten Eden huon a pat a anawkhiehna a pat in Pasion toh akizopna uh khu asiettah ziehin Pasion lah ah ei mihingte khu tapa taimang bang ahita chi a ensah hi. Pasion dan siengthou khu mihing in azui ut sih a, abotsie a, Pasion a pat in ataimangta hi.

Thuhun Lui ah khun khelna in pualam sil akawh deu a, tuakhu vantang hindan leh sahkho lam hindang dan a, Pasion dan pieh zui lou leh bawlsietna ahi. Tualeh, Jawlneite leh mi khenkhatte ngaidan in Pasion puidan khu pulam sil mai hilou in, sunglam zong akhoi hi chi in agen uhi. Kithoina leh sillat maimai bou khu Pasion kipahna hinawnlou in, lungsimlam, thumanna leh lungsim kisiana khu aphut zaw hi (Isai. 1:10-20).

## **2.2). Khelna khu Pasion kunga helna ahi:**

Mihing in Pasion toh kipawlna a dan thute zui a, Pasion gingta a hin sang in Pasion dan zuilou a, ama dei dan a hin a, Pasion bang a um atel zaw hi. Tamna Pasion kung a ‘ahelnatah’ khu mihingte khelna bul khu ahi.

## **2.3). Khelna khu Pasion ginlelna ahi:**

Evi-in soltu (gul)-thu amanna zieh khu Pasion aginlel zieh ahi. Adam toh ahoina diing uh leh azalenna diing ua Pasion guot-sah khu aginglel ua, soltu thu amangta zaw uhi. Evi in Pasion aginlelna tah khu akhelna kipatna ahi.

## **3). Thuhun Tha zilsah dan:**

Thuhun Tha in khelna azilsah dan khu Pasion tung a khelna ahi achi hi. (Luk 15:18) “Kisia un” (Mark 1:15). Khelna in lungsim leh tupna ah zung anei a, asil bawl ah kilangkhie zing hi (Matt. 5:27). Johan gel sung ah khelna khu suoh hina ahi (Johan. 8:34). Khelna lienpen khu, Pasion tapa Jesu gintat utlouna ahi thu imu uhi (Johan 16:9). Laiyah lam ah khun, Pasion hing hatna bang a

chi zou louna leh lungsietna neilouna khu khelna ahi (I Johan 3:1-6), a chi hi. Danbawsietna zong ahi (I Johan 3:4), khelna ahithu leh adangdang tamtah gen ding aum ding hi.

Atangpiin, Bible in khelna azilsah tangpite igen nalai ding uhi. Khelna thu Bible bung khen khat a, agen dan itahlang diing uhi. “Hinanlehzong michin in sil abawl khiel sieng ua ....” (Sam 14:3). “Ka pien a pat gilou kana hi tabou a, ka pienkhiat a pat tawnkhiel ka nahi tabou hi” (Sam 51:5). Tualeh, khelna khu Pasian tung a gamtat khelna ahithu tapa taimangpa hinkhuo ah imu uhi. “Pa aw, Pasian leh nangma mitmu in ka natawnkhielta hi (Luk. 15:18). Tualeh, khelna khu eima-le-eima Pasian mai a khiel a kitheina ahi a, “Pasian aw, mikhiel ka hi ei khotuo in” (Luk. 18:13). Tuabanah, “Khelna khu dan bawlsietna ahi” (I Johan 3:4). Tam Bible tangte a kipatin khelna umzie khu bangtan ahiei ithei thei uhi.

#### **4). Mangpa Jesun khelna thu azilsah dan:**

Mangpa Jesu’n khel thu khu Thuhun Lui zilsahdan khu apom a, khelna hing kipatna bulpi khu mihingte lungsim sung ahi thu a uong gen mama hi. Khelna khu abawl a bawl mai ban ah lungsim a kipan ahidante azilsah a, Pasian gam deidan kaltu zousie khu khelna ahi achi hi. Tualeh, mizousie khelna nei ahi thu gen lang in, mizousie kisia diing in ahan hi. Mikhielte khu lawm in akineipina a, akhelna uh vang angainep maimai sih hi. Khelna khu mihing zouise hinna susetu ahi achi hi. Mi hoi pen zong khu michinglou ahi achi hi (Luk. 17:10). Khiel kisiata bou in Pasian itna atang diing uh achi hi (Luk.18:13). Khelna khawhdan azilsahna ah mihing tung a bawl dihlou khu Pasian tung a khelna ahi chi in azilsah hi.

Tualeh, thuohna leh vangsietna zousie khu khelna zieh ahikim sih chi in agen hi (Luk. 13:1-5). Tuabanah athu ngaikhetute khu akisia sih u’leh mangthai sieng diing uh chi in zong agen hi.

## **5). Sawltah Paul zilsah dan:**

Greek ham a khelna chi umzie khu “tupkhelna” china ahi. Pasal muichiemte’n achiemna uh akhahlouna uh bang deu in agen hi. Paul in khelna hing kipatna khu Adam a pat ahia, ama ah khun mizousie pumkhat ahi uhi. Tuazieh in, Adam khelna khu akitanpi ua, akiluo sawn uh achi hi. Rome bung 1&2 ah, Paul in, khelna in mizousie azelsuoh thu agen hi. Khelna in, Pasian leh mihingte kizopna asusie a, mihing-le-mihingte, kizopna zong asusie hi achi hi. Tuachi’n, mizousie khu Pasian lungthahna nuoi ah aumta uh zong achi hi.

Paul in khelna thu azilsahna tangpi i et chieng un khelna sang in Pasian itna/lungsietna khu athupi/loupi zaw a zong asangzaw chiin azilsah hi. Tualeh, Pasian tapa khu mikhielte a diing in, Leitung ah ahing pei a, mi khiel hi a kithei a, akung lam hing zuonte khu hundamna a pediing hi. I damsung un gingtu hizing kawm in khelna bawl a um zing lou ding uh ahi.

## **6). Khelna in mihingte asuhsiet dan:**

**6.1). Mihing khu siemlou tang ahita hi.** Khelna leh siemlou tanna khu akijop ahi. Siemloutang chi umzie khu, khelna bawltu gawt diing china ahia, akhelman khu amu diing hi. Khelman khu shina ahi chi in Bible in agen hi. Azieh pen Pasian dan siengthou khu min abawsiettah zieh in siemlou tang ahita uhi.

### **6.2). Khelman khu shina ahiziehin mizousie azelsuoh hi:**

Mikhat zieh in Leitung ah khelna ang umta a, tua khelna khu shina ahing hita hi. Mizousie khelna nei ahitah zieh un shina in michintung ah vai ahawmta hi (Rom 5:12). “Khelman khu shina ahi” (Rom 6:23). Michin atawnkhiel siengta ua Pasian hutdamna huong khu agamlatta uhi (Rom 3:23). Khelna zieh a mizousie tandiing khu tahsa-le-hagau shina ahi. Khelna in mizousie azelsuoh sieng chi khu Khristiante zilsahdan ahi. Khelna lah apua tah zieh in ama-leh-ama in sil-hoi abawl theitasih hi.

**Dohnate:**

- 1). Mipilten khelna angaidan uh chi nite hing gen in?
- 2). Hattuom masate'n khelna angaidan uh hing gen in?
- 3). Bible in khelna thu agendante hing gen in?
- 4). Khelna khu danbawsietna chi umzie hing gen in?
- 5). Khelna in mihingte asuhsietdan hing gen in?
- 6). Thuhun Lui in khelna khu bangchibang in azilsah ei?
- 7). Khantanhoy Johan in Khelna lien pen achi khu bang e?
- 8). Mangpa Jesu'n khelna azilsahdan hing gen in?
- 9). Sawltah Paul in khelna khu bangchibang in azilsah ei?
- 10). Khelna in mihingte tunga a nnasepdante bangbangte e?



## Bung –10

### JESU KHRIST MIZIE LEH HINATE

#### *Thuchin ding:*

*“A chilin thu a um a, thu khu Pasion kungah a um hi. Thu khu Pasion ahi” (Johan 1:1).*

#### **1). Thumapui**

I Mangpa Jesu khu Pasion Tapa ahiziehin, leitung kisiem masangte, akisiem laite in zong ana um zouta hi. Aman, Abraham um masangin zong ka umzouta achi hi. Bethlehem a mihing bang a ahingpien masang peh in, aum zou thu agen a, zong adih hi. Tuaziehin, Jesu khu Pasion mihingte kung a, ahing kipuonna leh kilahna pen ei Khristianten iginglel sih ua, tuanah sangin, i thugin uh kingahna khat zong ahi. Tualeh, i Mangpa Jesu Khrist hing kipuonna a kipatin Pasion theina dihtah, Pasion toh zong kizopna zong ihing neithe ban uah hundamna zong itangthei uhi.

Khantanhoi gieltu Johan in, “Atung in Thu aum a, Thu khu Pasion kung ah aum a, Thu khu Pasion ahi...tuakhu tahsa hing suoh in, ilah uah a teng ta...” (Johan 1:1-14), a chi hi. Johan, in Pasion khu Pasion ahina beituomlou in mihing ang suoh ahi achi hi. Aumdan tah khu Siemtu Pasion khu asilsiemte lah a khat hing suoh hi. Tualeh, Jesu khu leitung a, ang pienlain, za-ah-za (100%)- Pasion ahibanah, za-ah-za ma (100%)-mihing hinna anei hi.

## **2). Jesu Khrist min umzie leh hinate.**

Mangpa Jesu min leh ahinate khu gen seng ding ahisih a, a kul-leh-poimaw deute igen ding uhi.

### **2.i). Jesu:**

Tami khu Jesu min hina/thei dan langsung pen leh kizang tam pen ahi. Tami khu Habrai ham a, Joshua chi a kipat a Grik min Iesous chi ahi (Joshua 1:1; Zak. 3:1, Ezra 2:2). Tami umzie ahileh, ‘hundamtu’ china ahiei, ‘Pasian khu hundamtu’ chinate ahi. Vansawltah in Jesu pien ding thu ngahnu Mary ahil laiin, “Amin Jesu na phuoh ding hi. Aman amite akhelna ua kipat a hundam ding ziehin” achi hi (Mathiu 1:21). Tami min khu Thuhun Tha ah 905-vei akizang/kimu hi. Judate lah ah zong tami min puo zong bangzate khat aum uhi. Nasepte 13:6-ah, Bar Jesu kichi khat imu uhi. Tualeh, Kol. 4:11-ah, Jesu, Justa kichi min khat zong imu uhi.

### **2.ii). Khrist/Messia:**

Thuhun Tha a Khrist chi leh Thuhun Lui a Messia chite khu Jesu min ding in akizang uhi. Tualeh, Khrist khu Grik ham ahia, Messia ahileh Hebrai ham ahi. Ahin, anigel in aumzie a kibang ua, ‘sathaunu’ amah ‘sathaununa’ chinate ahi. Thuhun Lui ah lengte, siempute khu sathau ana kinu uhi (Exo.29:7; Lev. 4:3; I Samuel 9:16;10:1; II Samuel 19:10). Tualeh, sathaunu khu Pasian Hagau thawpna etsahna bang in zong angai uhi. Khrist/Messia khu leitung hundam ding a, Pasian sathaunu leh hundamna nnasem ding a mawpuohna pieh a um ahina genna zong ahi. Mangpa Jesu hinkhuo ah Hagau Siengthouin a gaisah ahina khu baptisma atanlai a sil tungte ah akilang hi.

### **2.iii). Pasian Tapa:**

Tami min zong Mangpa Jesu minte lah a langsung pawl ahi. Jesu hunlaiin, ‘Pasian Tapa’ chi khu midang min dingin zong akizang tam hi. Jesu Pasian Tapa kichina zieh ahileh, Aman Pasian khu ‘Ka Pa’ achizieh leh Pasian Tapa ahidan asuhlat zing ziehin ahi

(Mak. 12:16; 14:62). Jesu khu Pasian Tapa ahidan anuazuite mai hilouin, gam vaihawmte leh Rome galkapten zong a gen zing uhi.

#### **2.iv). Mihing Tapa:**

Mihing Tapa chi min khu ‘Pasian Tapa’ chi toh zong akibang hi. Tami min khu Khrist min ding a kizahna masa pen khu Daniel 7:13- a kipan ahi. Nidanglai a Bible gam mite in mi silbawltheite, van lam toh zong kijopna nei a, atheite uh min ding in anamang zing uhi. Thuhun Lui ah Mihing Tapa chi min khu Ezekiel bute, Daniel bute, Late (Sam)-bute leh Number bute ah zong imu uhi. Ezekiel bu ah ama kigenna in amang a (Eze. 2:1), Daniel bu ah leitung huntawp a Pasian gam tungding ding min a zong zah ahi (Daniel 7:13-14).

Tualeh, Mihing Tapa chi khu Thuhun Tha ah sawmgiet (80)-vei a kijang in akimu hi. Mangpa Jesun zong tami min khu Ama kigenna in zong ajang mun mama hi. Amakhu mihing bukim ahina suhlatna a kizang ahi.

#### **2.v). Mangpa:**

Mangpa chi hamkam khu Thuhun Tha bu Grik ham a kigiel in Kurious chi ahi. Tami khu Hebrai a Pasian min YHWH chi a zong kibang a zah ahi. Aumzie dihtah ahileh Pasian hatna min in akizang tangpi pen hi. Tueleh, Mangpa chi khu zatatna kam teng ahideu a, “ Sir or Madam” china ahiban ah, neitu leh thuneitu hina in zong akijang hi. Tueleh, tami min khu Jesu a ginna uh puonkhiehnate, Pasian ahundampa uh ahina pawmna kam malte in zong anamang leng uhi.

#### **3). Ama khu khelna neilou mi bukim ahi.**

Jesu’n khelna/gitlouna gui Adam a pat a hing kipan pen anei kha sih hi. Azieh pen, Hagau Siengthou a piensah ahizieh/man in (Luk 1:35). Agalte/melmate nangawnin zong akhelna ding amuzou sih uhi (Johan 8:46). A Pa thupiehte azui/kepbit gige ziehin (Johan

15:10), Setan in Ama tung ah thuneina anei sih hi (Johan 14:30). Aman “Kei leh ka Pa khat ka hi uh” achi hi (Johan 10:30). Belam nou dembei bang in, Khrist khu eite khelna tatna kithoina hiding in, khelna neilou ahi akul hi (1 Peter 1:19). Paul gen bang in: “Ama ah Pasion dihtatna i hitheina dingin, khelna mawngmawng theilou Amakhu Pasionin eite ziehin mikhel in abawlta hi” (2 Korinth 5:21), achi hi.

#### **4). Khrist mihina/nungchangte:**

Mangpa Jesu mihinate (nungchang)-te khu eite a ding a zilding a kul-le-poimawte igen ding uhi. Tuate:

##### **4.i). Mangpa Jesu khu asiengthou ahi.**

Tami thupi khu Jesun khelna leh gitlouna aneishih ichi un ahuop sieng thei hi. Igensa bangin ang pien in zong ngahnu siengthou (Mary)- tungtawn in ang pieng a, ei mihingte khelna gui a pieng ihi uh toh akibang sih hi. Leitung a alensungin zong khelna kichi mawngmawng a bawlka sih a, zong atheikha sih hi. Nasepte 3:14-ah, Peter in Jesu khu mi siengthou leh dihtah chiin agen a, agen dihi.

##### **4.ii). Jesu Khrist khu ittu/lungsiettu ahi.**

Mangpa Jesu leh Pasion khenthehi ahisih uhi. Pasion in mihingte a itna khu Johan 3:16-ah i mu uhi. Tualeh, Jesu zong “Min alawm a ding a, ahinna apiehval a itna aum sih zong achi hi. Mangpa Jesu hing itna khu eite tan ding a, Bethlehem bawngbuh a ang piennate, genthei taha Khross a ashinate ah ang kilangsah hi.

##### **4.iii). Mangpa Jesu khu mi lainatna nei zong ahi.**

Atung a igen bang deuin, Mangpa Jesu khu lainatna nei mi ahi. I Bible sung pumpi ua tangtawm pen, “Jesu akapta” (Johan 11:35), chi zong Mangpa Jesu lainatna leh itna nei mi ahina suhlatna ahi. Ama Leitung a, alenlaiin, mite hagau maimai ngaina leh buoipi louin atahsa tungua, natnate, nelou leh dawnlou a umte zong

alainat in damloute sudam in, gilkielte nehding annte apie a, phahte damsahin tahsa-leh-hagau a akhantouna ding un sil tamtah abawlpieh hi.

#### **4.iv). Jesu khu thum mi ahi.**

Khantanhoi buli (4)-te ah khu hundampa thum mi ahidan leh athumdante imuthei uhi. Aman zankhawvah in a Pa kung a athumthute zong imu uhi (Mak.1:35). Jesun, silthupitahtahte abawl masangin thumnate aneimasa zing hi (Luk. 3:21; Johan. 6:15). Pasian Tapa bawn tambang a, athum leh ei anua zuiten bangzata a, ithum ding uh atai le chi ang ngaituo sah hi.

#### **4.v). Mangpa Jesu khu kingai ngiem leh thunuoiluttah ahi.**

Mangpa Jesu khu thunuoilut mi ahidan Matt.11:24-ah, imu uhi. Akingaingiemna zieh khu Ama ding hilouin Pa loupina dingin ahizaw hi (Johan 8:50). Mangpa Jesu kingai ngiem dan khu Phillippi 2:5-7, ah chientahin imu uhi. Amakhu Pasian toh dinmun kibang a um, asun azan a Vansawltah/Angelten siengthou siengthou chi a, apahtoï chimtheiloupa uh khu, suohbangin ang pieng/um a, Khross ah shina ahingthuoh hi. Tamte a kipatin Mangpa Jesu kingai ngiem dan leh thunuoilut dante imuthei uhi. Tamte khu ei anuazuiten zong i ettawn un zong izui ding uhi.

#### **Dohnate:**

- 1). Mangpa Jesu khu bang chilai a na um zou e?
- 2). Jesu chi hing kipatna hamteng khu bang e? Bang china e?
- 3). Khrist leh Messia bang china e?
- 4). Jesu khu pienpi khelna neilou ahidan gen in?
- 5). Mangpa Jesu mihinna (nungchang)te bangbangte e?

~~~~~

## Bung-11

# JESUN TATNA NNA ASEPNA, A SHINA LEH A THAWKIANA THU

### ***Thuchin ding:***

*“Khrist khu eite sih leh tanga sapsiet a hing um in, dan sapsietna a kipatin ahing tandoh ta hi; aziehpén “Tambangin a kigiel hi, Singdawn a khailup pouma sapsietna thuoh ahi uhi.” (Galatia 3:13).*

### **1). Thumapui:**

Tatna thu khu hundamna thugin a diing a sil poimaw tah ahi. Bible in tatna umshtu khu Pasion ahiban ah, Ama lunglam ahi thu zong ang hil hi (Isai 53:10; Luk 2:14; Eph. 1:6-9; Kol. 1:19-20). Tuaguoh hilou in, Pasion midih in mikhiel leh giloute tung ah tangtawn shina leh gawtna atun diing khu ana puong kheta hi (Gen. 3:3; Rom. 6:23).

Tualeh, tatna in atup pen khu mikhielte Pasion lam a hip a, alungsim uh kisia diing a suhal a, tuazou chieng a Pasion kunglam a puihuoi ahi. Mi khat in midang khat tung ah sil bawlkhiel khataleh kilepna siem akiphamaw hi.

### **2). KHRIST Zieh A TATNA:**

**2.1). Khrist shina:** Khrist shina igen chieng un atahsa shina khu ilungsim un ingaituolou theisih uhi. Jesu khu asilbawl khel zieh a shi ahi sih a, eite tanding a hing pei ahibangin, vaihawmna in dihlou tah a siemmaw atansah zieh ua shi ahizaw hi. Amakhu, Jawlnei Isai 53:12-in, agen bang in “Migilou leh dan bawtsetu

bang a ngaw ahizaw” hi. Tualeh, Romte dan in singlamte (Khross) a kilbet a shite khu migilou tawpkhawhte shina ahi. Jesu khu eite a diing in hamsietin aum a, i khelnate uh Khross ah apawta hi (Gal. 3:13). Tambang a ashina khu tomkimin, genta lei tatna nna asejna ahi.

## **2.2). Migiloute sih-le-tang a tatna ahi:**

Pasian in mikhielte tatna diing in khelna neilou misiengthou kul-le-poimaw asa hi. Ahivangin, khum bang dinmun a ding thei diing mihing koima aum sih hi. Migilou dinmun a ding diing in Pasian in a Tapa tangkhat neisun hing pekheta hi. Tuachi in, Khrist khu migiloute sih-le-tang in hing kipie in, i khelna zousie uh apuo a, dan in aphut zousie a zou bukim a, tuachi’n, mihingte diing in tatna nna asemzouta hi. Pasian midih leh lungsietna neipa in mihingte a diing in, tatna Ama Tapa in ang siem a, ang kileppita hi. Tualeh, Thuhun Lui kithoinate in Khrist tatna nnasep a ensah hi (Luk. 1:4; 4:20,31,35; 5:10,16; 6: 17:11). I khelnate u’khu Khrist tung ah ngah ahi thu zong ang hil hi (Isai 53:6). Tualeh, i khelnate apuo a (Johan. 1:28; Heb. 9:28), tuachin, migiloute diing in ahinna apie hi (Mak. 10:45, Gal. 1:4; I Peter 3:18).

### **2.2.i). Khiei kithoina diing in a shi hi:**

Khrist khu migiloute’n (Rome galkap)-ten apongtha uh himawh lou hi. Pilat in ‘agitlouna mawngmawng ka mu sih hi’ achipa khu Khrist ahi. Ahivang in, mihingte khelna zieh in a shi ahi zaw hi (Rom 4:24). Asisan manphatah zong khel ngaidamna diing in aluong hi (Matt. 26:28). Khrist ah khun gitlouna leh hoilouna malmal a um sih hi. Israelte’n, kithoina anei chieng un belam tal, kel tal achidam, melsietna bei leh pienphate azah vateh bangun, Khrist zong khu tahsa hagau a demna diing mawng mawng aum sih hi (Luk. 1:10; I Sam. 7:9). I Mangpa Jesu zong tam bang a bukim khu mikhielte a diing in Singlamte (Khross)-ah, ang shita hi. Migiloute zieh in gawtna leh shina atuoh law hi. Tam khu, itna/lungsietna zieh a nnasep ahizaw hi. Amakhu, i khelnate uh thoina diing in singlamte ah ang kikhai lum in ang shita hi.

Khrist khu bangteng huom in hing kipe nanlezong eite'n ipomlou ua igintat utsih u'leh a shina leh ang tatna khu amawhna asuoh diing hi. Tuazieh in, imawpuohna uh khu ama napom a, alungsietna silpieh khu ginna toh isan diing uh ahi. Tualeh, ang kipiehna khu eima hinna ah umzie leh ga asuo thei giep diing hi (Johan. 1:12; Eph. 2:8).

**2.2.ii). Tatna letdan leh huopzou dan:**Unau Roman Catholichte, Lutheran leh Arminiante hilchetdan in, Khrist tatna in Leitung pumpi a huopsah uhi. Ahinlah, tami in mizousie hundam ahidiing uh china hilou in, koima khen tuom-paituom neilou in ahuopsah sieng uhi. Mizousie, hundamna diing in Khrist in athuoh a, zong ang shi hi chi bou agen ut ahi. Mimal chin tung a tam tatna abukim theina diing in, mimal chin in ei a ding a kipom a kisan apawi maw hi. Atatna bukimna khu mimal deitelna ah akinga hi. Khrist in Amau adia hundamna asiemsah mai hilou in, Ama ua diing in atawptanin a kipumpiehta hi (Luk. 15:10; Rom 5:10; II Kor. 5:21; Gal. 1:4; Eph. 1:7). Khrist in mihingte adi a, ahinna apie hi chi Bible in agen hi (Matt.1:21), abelamte a diing in (John. 10:11, 15),

Hattuomte a diing in (Nasepte 20:28, Eph. 5:25,27)-teelte a diing in (Johan. 1:29; I Johan 2:2), mizousie a diing in (I Tim. 2:6; Tita 2:11; Heb. 2:9)-a shi hi. Tami in Leitung a nam chinteng lah a mi chinteng, pawlchinteng a diing in ashi ahi chi agen chieng mama hi. Ahin, i thei ding ua poimaw ahileh Jesu in letung a mihingte a dingin tatna nna sem zou nan leh zong agingtate a ding in hundamna ahigiep ding hi. Azieh ahileh, Amakhu mizousie hundampa ahi a, ahin a gingtate hundampa ahi sese hi.

### **3). Khrist kivuina:**

Khrist shina khu athuohna nukhia pen bang in alang hi. Singlamte tung ah “Zaw ahita” chi in akikou hi. Jesu hansung a aum khu ama suhmuolphouna khat ahia, tuami zieh in eite a diing in hankhuh zauhuoina khu ang lahmangsakta hi.

#### **4). Mishi khuo ah Khrist avahaw/pei hi.**

I thugin ah “Mishi khuo ah avapei a” hilchetndan chi tuomtuom a hilchet in a um hi. Roman Catholic-tein, ‘Jesu Khrist khu Thuhun Lui a shisa misiengthoute kikhumkhawmna ah vahaw diing in ava pei hi’ achi uhi. Lutherante gindan in ‘Shina leh thawkiana kikal a mishite khuo ah thuhil diing leh zawna thuneina puongzah diing a vapei ahi’ a chikia leuleu uhi. Mishikhuo ah vapei chi in agenlah ut pen ahileh:- Getsemani huon leh Khross ah Jesu Khrist in gawtmun natna athuoh hi. Shina leh suhmuolphouna tawpkhoh athuoh hi (Late 16:8-10; Ephe. 4:9)-chite ahi hi.

#### **5). Khrist thoukiana:**

Khristian sakhuo khu sahkhuo dangte sang a atungnun zawhna khu amukhetu Jesu Khrist shina a kipat a, athawkiana leh van a, akatouna khu ahi hi. Leitung a sahkhuo na phutkhetute Khrist Jesu chilou tunitan in koima shina a kipat thoukia chi um khanailou hi. Khrist in shina khu athawkiana toh anuoisie/zouta hi. Jesu Khrist thawkiana lamdanna tungtuong ahileh tahsa-le- hagau toh athoukia hi (I Kor. 15:44-45). Tuaziehin, mishite thawkiana makaitu zong ahi (Kol. 1:18; Kihilna 1:5). Khrist thawkiana toh kisai silpoimaw thumte:

5.i). Khrist in dan in aphut zousie asuibukimta chi Pasian in apuonna ahi (Phil. 2:9). 5.ii). Siemtansahna, pienthana leh gingtute thawkiana ahi (Rom. 6:4-9; I Kor. 6:14; 15:20-22). 5.iii). Eite siemtanna, pienthana leh thawkiana makaitu leh umsahtu ahi (Rom. 4:25; Eph. 1:20).

#### **6). Khrist Van ah katou:**

Khrist Van a, akatouna khu thawkiana subukimtu ahi. Tuakhu, Khrist khu Siempi Mangpen hina toh Pasian kung, mun siengthou pen ah alut hi (Rom 8:34; Heb. 4:14; 6:20; 9:24). Ei a diing a munsiem diing in avapei a (Johan. 14:1-3), Ama toh kibang in Van ah eite ang koita hi. Van a Khrist katouna in eite’n zong Van ah Ama kung ah mun tang diing ihidan uh a ensah hi.

### **7). Khrist Pasion zietlam ah:**

Khrist khu Van a katou in, Pasion zietlam ah tousah ahita hi (Eph. 1:20; Heb. 10:12; I Pet. 3:22). Pasion zietlam chi umzie ahileh silbawlttheina leh loupina a ensah hi. Pasion zietlam a toukhawm in ahattuomte vai ahawmsah a, akembit a, leitung a opkhum a, mihingte a diing in athumsah zing hi.

### **8). Khrist hing peikia diing:**

Khrist khu mihing leh mishite vaihawmsah diing in ahing peikia diing hi. Amakhu, muthei tahsa ngei in ahing peikia diing hi (Nasepte 1:11; Kihil. 1:7). Vaihawm diing in ang peikia diing hi (Johan. 5:22,27; Nasepte.10:42; Rom.2:16; II Kor. 5:10; IITim.4:1). Hinanlezong, Ama hing peikia hun diing koiman atheisih hi. Leitung vaihawmsah diing leh a mite hundam bukimsah diing a hing pei diing ahi.

### **Dohnate:**

- 1). Tatna umsahtu koi e?
- 2). Jesu migiloute sih-le-tang a kipiehndan hing gen in?
- 3). Tatna sem dia kipie koi e?
- 4). Jesu Khrist khel kithoina dia a shidan hing hil in?
- 5). Roman Catholic leh Lutherante in tatna bangtan ahuopsah uoi?
- 6). 'Ngahnu siengthou hinkhiet' chi hilchien in?.
- 7). Jesu hansung a, a umna in bang a ensah ei?
- 8). 'Mishi khuo ah vapei' chi in atahlat utpen bang e?
- 9). Khrist thawkiana poimawna bang e?
- 10). 'Pasion zietlam a tou' chi umzie hilchien in?.
- 11). Jesu Khrist bang bawl diing a Leitung a hing peikia diing e?

~~~~~

## Bung – 12

### HUNDAMNA THU

#### ***Thuchin ding:***

*“Aziehpén Aman, “Hun kipah um ah ka hing ngaikhie a, Hundamna ni ah ka panpi hi,” a chi hi. Ngaiun, tuhun kipah um ahia ,Ngaiun, tu hundamna ni ahi” (2 Kor. 6: 2).*

#### **1). Thumapui:**

Hundamna thu khu Khrist thugin poimaw pen leh kingahna i chi thei hi. Mangpa Jesu pienlai in Vansawlsiengete’n belampute kung ah “mizousie a diing in Khantanhoi kipah um ava tut uh khu hundamna thu” ahi. Hundamna khu, Pasion itna/lungsietna nnasep ahia, mihing nnasepna pangloukei ahi chilei ichikhiel sih diing hi. Ahivang in hundam ihi theina diing in mihingte’n ibawl diing uh bang tan ahiei khatvang aum hi.

#### **2). Hundamna bul:**

Bible zilsahna, ithugin ngana (5)-in agen bang in hundamna bul khu Pasion itna/lungsietna ahi. Tangtawn a mangthang diingte khu Pasion in alungsiet a, ahivang in mihingte’n hundam ngai ahilam nasan uh kitheilou in leh hing hundam in chia ngetna dan zong theisih nan uleh zong, Pasion in mihingte alungsietna zieh in hundamna abawlsahta hi. Tami khu igensa bang un, mihingte’n Pasion kung a, anget zieh u’leh thum hat zieh uh hilou in, Pasion in mihingte alungsiet zieh a amanbei a, apieh ahibou hi (Isai 48:11).

Tualeh, khum hundamna loupitah sem diing in, Pasian in a Tapa tangkhat neisun khu shi diing in ang pekheta hi. Tami khu Pasian itna/lungsietna kilahna sang pen ahia, mutheilou leh pomloute diing in hundamna din lampi dang aum nawn sih hi. Tuazieh in, hundamna thu khu poimawitah leh i Bible tup-le-ngim pen zong ahi i chi thei uhi. Thuhun Lui hun in hundamna in tahsa hundamna lam akoh deu a, Thuhun Tha hun ah vang, tahsa-le-hagau hundamna bukim khu atup-le-ngim ahideu pen hi. Tualeh, mihingte hinna khu hundamna panglou in shina, mielna leh lam-etna mawng mawng umlouna hinkhuo ahi.

### **3). Hundamtu:**

Mihingte hundamna chi umzie khu manthaina lah a kipat a hundam himailou in asang leh thuhzaw a mangthaisahpa khu in akhelna ua kipat a ahundamna khu ahi. Tambang, hundamna nnasem thei diing khu Pasian in Lei leh Van ah zong khat bou anei a, tuakhu a Tapa Jesu ahi. Tualeh, a Tapa a diing in tam hundamna nnasep diing dan khu sil awlsam ahisih a, mihing bang in ang pieng a, ahivang in khelna neilou ahi. Mi khielte a diing in Khross ah ashi a, ashina khu Pasian Siengthou toh mihingte kizopmat kiana ang hita hi.

Shina zou in athoukia a, tuachi'n anuazuite ngei zong khu shina in azounawn sih diing uhi. Tuami mai hilou in, ahagau tungtawn in ama uah atengden a, aumpi zing hi. Nitawpni chieng in amite hundamna bukimsah diing in leh Leitung a vaihawm diing in ang peikia diing hi. Tuazieh in, hundamna bulpi khu Pasian lungsietna ahia, asubukimtu khu Mangpa Jesu ahi. Abul a pat Pasian lungsietna ah akinga a, mihing nnasepna panglou in ginna tungtawn in hundamna i tang ding uhi.

#### **4). TU IN HUNDAMNA SAWNGTHUMTE IGEN DIING UHI:**

##### **4.i). Tu-le-tu a Hundamna:**

Jesu'n "Na gintatleh Pasian loupina na mu diing kang chi hilou i?" (Johan.11:40) achi hi. Paul in "Tu khu hundamna ni ahi," (II Kor. 6:2)-chin agen imu uhi. Tamte a pat in hundamna khu tu-le-tu dinmun leh leitung idam sung ngei ua tanding leh nei diing ahi thu imu uhi. Tu idamsung ngei a hundamna itan sihleh shinua chieng in tan thei ahinawnsih diing hi chi ang theisah hi.

##### **4.ii). Dachiang a tanding hundamna:**

Tam khu Ni nukhia chieng a, siltung diing ahi. Mangpa Jesu Khrist khu vaihawm diing in leitung ah ang pei diing a, mihingte amasang ah ading ding ua, mizousie amau silbawl bang zel ua vaihawmsah in aum diing uhi. Tami ahileh hundam tate toh kisai a dachiang a siltung diing khu ahi. Tam vaihawmna ah khu eima siemtanna thu genthei ahisih diing a, damsung a hinkhozahdan, Khrist a diing in athuoh ngap nai? chite doh ihidiing uhi. "Atawp dong a thuohngapte khu hundam in aum diing uhi" (Matt. 10:22), in chi hi.

##### **4.iii). Hundamna bukim:**

Hundamna bukim khu'n i hagau a ding ahisih leh itahsa maimai hundamna a ngaithei ahi a, ahivang in Jesu hundamna in tahsale-hagau hundamna ahuop hi. Tuazieh in, hundamna bukim khu: Tangtawn shina kipat a hagau hundamna ahi. Nichin neh-le-dawn a pat hundamna zong ahi. Sawlna lah a kipatsa hundamna ahia, gentheina leh zawlna a kipatsa hundamna ahi. Natna leh damtheilouna kipat a hundamna ahi a, migilou leh khelna lah a kipat a hundamna ahi. Gal-le-sa, kiletsahna, lungthahna a kipat hundamna leh adangdangte ahuop hi. Tuazieh in hundamna thu igen chieng un i hagau uh shinua chieng a Vangam lutna diing mai hilou in, tam Leitung idamsung ngel ua, hundamna bukim itan diing uh ahidan imu thei uhi. Mihingte khu khelna chinteng

lah a hundam ngai ihi ua, tua hundamna khu tangtawn a diing ahi.  
Hundamna khu tulaitah, dachieng leh nichin hinkhuo a tan diing  
ahi thu imu ua hing kilang bang a hinna nei diing in a sem hi.

**Dohnate:**

- 1). Hundamna bul leh hundamna nnasemtu koi e?
- 2). Hundamna sawngthumte hing gen in?
- 3). Hundamna bukim in bangteng ahuop ei?

~~~~~

## Bumg-13

# HAGAU SIENGTHOU HINA LEH THUGIN IN AGENDAN

### ***Thuchiin ding:***

*“Tuachieng in Hagau gate ahileh: Ki-itna, kipahna, kilemna, thuohhatna, Zaineemna, hoina, gin-umna, nunnemna leh kidehtheina bang ahi, tamte chiloungal danthupieh dang aum sih” hi (Gal. 5:22-23).*

### **1). Thumapui:**

Hagau Siengthou hina leh nnasep dan khu Hattuom dinchil a pat, tuni dawng in mite kinielna leh ngaidan kibahlouna khat ahi. Tualeh, adiehin milimte ngaidan leh adangte ngaidante ah kibahlouna aum dieh hi. Tuaziehin, sil thei siem hakhat ahi chi lei ichi khiel sih ding uhi. Thuhun Lui ah Hagau Siengthou chi khu sawmgiet-le-giet (88)-vei akimu hi. Thuhun Tha in Hagau Siengthou achi leh Thuhun Lui a Pasian Hagau amaw, Mangpa Hagau chi a gente khu akibang ahi uhi.

### **2). Bible in Hagau Siengthou hina agente isui diing uhi:**

#### **2.1). Thuhun Lui hun a annasepdan:**

##### **2.1.i). Pasian Hagau leh Leitung kichimatna:**

Gen. 1:2 ah khu, ‘Pasian Hagau khu Tui tung ah avah kawikawi a’, chi imu uhi. Tualeh, Job. 32:8 ah, “Pasian Hagau khu mite tung ah hing teng in pilna apie” chite zong imu uhi. (Sam 104:30), ah ‘Mangpa Hagau in mihing leh leitungte khu asiem’ chi imu

uhi (Ezekiel 37:9)- ah Mangpa hu (Hagau)- in mihingte asuhlat thu zong imu uhi. (Deut. 34:9)-ah, Nun tapa Joshua khu Mangpa Hagau in pilna apie chi zong imu uhi. Mangpa Hagau in asil siemte, leitung/khawvel leh mihingte a enkawi in kizopna hoitah aneipi zing chi imu uhi.

### **2.1.ii). Mihingte hutkhietna ah zong naa asem hi:**

Galte lah a, ami Israelte hutkhiehna diing in hatna petu ahi. Samson tungte, Leng Saul tung te, Mosi tungte ah imu uhi (Thupilte 14:19; I Sam. 11:6; Num. 11:17-25). Tualeh, Jawlneite suhal in thu gen diing in apawl hal a, zong asuhangsan hi. Tualeh, Isai 61:1 ah in, “Gentheite kung a khantan hoi gen diing in ei teel in ei sawl a” chi thu imu uhi. Tuabanah, Eze. 2:2- ah, Mangpa Hagau in Ezekiel khu aumpi chi imu uhi. Israelte suoh-le-sal a pat a hutkhietna diing a hatna petu zong ahi (Isai 11:2). Thuhun Lui hun in Hagau Siengthou in mite aumpi a, ahivang in mite’n gitlouna leh Pasian deiloulam asep chieng un apeimangsan zelzel hi.

### **2.1.iii). Mituom bang a gen ahi-a, ahi’n Pasian toh kijopna nei ahi:**

Mituom bang a gen ahia, mihing mimal toh kijopnanei ahi. Tualeh, Messiah kung a haatna leh silbawltheina petu bang in agen hi. (Isai 11:2-5; 53: 10,11; Eze. 36:20; 37:14; Joel 2:28-32).

## **3.2). Thuhun Tha in agen dan:**

### **3.2.i) Pasian Hagau:**

Rom 8:9 ah “Pasian Hagau nouma a aten leh...” achi hi. Dawng 11-ah, “Pasian Hagau, shina pat a Jesu kaithoupa hagau...” chite zong imu hi. Rom 15:16 ah “Gentelte khu Hagau Siengthou a suhsienngthou ahi thu leh, I Thes. 5:23 ah “Lemna Pasian ngei in na pumpi un hing susiengta” achite zong Hagau Siengthou genna thu ahi.

### **3.2.ii). Jesu Hagau: Khrist Hagau, a Tapa Hagau chite akibang ahi.**

Tualeh, Nasepte 16:17- ah, Paulte khu Bethani a lut asawm lai un, Jesu Hagau in aphalsih chi zong imu uhi. Rom 8:9 ah “Koi zong Khrist Hagau neilou khu ama mi ahi sih” chi i mu uhi.

### **3.2.iii). Hagau Siengthou:**

Tualeh, II Kor. 13:14- ah, Hagau Siengthou pawlna agen hi. Luk 11:13- ah, “Hagau Siengthou khu angentapou kung ah pieh ahidiing thu’ imu uhi. Eph. 4:30-ah, Hagau Siengthou khu dasahlou diing a thupieh imu uhi.

## **4). THUGIN IN AGENDAN:**

### **4.i). Mangpa ahi:**

II Kor. 3:10 ah “Mangpa khu Hagau ahia; Mangpa Hagau umna zousie ah khu zaleenna aum hi” chi ahi. Tualeh, II Kor. 3:6-ah, Gentelte dan thupieh pen shina ahia, hinanlezong Hagau khu hinna ahi” achi hi. Leitung kisiem chil in tui tung a awpkhum a, Leitung kemit zelpa in Khrist thute, Pasian laibu thute khu mite lungsim ah a awp hing zing hi. Tuachiengin, mite’n Jesu khu “Mangpa” chi in ahan diing uhi. Aziehpén, Hagau bou in Jesu “Mangpa ahi” achitheí giep hi (I Kor. 12:3).

### **4.2). Jesu’n Lalna leh thuneina atanna mun ah Hagau Siengthou zong a lien in thu anei zel hi:**

Jesu letna/thuneina mite lungsim ah khun Hagau Siengthou zong a lien a thu anei a, ‘Mangpa’ chi in ahan thei uhi.

### **4.3). Hagau Siengthou Hinna petu:**

Hagau Siengthou in migilou kisiat kung ah lungsimtha apie a, akhelna mun ua kipat kinualet hinna apie hi. Tuaziehin, hinna petu ahi (II Kor. 3:6). Pasian in lungsim miete khu a salvahsah hi (II Kor. 4:6).

#### **4.4). Pa leh Tapa a kipat a hing pei ahi:**

Mangpa Jesu'n Pa kung ah ka ngen diing a, ama'n hamuontu ang pe diing a, kumtawn in na kung uah aum diing hi (Johan. 14:14). Hamuonpa Hagau Siengthou Pa in ka min a ang sawl diing pa ngel in noute sil bangkim hing hil van in, tuachi'n keima'n ka hing hilsate zong hing theisahtava (Johan. 14:26). Tambang, ahizieh in Hagau Siengthou khu Pa leh Tapa a kipat a hing pei ahi chi akilangchieng mama hi.

#### **4.5). Pa leh Tapa toh kibang ahi:**

Tami in Hagau Siengthou khu Pasian ahi chi alangchiengsah mama hi. Baptisma tanna phui teng ah, Pa, Tapa leh Hagau Siengthou in itang ua, zong Pa leh Tapa bang in Hagau Siengthou zong Pasian ahi thu imuthei uhi.

#### **Dohnate:**

- 1). Pasian Hagau leh Leitung kichimat dan gen in?
- 2). Hagau in mihingte hundamna a nnasep gen in?
- 3). Thuhun Tha in Hagau Siengthou agendan chithumte bangte e?
- 4). Jesu in Lalna leh thuneina a neina mun ah Hagau siengthou bang chibang dinmun in aum ei?
- 5). Thugin in Hagau Siengthou agendante hing gen in?

~~~~~

## Bung- 14

### HAGAU SIENGTHOU LEH NNASEPDAN

#### ***Thuchin ding:***

*“Hinanleh na tung ua Hagau Siengthou a hing tun chiengin silbawltheina na nei ding ua, Jerusalem khuo ah, Judia gam leh Samaria gam zousie ah, tualeh kawlmong dongin ka thu theipite na hiding uhi, achi hi (Nasepte 1:8).*

#### **1). Thumapui:**

Awle, Hagau Siengthou hinate igen zouta ua, tu-in ahileh Hagau Siengthou nnasep dan tuomtuomte isuiding uhi. Tulai hattuum tuomtuomte lah ah Hagau Siengthou hina leh nnasepdan gingtute lah ah ngaidan leh pomdan tuomtuom aum hi. Ahivang in, i Bible in a gendante khu adihpen leh ahipen ahi.

#### **2). Gingloute lungsim a, asepdan:**

Hagau Siengthouin mite akhelna uh akiphohsah hi. Gingloute tung a Hagau Siengthou nasepdan khu khelna leh vaihawmna ah chinglou/siemtanglou ahidan uh atheisah hi (Johan. 16:7-11). I thugin in agendan ahileh - ‘agitloudan uh leh atunggihi dante uh atheisah hi’ achi hi. Mihingte in bangtan ahiei khat ah eima dihounate leh chitlanate thei nanleizong kisiana tahtah leh Khrist lam zawt utna lungsim khu Hagau Siengthou nasepna zieh bou a inei thei uh ahi.

### **3). Khrist kung ah mite Pui hi:**

I thugin in tambang in agen hi. “Khrist theina lam ah alungsim uh salvah in, a utnate uh suthahat in, Jesu Khrist khu a Mang leh hundampa a pom diing in apui hi” chi ahi. Khrist khu Hundampa leh Mangpa diing a pomna, ‘Pasian Ta a sim/se’ chi khu sil kipah huoitah ahi. Khum Hagau zieh in ‘Abba! (Pa!)’ chi in ihan thei uhi. Hagau ngei in eima hagau toh Pasian tate ihi uh chi ang theisah hi. Hagau Siengthou nnasep zieh in Jesu khu ‘Mangpa’ chi in i han theita ua, Jesu khu a Mangpa uh ang hita hi. Tuaban ah, thutah lam ah apui tawntung hi.

### **4). HATTUOMTE LAH A HAGAU NASEPDAN:**

#### **4.i). Pentecost ni a kipat in Hattuumte aumpi zingta hi:**

Thuhun Tha a Hagau Siengthou nnasep dan imu masahna uh khu Pentecost ni a gingtu masate lah a, ang tunna thu ahi. Khum hun a kipat in Hattuum leh gingtu mimal zousie aumpi zingta hi. Thuhun Tha hun ah adieh in, Pentecost ni-a kipat in, Hagau Siengthou in mite aumpi zou chieng in amawh nuasie nawn sih hi. I Mangpa Jesu in ‘Kumtawn in na kung uah ka umleng diing hi’ achi hi (Johan. 15:16).

#### **4.ii). Gingtute a suthahat leng hi:**

Hagau Siengthou in gingtute khu apuileng a, Khrist thutah khu ahil zelzel a, amin diing in ‘Hamuontu’ chi ahi. Hamuontu chi khu panpitu, suthahattu china zong ahi. Nasepte ah, Hagau Siengthou in gingtute leh Hattuumte asuhhatdante imu uhi (Nasepte 8:14-17; 10:44; 19:6; Rom 8:26-27).

#### **4.iii). Khrist kung ah apui zel hi:**

Tam khu ‘Sienthoua’ akichi hi. Aumzie tah ahileh mihing khelna a puasate khu Hagau Siengthou in Pasian sutna leh Khrist sutna nei diing in asusiengthou china ahi. Hagau Siengthou puina leh nnasepna zieh in gingtu khu alungsim puohdante, adeidante, ahinadante uh Khrist bang a siemtha zelzel in aum uhi.

## **5). Hagau Silpiehte:**

Tualeh, i Bible isim leh, Hagau silpieh tuomtuom imu uhi. Khumte zousie igen sieng zou sih diing a, tuate lah ah poimaw deute igen ding uhi (I Kor. 12:4-13 leh Rom 12:3-13).

5.i). Pilna, theina, ginna, suhdamtheina, sillamdang bawltheina, thugentheina, Hagau dih theitheina, ham tuomtuom a thugen theina leh adangdangte ahi uhi. Sawltah Paul in “Phattuomna diing in Hagau theisahna khu pieh ahi” achi hi (II Kor. 12:7).

**5.ii). Itna:** Hagau Siengthou silpieh loup i pen khu itna/lungsietna ahi. Tami khu mi’n anei sihleh Hagau nnasepna aneisi china ahiban ah, adangte khu aphatuom diing bang tah in aphatuom sih diing hi.

**5.iii). Hagau ga:** Sawltah Paul in ‘Hagau gate’ achi sih a, khat bang in ‘Hagau ga’ achizaw hi (Gal. 5:22-23), tuate khu-Ki-itna, kipahna, kilemna, thuohhatna, zaineemna, hoina, gin-umna, nunneemna leh kidetheina bang ahi, tamte chiloungal dan thupieh dang aum sih hi.

**5.iv). Vah leh puihuoina:** Gingtute kung ah Hagau silpiehte khu akul-le-poimaw dungzui a pui leh panpi ahi. Hagau dihtah in thutah apuilut diing a, atahsap bang zel un pui in alamkai zing diing hi (Johan. 16:3).

## **6). Hagau Siengthou leh Hattuum:**

Hagau Siengthou in Hattuum leh mimal koipen tung ah nna asem masa ei? chi khu dohna ahileng hi. Amasazaw, heimi pen e chi agen hasa hi. Ahivang in tamte chiemte va-ui:

6.i). Hattuum khu Hagau Siengthou nnasep gasuo ahi (Eph. 2:22) ahi. Tualeh, Hattuumte khu Pasian umna diing a Hagau in alepkhawmte ahi thu imu uhi. 6.ii). Hattuum khu Hagau Siengthou phukhiet ahizieh in, leitung a pawl dang zousie leh ‘Israel lui’

sang in zong a lamdang zaw hi. 6.iii). Hattuum khu Khrist tahsa ahitheina zieh zong Hagau in aumpi zieh ahi. Hattuumte'n Hagau lam hoina leh khanletna diing a i guot uh, Sacrament ngei zong khu Hagau in azah zieh in aphatuom hi. Tamte, loungal Hagau Siengthou hina leh nnasep i Bible ah mu diing aumsih hi. Tulai a Hagau pawlna tang kichi a, hattuum a umngaplou leh lim-le-laam mai buoipite khu adih pen ahi diei? chite ingaituo diing ahi.

**Dohnate:**

- 1). Gingloute lungsim a Hagau Siengthou nnasepdan hing gen in?
- 2). Pentecost nia kipat in Hagau Siengthou in Hattuumte lah ah bangchibang in nna asem ei?
- 3). Hagau Siengthou in gingtute Khrist sutna lam ah bangchi in apui ei?
- 4). Hagau silpieh chituomtuomte gen in?
- 5). Hattuum sung a Hagau siengthou nasepdan tuomtuomte hing gen vawi?

~~~~~

## Bung -15

### HATTUOM HINA UMZIE LEH NICEA THUGIN (CREED)- IN HATTUOM HINA A GENTE

*Thuchin ding: “Tualeh Ken zong na kungah, Nang Peter na hi, chi ka hing hil ahi, tualeh, tami suongpi tungah ka hattuum ka lam ding a, mishikhuo kul kotkhahten tuami azouthaw sih ding hi” (Matt. 16:18)-a chi hi.*

#### **1). Hattuum min umzie.**

Ei ham a “hattuum” kichi Sapham in “Church” akichi a, ahambul lam isui chieng un a umzie ahileh ‘Mangpa a ding’ china ahia, hagau kulpi Pasian phu china zong akawh hi. Leitung a ham tuomtuomte a hattuum gennate igen ding uhi. Tuate, khu Scottish ham in ‘kirk’ ahia, German hamin ‘kirche’ ahia, Swedish hamin, “kyrka,” Dutch hamin ‘kerk’ achi uhi. French hamin ‘Eglise,’ ahia, Spanish-in ‘eglesia’ ahia, Latin (Italy) hamin ‘ecclesia’ tamte khu Greek ham a ‘ekkleisia’ kipat a kiladawh ahitangpi uhi.

Tuaban ah, hattuum china kamteng khu Thuhun Tha ah 112-vei imu uhi Tualeh, Hattuum chi umzie atomkim in genta lei “Pasianin Ama ding leh Ama nnasem ding a Leitung a kipat a hattuumte” china ahi uhi.

## **2). Hattuum phutkhetu, neitu leh kingahna suongpi khu Mangpa Jesu ahi.**

Khantanhoi Mathiu laigel ah Mangpa Jesun hattuum chi nivei ana zang hi. Peter in Mangpa Jesu khu Khrist Messia ahina apuon nua in, Mangpa Jesun Peter kung ah, “Tualeh ken zong na kung ah, Nang Peter na hi, chi ka hing hil ahi, tualeh tami suongpi tungah ka hattuum ka lam ding a, mishikhuo kul kotkhahten tuami azouthaw sih ding hi” achi hi (Mathiu 16:18 & 18:17). Tualeh, tamna “suong... suongpi leh hattuum” chi hamkam chi tuomtuomte khu Jesu Khrist in umzie neitahin agen/amang hi. Tamnah ‘Tami suongpi tung ah ka hattuum ka lam ding’ (Matt.16:18b)-a chi laitah khu hilchet hamsa mama khat ahi.

Unau Roman Catholic-ten, ahileh Peter khu suongpi ahi chi in angai uhi. Amakhu, hattuum kingahna leh Pope thuneina zong Peter a kipat a kiluosawnin angai uhi. Tami ngaidan, khu Protestant-ten apompitheh sih uhi. Pasian thusiem St. Augustine in suongpi khu Mangpa Jesu Khrist khu ahi achi hi. Tuachin, Peter kung ah “Nang khu Peter na hi a, Kei khu suongpi ka hi” achina ahi (Matt.16:18), a chi hi. Jesun “Keiman tami suongpi tung ah ka hattuum kalam ding a, tua satan loupitah ka hing pie hi” chin agen hi. Tualeh, Greek ham a ‘Petros’ kichi khu suongpi china ahia, Peter china ahithou a, Khrist khu suongpi, Amakhu hattuumte kingahna leh neitupa ahi chi khu ei Protestant hattuum ten ipomdan uh ahi.

## **3). Atangpi in hattuum hina chinite khu mutheilou (invisible) leh muthei (visible)-te ahi uhi.**

### **3.i). Mutheilou Hattuum.:**

Hattuum Siemphatute lahah, Augustine, Martin Luther leh Calvin-ten zong, ‘Hattuum muthei’ aphu vang un, ‘Mutheilou hattuum’ um in zong agingta uhi. Tuabanah, Augustine ngaidan in, “Hattuum khu telte zousie ahuop a, tuate lah ah khenkhatte

muthei hattuum sung ah aum ua, akhente apulang ah aum uh” achi hi. Hattuum mutheilou umdan ahileh, gingu dihtah, masang lai a na shisate, tulai a damlaite leh hing um zel dingte zong huop in agenthei ding hi. Tualeh, Mangpa Jesu Khrist gingu zousie khu, tam leitung ah min khat puom khat nei in dingthei sih nan lei zong, ibawn un mutheilou hattuum ah itel chiet uhi.

**3.ii). Muthei Hattuum:** Tualeh, Leitung ah hattuumte khu tu-a, amin-le-hina bangun muthei hattuum khu leitung mun tuomtuom ah, local churches/denominations, doctrines, Constitutions leh by-law a ki-enkol in leitung a pawl tuomtuom ah muthei in iding uhi.

**4). Hattuum hina Nicea leh Thugin leh (Creed)- in a gente:**

Tualeh, tuin hattuum hina dihtah leh zie tuomtuomte, ‘Nicaea Thugin’ (Nicaea Creed) in a puonkhieh chi li-(4)-te igending uhi.

**4.1). Tuin ‘Nicaea Thugin’ in hattuum hina agente isui ding uhi. Tuate ahileh:**

**4.1.i). Hattuum khu Khat (One) ahi.** Hattuum khu khat chi in hattuum hina zie poimaw tah atahlang hi. Hattuum khu leitung ah pawl tuomtuom in um in, thugin leh biehdan tuomtuomte nei in, nam tuomtuomte in kikhen nanlei zong Mangpa Jesu Khrist gingu zousie huop in khat ihi uhi. Hattuumte Mangpa Jesu hundampa a pom zousie khu ‘Hagau khat, Mangpa khat, Baptisma khat leh ginna khat neitute leh tudetin’ ium uhi (Ephesa 4: 4).

**4.1.ii) Hattuum khu a Siengthou ahi (Holy):**Hattuum pen Pasian a, hagau lam kipawlkhawmna ahiziehin asiengthou hi. Hattuum siengthou chi umzie dihtah khu ‘tuom koi’ china ahideu pen hi. Sildang lah a kipat a lahtuum a, siltuum dieh khat a ding a koituom china ahi. Tualeh, hattuum neitu leh hantu in asisan siengthou toh atat/lei ahiban ah, Pasian khu asiengthou ahiziehin, hattuum khu asiengthou ahi. “Na siengthou ding uh ahi, Kei ka siengthou ngal a Mangpan” achi hi (Leviticus 11: 44).

Tualeh, “Hinanleh noute hing hanpa asienthou bangin, noute zong na gamtat dan zousie uah siengthou un. Aziehpén ‘Noute siengthou un, Kei ka siengthou hi’ chi a kigel bang in” (I Peter 1: 15-16). Ahin, tulai ei hattuumte lah ah tahsa, lungsim leh hindan sienthoua nasatahin i kitasam mama uhi.

#### **4.1.iii). Hattuum khu huopzou ahi (Catholic):**

Mangpa Jesu hing shina khu leitung pumpi a mizousie a ding ahi. Tuabang in, hattuum zong huopzou chi khu hattuum ah leitung a mizousie a ding china ahi. Pasian hattuum sung ah leitung ningli a um michin, nam chin, hamchin teng ata un ahuop sieng hi. Thuhun Lui hun laiin, Pasian in Israel nam sawm-le-nite, Ama mite hiding in anatel tuom hi. Pasian mi hiding in nam dangte leh ei Jentail-te a ding in lam etna mawngmwng aum sih hi.

Ahin, Thuhun Tha hattuum ah khun, mizousie a ding in lampi akihong zing hi. I thugin uah zong, “Mi zousie a ding a hattuum siengthou aum ka gimta” achi hi. Rev. Lalsawma in, “Huopzou hattuum chi khu pawl tuomtuomte danglam na in asuhbuoi phahlou leh gam dang leh nam dangte kikhenna in zong asubuo i phahlou, mi zousie huop zou ahi” achi hi.

#### **4.1.iv). Hattuum khu Apostol-te (Sawлтаhte) thugin leh zilsahna a kinga ahi.**

Hattuum khu Mangpa Jesu phukhie ahia, tuate lah ah Sawлтаhte (Apostol)-te zong apang uhi. Tualeh, Sawлтаhte khu Mangpa Jesu shina leh thawkiana mutute leh theipitute zong ahi uhi. Tuabanah, Mangpa Jesun zong Ama sepban sem ding a, atel leh sawlte ahi ziehun, amaute tungtawn in zong hattuum ang ding ua, tuni dong in eite tung ah hattuum phuna leh zilsahna iliengkou uah a kinga zing hi. Tualeh, hattuum dihtah khu Bible thutah leh Apostol-te thugin dihtah pom leh zuitute ahi uhi. Nidanglai in hattuum masaten vai ahawm chiengun, “Hagau Siengthou leh kouten” chiin Pasian Hagau Siengthou umpina toh ana kipui zelzel uhi.

**Dohnate:**

- 1). Hattuum min umzie ham tuomtuom a kigente bangbang e?
- 2). Hattuum neitu leh phutkhietu koi e?
- 3). Mangpa Jesun tami suongpi tung ah ka hattuum kalam ding achi khu Protestant leh Roman Catholicte ngaidan kibahlou dan gen in?
- 4). Muthei leh mutheilou hattuum umdan tawmkimin gen in?
- 5). Nicaea Thugin' in hattuum hina chili (4)- agente bangbang e?



## Bung-16

# HATTUOM HINA KAMTENG LAISIENGTHOU (BIBLE) A I MUTE UH

### *Thuchin ding:*

*“Aziehpen eite Ama tahsa hiengte ihi ua, Ama tahsa leh agu hiengte ihi uhi” (Ephesa 5:30).*

### **1). Thumapui:**

Hattuum hina min tuomtuomte leh Necea Thugin (Creed)-in, agente igenzouta uhi. Tuin, Sawtah Paul leh midang in hattuum hina agente isui ding uhi. Tuate ahi uleh:

### **2). Sawltah Paul in Hattuum hina agenchedan:**

Sawltah Paul laihahte ah, Hattuum chi thuteng khu 60-vei atuong hi. Thuhun Tha bu gielte lah ah Paul khu Hattuum hina leh umzie genchientu pen khat ahi. Gingtute’n, Hattuum dihtah atheichietna diing un Leitung sil toh gentena li (4)-in, atekhin hi. Tambang in:

2.i). Hattuum khu Pasion Bieh-inn siengthou ahi (I Kor. 31:16-17; 6:19; Eph. 2:20f; 4:30). 2.ii). Hattuum khu Khrist Mou siengthou ahi (II Kor. 11:2; Eph. 5:25-27). 2.iii). Hattuum khu Khrist tahsa ahi (I Kor. 12:12-17; Eph. 1:23; 5:29, 30; Kol. 1:18, 24, 28; 2:19). 2.iv). Hattuum khu Pasion teel Israel tha ahi uhi (Gal. 6:16)-chite in agen hi.

### **3). Hattuum khu Khrist tahsa/pumpi ahi.**

Tam thumal khu gingtute leh Mangpa kikal a tahsapum khat a kizop khawm ahi. Tualeh, Khrist leh gingtute tahsa kizop khawm

na khu mihingte tahsa kizop khawmnate sang a sang zaw leh thuhzaw ahi (Ephesa 5:30). Tahsa, bameng tuomtuomten hinna khat kibang in, utna kibang leh kizopna kibang azangkhawm uhi. Khrist khu hattuom lutang ahi. Amakhu, lamkaitu leh vaihawmtu zong ahi. Amakhu, pumpi vahtu zong ahia, ama pilna in hinkhuo ah tup-le-ngimte zousie zong a enkol sieng hi.

Tualeh, hilchetna ah zong, khat-le-khat kipoimaw tuo ihidante uh agen hi. Tueleh, keng in khut kung ah kangpoimaw sih achithei sih a, tuama bangin mit in bil kung ah kang poimaw sih achithei dieh sih hi. Pasian in, pumpi in ahingbawl a, hichi-a kipanpi tua leh kihamuontuo a umtheina ding in. Tueleh, (1 Korinth. 12:15-17) ah, lu-le-pumpi kikal ah zong kitheisiem tua na a um a, lupanglou in pumpin bangma abawlthei sih a, ahisihleh lu-in zong pumpi panglou in bangma abawlthei dieh sih hi. Hattuom hinkhuo ah Ama (Jesu)-i poimaw mai uh hilou in, Aman zong eite hing hepina ziehin leitung a mite hundam ahina dingin ahing poimaw a, Amite leh Hattuomte dingin Ama ah kinga ua, i kipoimawtuo uhi.

#### **4). Hattuom khu Khrist mou (Kihilna 21:9) ahi.**

Kitenna in mihing nite kikal ah kizopna tuom dieh khat ahing khie a, itna toh kitheisiemtuona leh kizatat tuonaten mani masielna leh mimal hinkhuo tengteng aheng lamdang hi. Thuhun Lui hun ah zong Pasian in Isrealte khu amou bangin awnem tahn leh duot tah in a pui zel hi. Thuhun Tha ah Mangpa Jesu Khrist khu mouneipa bangin akigen hi.

Khrist khu moupa ahileh mou koi ahita diei? Sawltah Paul in mou khu hattuomte ahi chiin anghil a, Khrist in a itna maimai hilou in, Ama a ding a shi a, hun hingtung ding ah bukim tahn khelna bei in a ang sung ah ang dingsah ding hi. Khrist in a Hattuomte khu a it in, akhotuo mama a, siengtah leh kumtawn itna in, Pasian hepina lamdang tah mai khu thumang loute leh

mikhielte a itna ahi. Pasion in ahing itna zieh in miel a iumna u'leh, khelna leh Setan saltanna a pan in, Khrist shina leh thawkiana in ahing suoh tasah hi.

### **5.). Hattuum khu Pasion tempul ahi.**

Thuhun Lui ah Pasion in Israelte lah a hingteng ding ka hi achi a, Ama tenna ding mun teel khu biehbih/puonbih sungnung pen ahia, tuakhu 'mun siengthou pen' chi-a kigen/hatna mun ahi. Tami inn khu huntom noukhat a ding mai ahia, phelkhieh thei ahia, vanpuohna a puoh thaw thei zong ahi. Tuami nua-in, Kumpi Solomon in suong tempul thupitah mai alam a, Jerusalem a biehn mundet umtheina ding in, biehbih/puonbih taang dingin, Pasion in tam mun ah amite lah a umding ahidan agen hi.

Tualeh, Thuhun Tha ah Paul in gingtute khu Pasion inn hi'n agen hi. Tueleh, tambangin agen a, "Na pumpi uh khu Pasion tempul Hagau Siengthou tenna" ahi achi hi. I bawn un, Pasion tempul ihmiai uh hilou in, mimalmal a zong Hagau Siengthou hing tenna tempul ihi uhi. Pasion inn nahi uhi (1 Korinth 3:9). Paul in zong tam bangin agen a, Hattuum khu tempul thupitah ahidan leh Pasion khu a inn ahidan, tamkhu leitung tawp chieng a Jesu hing pei kia chieng in suhbukim in a umtading hi.

Pasion innkuon siemtha kiana a, imu mabangin, pienthana zieh mai in Pasion tate ihing hithei ua, Pasion in ahagau in ilungtang uh ahingluo hun in, i Pa ahidan leh ata ding a hing pom ahidan ahing theichiensah hi. Tam atung a tangte, a pat in Pasion khu i Pa uh ahidan leh eite atate (innkuonte) ihidan uh zong chientahin imuthei uhi.

### **6). Hattuum khu Thutah khuom leh kingahna (I Tim.3:15) ahi.**

Thuhun Tha ah tam thumal etsahna umsun khu Paul in Timothi kung a alaihahna apat ahi. Tulai a hattuum tampite leh Lai siengthou siem khenkhat-ten, "Itna khu Khrist nuazuite a ding a thupipen

ahi” chi agingta uhi (Johan 13:35). Jesu Khrist hattuumte in thutah agending ua, Pasian thutah tulai Hattuumten zangaina leh itna agen uong ua, mite kung ah mikhiel nahi chi agentam sih uhi. Pasian ngaidamna thei a kisiatie kung ngei ah amaute khu itna a dimlet in thutah apuongzah theisih uhi. Tamkhu, adih sih a, Sawltah Johan in Thuhun Tha agelte lah a Pasian itna khu agentam pen hi.

Hattuum khu tam leitung a Pasian thutah khuom-le-kingahna mun umsun ahi. Tuazieh in, tam thu apoimaw mama a, Khristian-te a ding in, thutah theina mai hilou in, thutah a dinna leh thutah a hinna tuakhu thutah puonzahna zong ahi-ngal hi.

### **7). Hattuum khu Pasian belamte ahi uhi.**

Thuhun Lui ah Pasian khu Isrealte belampu leh chingpa chi-a theiin aum hi. Amite khotuo belampu in, abelamte akhotuo mabang in, Pasian zong amite mi malmal tung ah zong a khuotuona atungsah leng hi. Leeng David in Pasian khu abelampu khotuotu leh itna dim ahidan atheichieng mama hi (Sam.23). Pasian in amite belampu ding leh puitu ding a guotten apuitheilou chiengun zong alungthah hi. Thuhun Tha ah Khrist khu belampu hoi china tamtah a um a, tualeh, anuazuite khu belamte chi a hatin aum uhi. Hattuumten, belampu khat anei ua, tualeh Khrist belampu hoi ahi hi.

Tuabanah, belamte umdan tangpi khu puingai leh venbit ngaite ahi ua, gamsate a ding a bailamtah a nethei zong ahi ua, tuaziehin, ahonhon a koikhawm in aum ua, achingtu khut ah nasatahin akinga uhi. Mangpa Jesu khu belamchingpa hoi ahi a, i mawpuohna khu akung a i um gige ding uh ahi. I hinna ding leh bitna ding mai hilou in, Ama puina ipoimaw zing ua, gingtute a dingin poimaw dieh a, tam kizopkhawmna ah, Mangpa Jesu khu belamchingpa hoi ahi a, eite khu a belamte vahtu leh puitute zong ihi uhi. Amakhu, amite puikhawmtu, belamchingpan abelamte

apuikhawm bang in ahi. Tualeh, Mangpa Jesu khu belamchingpa hoi leh lienpen zong ahi (1 Peter 5:14).

**Dohnate:**

- 1). Sawltah Paulin hattuum hina gen bang chi in a gen ei?
- 2). Hattuum khu Khrist tahsa/pumpi ahi chi umzie bang e?
- 3). Hattuum khu Khrist mou ahidan gen in?.
- 4). Hattuum khu Pasion tempul ahi chi umzie bang e?.
- 5). Hattuum khu Thutah khuom leh kingahna chi umzie bang e?
- 6). Hattuum khu Pasion belamte ahi uhi bang china e?



## PRESBYTERIAN HATTUOM PEIDAN LEH KIETKOL DANTE

### *Thuchin ding:*

*“Tua thamlouin, mipite lah apat, Pasion zaumi leh mi thudih leh huoihamlou, mi kizen deudeu na teldoh dinga, tuabang mite, tul tampi tunga vaihawm ding, za tampi tung a vaihawm ding, sawmngate tung a vaihawm ding, tualeh sawmkhat tung a vaihawmtu ding bangin na koi ding hi” (Pawtdohna 18:21).*

### **1). Thumapui.**

Prebyterian hattuum khu “presbyter” chi a kipat a hing kilakhie ahi. Tami khu, Greek ham a ‘presbuteros’ chi-a kipat a hing piengdoh ahi. Tuakhu, Upa (elder) china ahi. Tualeh, Septuagint (LXX)-ah khu zakhat (100)-valvei atuong hi. Thamlouin, Thuhun Tha ah khu sawmgah (60)-val vei atuong kia hi. Tualeh, Presbyterian hattuum in min tuomtuom zong ahaukhop mai a, tuate “Mission” chite, Mizoram ah ‘Synod pawl’ chi in akihan a, akhenten, “Press” chi pawl zong aum ua, unau Myanmar (Burma) lam ngelin, ‘Pres’ zong chilouin, “betery”te chi in tambangin zong akihan hi.

### **2). Presbyterian hattuum Bible a akingahnate.**

Presbyterian Hattuum hing pienkhieh dan bul suitute in, masanglai in Aigupta gam a a Solkalna uh (government), vaihawmna uh khu Upa-ten vai ahawm ua, tuami a kipat a hing kilasawn in angai uhi (Gen.50:7). Tualeh, Israelte Mosi in Kanaan gam a, apuilai in

asungpa Jethro hilbang in, vaihawm ding guotna anei ua, tuachin mipite lah akipatin ‘Mi kizen leh lamkai ding Upa sawmsagi (70)-te vaihawm ding in, anateldoh’ uhi. Tam khu, Thuhun Tha a kivaipuoh dan toh kituoh a suikhie in, Presbyterian Hattuum peidan toh zong abultuoh uhi (Pawtdohna 18: 13-27; Num. 11:25). 4.2.).

Tamte, ban ah Mangpa Jesu in zong nuajui sawm-le-nite (12)-te leh mi sawm sagi (70)-te asawldohnate ban ah hattuum masaten lamkai ding anaguotte uh zong Presbyterian hattuumten lamkai ding kitel dan ah etton leh pansan in akinei hi. Tuabanah, Nasepte 6:1-6, sung a Lamkai (Upa)- ding a hattuum masate in mi sagi (7)-atel khiehte uh toh dinmun kibang leh etton ahi deupen uhi.

### **3). LEITUNG A MUTHEI A PRESBYTERIAN HATTUOM HING DIN KHIEHDAN.**

Kum zabi 1-na AD a pat in kum zabi 16-na bullam tan in leitung pumpi ah Hattuum ni (2)-in akikhen ua, Khosah lam Hattuum leh Khohanglam Hattuumte ana um gel uhi. Khohanglam Hattuumte munpi khu Rome ahia, Khosahlam Hattuumte munpi khu Constantinople (Byzantine) ahi. Tualeh, kum zabi 15, 16 leh 17-te masang tengin hattuum a lamkai tuomtuom leh alien diehte Pope, Bishop, Father leh Apostle-ten mimal letna-leh-laltnate toh hattuum apuite uh deilouna nasatah mai in mipi lam ah ang um hi.

Tuabanah, tua hunlaiin, Switzerland khopi Geneve ah zong, vaihawmna chi thum ana um hi. Tuate ahileh: (i) Roman Lenggam (Roman empire) nuoi a palai thuneitu Dukes of Savoy (Viceroy), (ii) Bishop thuneina, leh (iii), Council of the people chite ahi uhi. Tualeh, kum 1535, in Bishop leh Viceroy-te tung ah lungkimloute in Independent apuonkhumta uhi.

Tuabanah, French mi John Calvin (1509-1556)-in, zong ahun lai a Roman Catholic leh Lutheran Hattuum a siempiten thuneina sangtah mai anei dan uh khu dih asa sih hi. Aman, alaibu bawl minthang tah mai, ‘Khristian sahkhuo kipuihuoina’ chi bu ah zong hattuum kipui huoina dingte a gel hi. Tuabanah, hattuum biehna lam (Order of worship)-te zong asiempha a, thumna nei chieng a, laibu a agelkhiehsate simlou a, ahun-le-poimaw bang a thumna (extempore prayer) nei ding dan apankhie hi. Tuabanah, Aman leitung kivaihawmna leh biehna kivaihawmnate zong a khentuom ditdet hi. Tuachin, Upa vaihawm ding mi zani (200) atelkhie ua, tuate khu Geneva khopi sung ah hattuum leh khotang a vaihawm thuneitu pente ahing suohta uhi.

Tualeh, Presbyterian hattuum khu khawvel gamchin a Protestant hattuumte lah a hattuum lien leh kumlui vawt khat ahita hi. Tuin, khawvel gam tuomtuom sawm sagi valte ah kithezahin, member zong nuoi 70-100, vel um ding a hisap ahi uhi. Tueleh, kum 1970-ah khun khovel pumpi huop in Presbyterian in ahinkhiet hattuumte khu ‘World Alliance of the Reformed Churches’ (WARC) ah akipawlkhawm ua, kum 2010 in WARC khu ‘Reformed Ecumenical Council’ (REC) toh kizop khawm in, ‘World Communion of the Reformed Churches’ (WCRC) min akivaw ua, tuin gam tuomtuom 108, bang in hattuum pawl dang 229, leh member maktaduoi 80 vel anei uhi.

#### **4). Presbyterian Hattuum Thugin leh Kingahnate:**

##### **4.i). Sola gratia et sola fide. (Itna zieh leh ginna zieh bou ahi).**

A umzie ahileh, Pasian leh mihing kisai khahna zousie hundamna ding, guoljawlna, sienthoua, loupina leh adangdangte, mihingte lawkhieh guol leh bawlkhieh zou ding ahisih hi. Tuaziehin, Pasian in aitna/lungsietna zieh a, asilpieh khu eiten ginna maimai a itanthei ahigiep hi.

#### **4.ii). Sola Scripture. (Pasian Laisiengthou maimai).**

I thuginpi uh khatna in agen bangin, Thuhun Lui leh Thuhun Tha khu Pasian thudih tah ginna leh hindan tena dih umsun ahi chi'n apom hi.

#### **4.iii). Sola Christus. (Khrist maimai).**

Tamin agen nuom ahileh, Khrist thuneina tungnunna, lalna, abul-le-atawp, ahina asulang hi. Hattuum leh leitung hinkhuo a, Khrist lalna leh thuneina khu hattuum dangte sang in amuchien zaw hi chi lei ichi khiel sih ding uhi.

#### **4.iv). Sola deo Gloria. (Minthanna leh pahtawina khu Pasian kung bou ah umta hen).**

Mihingte i umna zieh khu Pasian loupina ding in ahi. Silbang kim umna zieh zong ahileh tam ziehma sem ding in ahi. Pasian nnasep, chibai buh, Khristian hinkhuo dih-le-dih lou bangkim tena sangpen khu Pasian loupina aching ei? chi khu ahi.

### **5). I Thugin uh:**

#### **5.i). Laisiengthou (Bible):**

Atung a igensama bangun, Presbyterian Hattuum khu Pasian khat a Mihing thum, Pa Pasian, Tapa Pasian leh Hagau Siengthou Pasian (Trinity) gingtate ihi uhi. Tualeh, Bible, Thuhun Lui leh Thuhun Tha Pasian Thu (Bible)-bu 66-te khu, “Ginna leh silbawl tena dihlou theilou” ahi chin igingta uhi. Tuaziehin, pastor leh Upaten, ordination itansah ding chieng un Bible-66 leh i Presbyterian Constitutie khu napom in na gingta ei i kichiva teh uhi. Tualeh, “Ing” ka gingta in kapom hi, chivatehte chau/bou ki-ordain thei giep hi.

#### **5.ii). Sacramentte:**

Tualeh, Sacrament zong khu siemphat hattuum dangte mabang in chi (2)-ni, Mangpa Nitah ann leh Baptismate gel ipom uhi. Tualeh, gelthaw in um sih nan leh zong kum khat a local hattuum

khat a thumvei teitei beh Mangpa nitah ann hawm ding khu pastorte mawpuoh ahi uhi. Ahin, kum khatin thumvei maimai atot/fan ding uh china ahisih hi.

#### **6). Presbyterian in ‘Hattuum’ apomdan (John Calvin zilsahdan/pawmdan):**

Presbyterian hattuum in Pu. John Calvin jilsahna juuin, ‘Westminster’ thugin in agen, ‘muthei hattuum’ leh ‘mutheilou hattuumte’ khu apom tuohtuoh hi. Azieh ahileh, muthei hattuum leh muthei lou hattuum khu pumkhat ahi uhi. Pu. Calvin in, “muthei hattuum ngaina lou kei a, muthei lou hattuum bou ngaina akigente toh kijopna zong anei ut va-ia sih hi. Aman, hattuum simmaw leh gensiet khu Pasian gensietna leh Jesu Khrist ginna lam a peimangna in zong angai va-ia hi. Azieh khu, “hattuum khu Khrist tahsa ahiziehin musit-leh-gensiet thei guol ahisih a, tuanah sang in itheina zousie u’toh siemphat leh tundin sawm zawh ding ahi” achi hi.

#### **7). Gam leh Nam siemphat thu ah.**

I gensa bang un ei Presbyterian hattuum in gam-le-nam siemphat khu gingtute mopuohna leh bawl ding in ingai uhi. Tuaziehin, Pasian thu toh kikal lou ahiphot leh gam-le-khotang nnasepna ah zong nasatahin pan ilah ding uh ahi chi ipeipi dan uh ahi. Tuaziehin, Presbyterian hatna gam ah gam-le-nam khu mun dang sang in akhangtou jaw uhi. Tualeh, solkal nnasemten zong amauh nna khu Manggam nnasepna bang in angaithei ua, tuachin tahsale- hagau ah khantouna atang uhi, Etsahna ding, Presbyterian hatna leh tamna gamte USA, South Korea, Scotland leh eigam ah unau Mizoramte ah akilang mama hi.

#### **8). Ginna a kibahpi hattuum leh pawldangte toh semkhawm ding in a kihong zing hi.**

A tung a itahlatsa bangun Presbyterian Hattuum khu huopzou hattuum ihi ziehun, midang a diehin, ginna a ikibahpите toh

sepkhawmna leh kipumkhatna lam ah akihong lien zing hi. Gam tuomtuom ah Hattuum dangte toh pumkhat a kipawl in Presbyterian min polou in zong min dang aphuo zel ua, ‘Presbyterian’ min apaikhie ua, hinanleh Presbyterian gasuo a simtel thei ahi zel uhi. Tamte ban ah, Presbyterian hattuum khu hattuum kipumkhatna (Unity) ngaikhoh in pawl dang adiehin ginna ikibahpite toh sepkhawm zong ipeidan khat uh ahi.

**Dohnate:**

- 1). Presbyterian kihatna minte bangbange e?
- 2). Presbyterian hattuum Bible akingahnate gen in?
- 3). Pu. John Calvin hunlai a Switzerland khopi Geneve a vaihawmna chi thumte gen in?
- 4). Presbyterian Hattuum Thugin leh Kingahnate chili (4)-te gen in?
- 5). Pu. John Calvin in ‘Hattuum’ apomdan gen in?
- 6). Presbyterian Hattuum in gam leh nam siemphatna ding a apanlah dante gen in?

~~~~~

## PRESBYTERIAN CHURCH OF INDIA (PCI) GENERAL ASSEMBLY DINKHIEH DAN

### *Thuchin ding:*

*“Tuaziehin, unaute aw, na lah ua Hagau Siengthou leh pilna a dim, mi min hoi ngen sagi tel unlen, amaute tam nnasem ding a ka guot theina dingun, a chi uhi” Nasepte 6:3).*

### **1). Thumapui.**

Awle, atangpi in Presbyterian hattuum hina leh hing dinkhiehnate igen zouta ua, tu-in Presbyterian Church of India (PCI), General Assembly hing kipat dan leh hinate igen ding uhi. Mi khen khatte in poimaw sahlouna zonginei maitheti ua, igam hattuum kulmut leh khautah a peite in Pasian thu tahte sangin, amau pawlpi ginna leh hinnate a uong gen ua, tuakhu ahatna thuguh uh chi lei zong ichi khiel sih ding uhi. Tuaziehin, eiten zong eima hattuum tangthu khu i thei siem chiengun iginna uah zong imasawn ngei ding uhi. Tuin, Presbyterian hattuum hing kipat dan isuiding uhi.

### **2). Presbyterian Church of India (General Assembly) din khieh dan:**

Thomas Jones leh azi (Welsh Missionary)-te nupa khu June 22, 1841 in Sohra, (Meghalaya) ang tung uhi. Tualeh, kum 1924-ah khu, Khasi-Jaintia, Mizoram leh Cachar phai ah Hattuum a phukhiette uh khu, ‘Assembly’ thum in asiem uhi. Tuate khaikhawm dingin ‘Synod’ dinkhiet ahia, Danpi (Constitution) leh Thugin (Confession of Faith)- zong asiem ngal uhi. Tualeh,

Kum 1926-in Syhlet-ah, Synod Khawmpi masapen nei ahi. Tuami, kum in Presbyterian min ipota ua, “The Presbyterian Church of Assam” chin siemkhieh i hita uhi.

Tuami nua ah, ‘The Presbyterian Church in Assam’ khu kum 1968 in, “The Presbyterian Church in North-East India” (PCNEI), chiiin ikiheng kia uhi. Tualeh, kum 1992-in “The Presbyterian Church of India” (PCI), chia hen in aum kia hi. Tuaban ah, kum 2002-ah kivaihawmna sangpen ‘Assembly’ zong khu ‘General Assembly’ chia hen in aum a, tuni dong in izangtoun nalai uhi.

Tualeh, igensa bangun, Presbyterian Church of India (PCI)-khu ‘Welsh Calvinistic Methodist’ hattuum hinkhieh ihi uhi. Tuaziehin, thugin leh kipui huoidan ah ‘Calvinism’ leh ‘Methodist-te’ peidante izuikhawm uhi. Tuachin, Welsh gam hattuumte peidan jui zel kawmin, eima gam-le-mun toh kituohin, Bible pansanin Constitution dettah leh hoitah nei in ikipui huoi ua, eite khu Constitutional hattuum zong i hi uhi.

## **2). Presbyterian Hattuum kietkawldan:**

Presbyterian hattuum khu mihing lamkai/heutu tuom nei aki enkol ahisih a, thamlouin, mimal khat letna-le-lalna (director)-chite a kipuo hattuum zong hidieh louin, Pastor, Upate, LCC, Session leh Committee/Meeting tungtawn a kipuihuoi hattuumte ihizaw uhi. Tuaziehin, kumtawp Session leh Committee/Meeting tungtawn in ikipui huoi un ikienkol uhi. Tamkhu, India gam kivaipuoh dan leh democracy peidan toh zong akibah sim ban ah, tamkhu hattuum dangte toh ikibahlouna uh zong ahi.

## **3). Presbyterian Hattuum kivai puohnate (Church Court):**

Tualeh, Presbyterian-te, Presbyterian hisahtu khu thugin hilou in, Hattuum kivaipuohna dan khu ahi akichi hi. Pu. John Calvin in, kivaihawmdan adih a, afellou leh Hattuum adin detthei ding agingta sih hi. Atangpi in, Presbyterian Hattuum kivaihawm dan khu sawngnga (5)-in akikhen a, tuate khu:

3.1). Tuolsung Hattuum (Local Church), 3.ii).District/biel, 3.iii). Presbytery, 3.iv). Synod leh 3.iv). General Assembly-te ahi uhi. Tualeh, Hattuum kivaihawmna dan ngate (5) khu abanban in igen ding uhi.

### **3.2). General Assambly (G.A).**

India Gam Presbyterian Hattuum kivaihawmna sangpen khu General Assambly ahi. Tami General Assembly in India gam sung a Presbyterian Hattuumte, Synod leh agamkai a vaipuohnate zousie ahuop hi. Tualeh, tami nuoi ah tutan-in (2019 tanin) Synod sawm (11) aum hi. Kum ni dan zel ah khawmpi May ha kal masa pen a nei zel dingin 2012, Assambly Khawmpi ah phasah ahi.

Tualeh, Khawmpi membrete khu General Asembly lamkaite, Minister/pastor leh Pro/Pastor te, Committee tuomtuom a membrete, Synod Moderator leh Secretary-te, Presbytery chin in mi nga zel aguotte, PWF leh PYF a pat a guot a umte ahi uhi. G.A. mawpuohna poimaw diehte khu Synod tha siem dinge, Dan siem leh Synod tuomtuom a pat a thulutte ngaituo, India gam pawlam Hattuum dange toh kizopmatna ngaituote ahi hi. Shillong-ah Office anei in, Administrative Secretaries, thum leh staff dangten asem uhi. G.A. nuoi ah khu nnasepna bameng tuomtuom enkol ding in Committee tuomtuom zong aum uhi.

### **3.ii). Synod.**

Synod khu General Assembly ban a vaihawmna sangpen ahi. Khawmpi member-te khu Minister/pastorte, Pro.Pastorte, Synod Committee tuomtuom member-te, Presbytery Moderator leh Secretary-te, Presbytery-ten aguotte, Synod guot bang a Numei leh Khanglai pawlte a pat ahi uhi. Synod sep ding poimaw diehte khu Presbytery siem, Pastor Biel siem leh khente, Ministerte/pastorte namdet, thunun leh tawpsah, nnasepna bameng tuomtuomte, Hattuum neitahte ah neitu hinate, silpieh chi tuomtuom muna leh vaihawmate ahi uhi.

### **3.iii). Presbytery.**

Presbytery khu Presbyterian min potu ahi. PCI Danpi in agen bangin, Prebytery siem ahi ding leh Pastor district/biel thum sang a tawmzawlou aum angai hi. Kum chin Presbytery khawmpi nei ahia, Pastorte, Pro.Pastorte, Upate, Lamkaite, Presbytery Committee tuomtuom a member-te, Biel Chairman leh Secretary-te, danzoukimte thatang in District/Biel in aguotte ahi uhi. Presbytery sepdingte khu Biel/District thulut ngaituote, Upa tel, namdet, thunun leh tawpsahte, Synod palai ding tel, Committee member guot leh telte, ahuop sung a Hattuum pei ding dan saifel, Biehin lam leh phel ding phalna piehte leh adangdangte ahi.

### **3.iv). District/Biel.**

District in Presbytery khat huop sung a tuolsung hattuum ni ahiei a sang a tam zaw ahiei ahuop a, kipanpituona leh hattuum nnasep pumpi ahatsamna ding a kivaipuohna khu District/biel ahi. Tualeh, PCI Danpi in agen bangin Hattuum ni ahiei, asang a tamzaw ahiei kigawmkhawmte in District/Biel asiem thei ding uhi. Presbytery in agamkai huop sung a Hattuumte kikaihuoina zousie tung ah thunei in a enkol hi. Kum khat sung in khawmpi khatvei nei ahizel hi. District/Biel khawmpi member-te khu Pastor/minister-te, Pro.Pastor-te, Upate, biel Khawmpi Lamkaite, Biel Committee tuomtuom a member-te, Presbytery in abihieh bang a Hattuum chin in a guot palaite ahi uhi.

### **3.v). Tuolsung Hattuum Committee (Local Church).**

Mi bangza ahiei kipawlkhawm a, kikhopna ding ahunchiem leh munchiem a hing peikhawm a, akivaipuohna khu tuolsung hattuum, Local Church Committee (LCC) a kichi hi. Tualeh, tami tuol sung hattuum committee-te khu vaihawmna nuoinung pen hinanleh, Presbyterian Hattuum hatna bulpipen ahi. Tuolsung Hattuum Committee khu Tuolsung Hattuum enkoltu ahia, apoimaw mama hi. A membrete uh khu Ministerte/pastorte, Pro-

Pastorte, Upate leh akuldan leh District/Biel lemsah na bang a Local Church Committee (LCC)-te kum thum pang ding a tel ‘Committee membrete’ ahi uhi. Amaute khu Mizoram Synod-in ‘Tuol Upa’ achi uhi.

Tuolsung Hattuum ah khu member chi thum aum a, tuate, danzoukimte, baptisma tang dan zoukimloute, member ding a amin giellut zou baptisma tangnai loute aum uhi. Tualeh, naupang kum sawm-le-nga (15), hingpha a, Senior zillai ang zawchiengun piching a lahlutna zong nei zel ding ahi. Tuabang a lahlut dingte khu pastor/Upa-ten ahitheh leh counsellingle neipi ding ahi.

Tualeh, Local Churh Committee mawpuohnate khu Hattuum etkol leh a vaihawmna kalsuonpate, Dan bang zel a thununna piehte, Biehinn leh aneitah vante etkolnate, silpieh lahkxawmte, kepbitte ahi uhi. Tuabanah, Hattuum kikhopna zousie guottupte, Sakramen bawlte, hattuum min gielna bu hoitah a keptupte, minute bu, record leh file poimaw kep hoi leh silpoimaw zousie genkhawm leh ngaituote ahi. Tualeh, asaiphah lou thute khu District/Biel ah atat zel ding uhi.

#### **4). Presbyterian hattuum peipi/hina thumte khu:**

##### **4.i). Mani a kivaihawm zou ding (self govern):**

Atung a igensa ma bangun, Presbyterian hattuum khu thu leh la a kivaihawm zou ding chi khu ipeipi khat uh ahi.

##### **4.ii) Mani a khantanhoi kipuonzah ding (self propagate):**

Presbyterian hattuum khu eima-le-eiman khantanhoi kipuon ding chi khu i thu peipi khat uh zong ahi. Eima gam sung hi leh gam puolang a khantanhoi puonzah ding khu i thu ken/peipi khat uh ahi. Tulai Pasian Hagau pawlna tang ut kisa a, crusade, camp leh Seminerte a eima lamkaite deikhop lou a, midangte kung ah hagau lam a pua tawhtawh (kialtai)-zing ahun nawn sih hi. Unau Mizoten, “Mi khuo/zinte vah ding a kipie hattuum” achibang ua zong um khahtheh ahi.

#### **4.iii) Mani a kitoudel zou ding (Self support) chite ahi uhi:**

Presbyterian hattuum khu akitoudel zou Hattuum i hiding uhi. Sum-le-pai a zong mani-le-mani kitou delzou hattuum i hiding uh ahi. I gam leh ikim ipam ua hattuumte entalei ei pawlpite bang a mani keng a ding leh din sawm hattuum atam sih uh chi lei zong ichi khiel seng sih ding uhi. Hattuum lienpipi leh hat mama a i ngaite uh zong kum tam tah midangte (Foreign)-panpina toh na ding leh khangkhiete ahi uhi. Thamlouin, tuni dong in apanpi ding uh suiin abuozing pawl zong a tam mama uhi. Ahin, eite i hileh i kiphu chil ua kipat tuni dong in mani keng a ding hattuum pawlpi umsun ihi uh chi lei ichikhiel sih ding uhi. Tambang a sum-le-pai a i dinzouna ding in hattuum member chnite pankhawmna leh Pasian mapuina i ngai zing uhi.

#### **Dohnate**

- 1). Presbyterian Church of India hattuum koite hingphu e, bangchi kum in e?
- 2). Presbyterian Hattuum kietkoldan leh hattuum dangte a kibahlouna uh genin?
- 3). Presbyterian kivaihawmna lieng/sawng ngate (5)-te gen in?
- 4). Presbyterian hattuum peipi/hina thumte khu bangbangte e?

~~~~~

## Bung-19

### HATTUOM KIZILSAHNA DIH LEH DIHLOUTE UM DAN

*Thuchiin ding:*

*“Jesu’n a kungah, “Kei lampi leh thutah leh hinna ka hi, Keima a peilou in koima Pa kung ah atung ngai sih hi” (Johan 14:6).*

#### **1). Thumapui.**

Leitung pumpi gen tah lou, ei Manipur gam maimai ah zong Khristian leh Pasian hing bie kichite lah ah zong kizilsahna (doctrine)-dih-le-dihlou atamta mama hi. Ahin, koiman kou ka dihsih uh chi-nah sangin, eima umna hattuum chiet u’khu adihpen leh hoipen in ingai un ipom ua, akhente ngelin lah amau pawlpi/ hattuum a umkhaloute khu Van gam lut lou ding bang phiel a ngaidan nei in, mi hattuum leh pawlte bang dem in asubuo ihi.

Tualeh, Khristiante lah ah zong tahtah leh a lem aum bangan, hattuum/pawl ah zong, Hattuum pawl kizilsah dan dih-le-dih lou zong aum hi. Tuaziehin, Hattuum dih leh akhemte umdante leh a kilahdante uh isui ding uhi.

#### **2). Hattuum dih-le-dihlou kilahdante.**

Mi khenkhatte in hattuum dih-le-dihlou umzie zong theichien lou in, “Hattuum zousie a kibang chiet leh dih hiva” chi ngaidan bang anei uhi. Ahin, thugin khu hattuum kingahna bulpi poimaw tah

ahilam zong angaituo ngai sih uhi. Mihingte khu a thugin pom bang zel un ahing ua, a silbawl uah alangkhie zel hi. Tuaziehin, hattuum dih khu athugin uah akimu in alangthei ding hi. Ahin, mimal tahin Pasion toh ikizopna hoi in dih nan leh zong, i umna hattuum kipuoh dan/kivaihawmdan leh kietkoldante adihsih leh hagaulam ah ikhanding bang tah un ikhangun, i piching thei tahtah sih ding uhi. Tuaziehin, Hattuum dih-le-dih lou thei khietnate khu tam anuoi ate ah akilang uhi. Tuate isui ding uhi:

## **2.i). Hattuum dihloute in hundam hina/tan na ding in Jesu sangin sildang agen uong zaw uhi.**

Hattuum/zilsahna dih loute in hundam hina ding in, Mangpa Jesu sangin sildang, adieh in amauh pawlte peidan leh gindante agen uong zaw uhi. Ahin, hattuum dihte thugin khu atangpi-in Mangpa Jesu ah akinga hi. Tuachin, hattuum dih in, Hundamna khu Mangpa Jesu Khrist gintatna zieh leh a itna/lungsietna a hundamna tan ding ahi achi uhi. Ama-un, Jesu Khrist khu ginna toh hundampa ding in apom ua, tuachin, Ama a ding in theitawp suo in akipie un a gamna asem uhi. Amabou, gintatna tungtawn a hundam ang hitah chieng un zong, Ama (Jesu)-a dingin hinding leh annasep ding ahi chi'un gin umtah apang uhi.

Ahin, Hattuum dih loute in, Jesu Khrist khu hundamtu ahidan gensam nan leuh zong, hundam tanna ding in sil poimaw dang a zeptel zel uhi. Tuabang, hattuumte in “Jesu khu hundampa” ahi chiin gen nan uleh zong, Jesu sang a gen poimaw zawh te uh khu amauh hattuum bawldante, dan-le-dun azuite uh azeptel un a uong gen zelzel uhi. Tuaziehin, zilsahna dihloute khun Mangpa Jesu sang in gen uong zawh anei na uah alang chieng mai uhi.

Tuabang ahiziehin, hundamna khu apawl uah amehmat ua, amau pawlte maimai hundam hidingin agen uhi. Leitung ah tuachi bang pawl tuomtuom amamama a; tuaziehin, hundam hina ding a Jesu Khrist gintat sang a poimaw azetel uh amamama hi.

Tambang, ngaidan leh pomdan neite khu hattuum dihloute umdan ahitangpi uhi. Tuaziehin, thugin dihlou khu hattuum dihlou ahingal ua, hattuum dihlou a um khu Khristian dihlou hina zong ahimai hi.

**2.ii.) A Nnasep dan uah alang hi.** Hattuum dih in Khrist a dingin, theitawpsuo in nna asem ua, Khrist a ding bou in phatuom angai zing uhi. Pasion thu agenna zousie uah, amau hattuum tahsalam a suhpun/member punsah sawm sangin, miten Khrist amu ua, a pomtheina ding un thu agen leng uhi. Tami umzie ahileh hagau mangthai mat leh buoipi zing (Missionary nnasem) ahidan uh genna ahi. Alangkhat lam ah, mani pawl punna ding a, midang gingu hisate chiel/zawlte umdan demna zong ahi hi.

Tualeh, Hattuum dihloute in vang, Khrist a ding a sem/bawl kichi kawm in amauh pawl suhpung sawm in midangte demin nna asem zel ua, mite Jesu Khrist kung a pui sangin, amauh hattuum member suhpung na dingin, Pasion hattuum/gingtute asubuo i uhi. Tambang, hattuum a umte khu pawl lungtang ahane i sengseng ziehun, a silngaituo dan uh zong akawchih un aneu a, a lungsimte uh zong aneu mama a, alawm a guolte lah uah zong a lamdang dieh uhi. Tuaban ah, pawldangten hoitah a, annasep piching sate zong khu suhbuo i sawm in ang kigol zel uhi. Tambang, mite in Khrist min suongin Pasion poi akhoi nasa mama uhi.

**2.iii.) Asil ngai poimawte uah.** Hattuum dihten angai poimaw pen u'khu Mangpa Jesu Khrist deibang lungtang puoh leh khantanhoi toh kituoh a hin zing ding ahi. Gingtute dinga poimaw asah pen uh khu, Khrist deilam lungtang nei/puoh leh adeilam hinkhuo zah ahi. Tami pang lou in, pulam dan leh sil hoi dangte zong hoi buching tahtah thei ding aum sih hi. Innsung leh midangte lah a, innasep uh leh asil bawl taphot uah, Khrist lungsim toh kituoh zel a um leh bawl khu a thu zilsah pen uh ahi.

Alangkhat lam ah, Hattuum dih loute in vang amau hattuum deidante khu Mangpa Khrist deilam ahiei achi uhi. Mangpa Jesu zilsahna sangin, amauh pawl zilsahna kochitah mai khu angai poimaw jaw leng uhi. Pasian thu agen chieng un zong atawplam ah amau pawlpi bawldan ah a khumlut uhi. Tuabanah, Pasian nnasemtu angaisangte uh zong Pasian thudih gente sangin, amau pawlpi peidan gen hoi leh gensiemte angaisang zaw uhi. Tam bang a hattuumte silngai poimaw khu Mangpa Jesun alungdampi in akipahpi ding agintat um seng sih hi.

Tuabanah, amaute khu midangte adieh a amauh kibahpi loute zong angaisih ua, midangte kung a um zong nuom asa sih ua, athugen dan uleh a umdante uah ahina dihtah uh akilang zel uhi.

#### **2.iv). Pankhawm dan ah.**

Hattuum dih a umte pawlpi lungtang in leitung/hattuum dangte a en sih ua, Khristiante lungsim in a en zaw uhi. A umna pawlte uh tuom nan leh u'zong, Khrist a ding in a sepdan uah lungsim mun khat apuo uhi. Tuachin, annasepna uah zong a semkhawm siem mama uhi. Tualeh, a thuginte uh tuom in, abawl dan-le-alatdan uh zong zat tuomtuom deu pipi hi le uh zong Manggam a ding a semkhawm leh tup kibang ahidan a thei un tahsa-le-hagau a pankhawm ding dante angaituo uhi

Alangkhat lam ah hattuum dihloute in pen koima toh sepkhawm zong a sawm sih ua, amau maimai dih leh hoi in a kingai uhi. .

#### **3). Thukhum sin:**

Awle, hattuum dih-le-dihlou umdan leh chindante igenta ua, tua igen nuom leh tup pen uh ahileh hattuum dih i hinate uh sulang thei zing a, pan i lah ding uh chi ahipen mai hi. Tualeh, a tung a hattuum dihloute umdan igente uh eiten zong neithei i hiziehun ipilvang ding uhi.

(Note: Tamna i gending uh, Hattuum kizilsahna dih-le-dihoute umdan thu Rev.(L), Saiaithanga in agen, ‘Kohhran Enkawlna’, (Pastoralia)-chi laibu leh adangdangte a kipat a hing kilasawn ahi uhi).

**Dohnate:**

- 1). Atangpi in Hattuum dih-le-dihlou kizilsah/kilahdante bang chi bangte e?
- 2). Hattuum dihloute khun hundam hina/tan na ding in Jesu sangin banglam agen uong zaw uou?
- 3). Hattuum dihlouten angaipmawi mawte uh bang e?
- 4). Bang ding a hattuum dihloute khun midang toh a sephawmthei lou uh e?

~~~~~

## Bung 20

# SACRAMENTTE

(Baptisma thu)

*Thuchiin ding:*

*“Tuazieh in gamchin ah pei unlen Nam zousie ka nuazui in siem un; Pa, Tapa leh Hagau siengthou min in Baptisma bawl un”*  
(Mathiu 28:19).

### 1). Thumapui:

Sacrament chi hamkam khu Latin ham a ‘Sacramentum’ chi a pat lahsawn ahi-a, a umzie khu sil zatat-huoitah a zah/mante genna ahi. Tualeh, Baptisma leh Mangpa Nitah Ann tungtang genna hamkam diing in ‘Sacrament’ ana zahna zieh u’khu, Latin Bible (Vulgate)-ah, tami hamkam ana zah zieh uh ahi pen hi. Silkhat pouma umzie thuhtah nei leh giltah neite genna in tam hamkammal ana kizang leng hi. Sepaite’n, gin-umna thuchiem (Kasam)-a neh uh genna in zong ana kizang leng hi.

### 2.1). Sacrament umzie:

Tami thu itheichetna diing un, ‘Westminster Confession’ (Presbyterian thugin kingahna)- in agente itahlang diing uhi. Tuate:

2.i). Sacrament siengthoute khu itna/lungsietna thuhun etsahna leh namdetna/chiemtena ahi. Pasian khutsuoh Ngei ahi a, tuate in Khrist leh Ama a sil umte a ensah hi. Ama i ngaisahna uh sudettu; tuachi’n Hattuum sung a mite leh Leitung mite kilamdanna

suhlatna zong ahi a; Pasion thu bang zel a Khrist a Pasion nnasem diing a lungluttah a kipiehna zong ahi.

2.ii). Sacrament in a etsahna leh asil etsah khu akizop ua, hagau lam sil ahi uhi. Sacrament phattuumna khu a Sacrament ah um in akinga sih a, abawltupa ah zong aum dieh sih a; Khrist guoljawlna zieh leh ginna a tangtute hagau in apawln leh annasep zieh ahizaw hi.

2.iii). Khrist i Mangpa un Sacrament agente khu chini bou ahi ua - Baptisma leh Mangpa Nitah Annte ahi uhi. Tamte khu thu nnasem diing a dihtah a teldoh a namdette (Pastor)-tebou in a bawlthei giep uhi.

### **3). Raman Catholic leh Orthodox hattuumte in Sacrament chi sagi (7)- anei uhi: Tuate ahi uleh:**

3.1). Baptisma, 3.2). Mangpa Nitah Ann, 3.3). Khelna/gitlou kipuona 3.4), Kiteenna, 3.5). Namdetna, 3.6). Siempi guotna leh 3.7). Sathau nunate ahi uhi.

Tualeh, Salvation Army leh Quaker pawlte in Sacrament anei sih uhi. Protestant Hattuum tamzawte in Sacrament Ni maimai a nei un a pom uhi. Tuate khu Baptisma leh Mangpa Nitah ante ahi uhi.

Tualeh, tuin sacrament ni ineite lah ua Baptisma (Sacrament)-thu igen ding uhi.

### **4). Thuhun Lui (Khristian)te-um masang a Baptisma thu:**

Baptisma chi khu Greek ham in ‘Baptizaw’ apat lekhiet ahi. Aumzie khu ‘Tui a sil’ ahisihleh ‘Tuithe’ leh ‘Phum/die’ chite ahi uhi. I Bible uh Thuhun Lui khu Thuhun Tha kingahna ahi, azieh ahileh, i doctrine uh leh sahkhuo thute u’khu Thuhun Lui ah alim a guong ding na kigenin, Thuhun Tha ah ang bukim zelzel hi. Tuabangin, Khristiante um masang adieh in, Thuhun Lui lai in

zong, Baptisma lim-le-guong akimu hi. Sawltah Paul in Israel tate meipi (cloud)-nuoi a, aum u'leh Tuipisan a kan thu u'khu Khristiante Baptisma toh a gente/tekhin a, Khristiante Baptisma lim bang in zong agen hi (I Kor.10:1-2).

Tualeh, Peter in zong Nouva hun a, 'Tuisang let' lai a mi giet, (8)-Nouva-te innkuon hundam a umte khu Khristiante Baptisma toh kibang in agen hi (I Peter 3:20). Nidanglai apat in sakhuo zieh a kisuhsienghthouma khu sahkhuo chin ah aum hi. Ireland leh Norway gam mun khen khat ah khun, Naungeh ang pien chieng in, Naungeh chidamna diing adei ziehun, Naungeh lutung ah tui a buoh ua, tuachi in amin aphuhoh ngal uhi. Tuazou a thalup khu tuolthana in angai uhi. Khristian ang hinua un zong tuabang a bawl pawl aum zing nalai uhi. Ahin, tamte khu igen ut pen uh ahisih hi.

### **5). Tu-in ahun dungzui a Judate lah a Baptisma kitan dante i sui diing uhi.**

Tuate khu – namdangte Judate kung a, alutna uh Baptismate, Johan Baptisma leh Mangpa Jesun Baptisma atan thute ahi uhi:

#### **5.i). Namdangte Judan nam a alutna uh Baptisma thu.**

Tam khu Judate Baptisma tandan ahi. Azilsahna uah koi zong thuchiemta (Israelte)-hi uttapou in tep atan diing ua, Baptisma atanzou chieng un kithoina sillat alan diing uh chi ahi. Tualeh, Namdang mi Juda Nam a kipe nuom a umleh shie (Siempute)-thum in Dante azilsah nua un, Tui ah (dil/tuiluong)-ah apui diing ua, tui khu a ngawng chieng in atumsah diing ua, dan thupiehte khu agen khum diing uhi. Tuabanah, namdang lutna Baptisma a tanna zieh uh khu Mosi Dan bang a, asienthou theina diing un ahi. Judate khangthu giel khat in “Baptisma khu namdang in Juda sahkhuo apom ua, ang lut u'leh Baptisma khu atang zel ua, Baptisma atansih u'leh pen Peikan kut ann zong a im theisih diing uh” achi hi.

### **5.iii). Johan Baptisma thu:**

I gensa bang un Khristiante'n Baptisma i nei masang un Judate'n ana neita uhi. Ahivang in, Baptispa Johan hun akipat in Baptisma umzie leh azah dan i theichien pan uhi. Johan in Baptisma khu Pasian gam hingtung diing a kisahkholna diing leh khiel kisiena aneina ding un azang uh chi imu uhi. Tuachin a khelnate uh kisia a, Baptisma tang diingin ahil hi. Ahin, Johan Baptisma nua-ah khun, Messia hing pei pai diing lam-etna lientah a umzieh in, Johan in Judate khu Messia hing kilah masang ngei a, a khelnate uh akisia ua suhsieng ahitheina diing un, Baptisma atangsah ahi. Tuazieh in, Johan Baptisma khu 'Khrist Baptisma' ahisihleh 'Khelngaidamna Baptisma' akichi hi.

### **5.iv). Jesu'n Baptisma atan thu:**

Mangpa Jesun zong Johan kung ah Baptisma tangsah diing a anget khu Johan in lamdang asa mama hi. Aman leitung a, a nnasep dingte apat masang in, Jordan lui ah Johan kung ah Baptisma ana tang hi (Matt. 3:15). Tam bang a 'dihtatna suhbukim ahoi hi' (Matt. 3:15) a chi hi. Jesu'n, a khelnate ngaidamna diing a Baptisma atan ahisih a, mikhielte nna asepsah theina diing in adinmun u'leh ahina dihtah uh atheipi theina diing in, Baptisma a tang ahizaw hi.

Tualeh, Mangpa Jesu in, Baptisma atanlai in sillamdangtah thum ah ang kilah hi. Tualte ahi leh, - Van ang kihong a, - Atung ah Hagau Siengthou vakhu bang in ang tuong a, tualeh, Van apat in aw ging in 'Tam ka Tapa deitah ahi' chi in ang puong hi. I gensa bang un, Baptisma khu Mangpa Jesu ngei in ana phu leh ana suhdet ahi chi lei zong i chi khiel sih ding uhi.

Tuazieh in, gingtute'n Baptisma atan chieng un tambang ma in Hagau guoljawlna a tang diing uhi. Tualeh, Jesu Van a, apei diing kuon in anuazuite kung ah 'Pa, Tapa leh Hagau Siengthou min in Baptisma bawl zel un' chi in thu apie hi (Matt. 28:19). Tam

thupieh khu zui in Hattuum masate leh tunitan a gingtute'n i bawl zing uhi. Tualeh, baptisma tanna khu Jesu thupieh ahi i chilai un, Mangpa Jesun mi koima baptisma a tansah vang i thei sih uhi. Ahi'n anuazuite kung ah ama gingtate zousie khu Baptisma tangsah diing in thu apie hi (Matt. 28:19-20).

#### **6.). Khristiante Baptisma thu:**

Tualeh, Thuhun Tha a, Baptisma kingahna Bible tangte khu “Gam chin ah pei unlen Nam zousie ka nuazui in siem unlen, Pa, Tapa leh Hagau Siengthou min in Baptisma bawl un” (Matt. 28:19). “Agingta a, Baptisma tangpouma hundam in um va uh” (Mak. 16:6)-chite leh adangdangte ahi uhi. Tualeh, atung a igensa bangun, Thuhun Lui a Baptismate khu ahim/alim mai ahibou a, Mangpa Jesu hun apat in atahtah leh abukim khu ang kilangta hi.

Tuazieh in, Thuhun Tha leh Khristiante Baptisma khu Mangpa Jesu siem leh phudet ahi ua, tuate khu Sawлтаhte leh Hattuumte'n zong i zuitouden uhi. Tualeh, Pa, Tapa leh Hagau Siengthou min a, Hattuum a lutna diing a gingtute lahlutna zong ahi. Tuabanah, Sawлтаh Paul zilsahdan in Baptisma khu pienthana thuchiem bang in zong agen hi. Sunglam a piengtha tahtahte in, a leitung khelnate uh shisan a, khelna toh kizopna neinawnlou chi etsahna di'n Baptisma atang uh achi hi.

Tualeh, Mangpa Jesu nuazui diing a kipante Hattuum (Siemputen) Baptisma a tansah ding uhi. Khristian ahina uh chiemtena masa pen ahi. Gingtha siemkhiet leh Baptisma tangsah khu akizop a, Hattuum nnapi zawng ahi.

#### **7). Koi min a baptisma i tanding uh e?**

I gensa bang un, Mangpa Jesu'n anuazuite kung ah “Pa, Tapa leh Hagau Siengthou min in Baptisma bawl un” (Matt. 28:19-20)-chi in thu apie hi. Tamnah, Pasian a mithum (Trinity) ang kilang hi. Ahin, Nasepte 8:16; 10:48; 19:5- te ah, ‘Jesu min a Baptisma mi

khenkhat in atang uh' chi imu hi. Tuaziehin, tam thu khu gendan tuomtuom a um thei hi. Tualeh, Nasepte gieltu Dr. Luk in “Jesu min in Baptisma atang uh” achi a, ahin Baptisma tanlai a phuiteng sam uh ahithu agen sih hi. A gen ut pen khu atangte in, Jesu khu Mang leh Hundampa in apomta uh chi ahibou uhi. Tualeh, Peter in Zeng a suhdam lai in zong “Nazareth Jesu min” in achi hi. Baptisma thu ahileh, tambang in Peter in abawl sih hi. Tualeh, tam hun lai in Jesu khu Pasian ahidan puonzahna khat a, angai zieh u'zong ahithe i hi.

Tuabanah, “Jesu min in” ahisihleh “A min” nuazuite'n ana zahna zieh pen uh ahileh, Jesu damlai ngei a ana zah uh ahizieh in Jesu'n, ‘Trinity’ zang/mang diing a, a hillai un zong Jesu min bou ahing zangtouta mai uh ahiding hi. Tualeh, Trinity a min thum lah a khatbou azah mai u'khu ‘Trinity’ theisiemlouna abang hi.

Achil/abultah a, athuzah uh “Jesu Khrist min in” ahisihleh “Mangpa Jesu min in” chizong ahimaithei hi. Trinity min kizahna khu anukhiazaw zong ahimaithei hi. Tualeh, Matt. 28:19-20-chilou ngal ah, Trinity zahna mundang ah imu sih uhi. Tualeh, Mathiu Bu khu Jerusalem sietnua a gel ahizieh hiva chia ngai pawl zong aum uhi.

Bangteng hilehzong Jesu in Baptisma tang diingte kung a, athupieh khu Pastorte'n azui ua, “Pa, Tapa leh Hagau Siengthou min in ka hing Baptist hi” chi in, a Baptis leng uhi. Peter in Baptisma tang diingte kung a, athugen khu “Bible ah imu ua, Jesu Khrist min theizing kawm in Baptisma tang un” chi in agen ahizaw ding hi. Tami, umzie, khu Jesu Khrist gingta in ama angung ah kitulut in ahinna kitanpi dingin Baptisma tang un china ahipen mai hi.

## Dohnate

- 1). Sacrament bang china e?
- 2). Presbyterian Hattuom in Sacrament bangza i nei/pawm ei?
- 3). Roman Catholics leh Orthodox –te'n Sacrament bangza anei uoi?
- 4). Koi Hattuomte e Sacrament neiloute?
- 5). Jesun Baptisma a tanlai a sillamdang thum hing kilangte bangte e?
- 6). Baptisma tansah khu Jesu Khrist thupieh ahidan thumte hing gen in?
- 7). Koi mina Baptisma tan diing e?



## Bung – 21

# BAPTISMA TANSAH DAN LEH NAUPANG BAPTISMA THU

### *Thuchin ding:*

*“Tuanah khum zaan mama in Thong chingpa’n amau zawpi in amaliemnate uh a silsieng pieh a; tuachi in thakhat in ama leh a innkuonpite’n Baptisma a tangta uhi” (Nasepte 16:33).*

### 1). Thumapui:

Hattuum masate hun a kipat in Baptisma tansahdan chini um in akilang uhi. **Khatna ah**, Phum thaw thu ahileh Hattuum masate in gingthate Baptisma atansah chieng un, Tui ah phum in Pa, Tapa leh Hagau Siengthou (Trinity)-min in’ thumvei a phum uhi. Tui aphum in Khrist shina, vui a, aumna leh athawkianate etsahna ahi. Tami in, Khristian Baptisma tangtu leh Khrist khu akizop hi chi a ensah hi. **Anina ah**, Tuitap/Thethaw ahi. Tami, Baptisma tansahdan dangkhat ahileh, Tuitap ahisihleh, Tui thethaw khu Baptisma tangsahtu in ataangtu lutung ah ‘Trinity min’ (Pa, Tapa leh Hagau Sengthou)-in athe/tap thaw hi. Tam khu, ei Presbyterian Hattuumte bawldan ahi. Tam bawldan in a etsah ahileh Khrist sisan khu khel ngaidamna diing in ahing luong hi chi etsahna ahi. Tuabanah, Khrist sisan in migiloute khelna asawpsieng chi etsahna zong ahi. Ahin, ani-un kilamdanna seng aum sih uhi. Baptisma khu, ‘Phumthaw’ ahisihleh ‘Tapthaw/Thetaw in’ tang leizong apoimaw pen khu a tangtu leh Khrist kizopna khu ahizaw hi.

Tualeh, Pentecost ni-a, Peter thugen a pat in gingtha 3,000 (Sangthum)-val ang um ua, a unpi-un Tui a phumthaw in Baptisma tangsienglou maithei ahi uh chi khu ‘Thethaw/Tapthaw’ pawmte/zangte ngaidan ahi. Tuaziehin, Trinity min a thethaw in zong Baptisma tangsahva uh chi khu angaidan uh ahi.

## **2). Baptisma vanzahte:**

Atansah na ua phuiteng ding khu- Pa, Tapa leh Hagau Siengthou min atansah ding uh ahi (Matt.28:19)-chi i gen zouta uhi. Tualeh, Avanzah dingte khu ‘Tui’ ahi ding ahi. Tuabanah, Annasem dingte khu Hattuum in ami guottuum u’leh namdet/thaunu (ordained pastor)-ten atangsah ding uhi. Hinanlezong, Hattuum pawl khat in athangbawl ua, a utut ua a bawlmawh mai uh khu Bible zilsahna toh akikal hi.

## **3). Baptisma khu khatvei maimai tan diing ahi:**

Mangpa khat, ginna khat, Baptisma khat, bangkim Pasian leh Pa khatbou aum hi (Eph. 4:5-6). Tuaziehin, baptisma khu damsung a khatvei tan diing ahia, tulai gindan dihluu khenkhatte’n, amau pawldan a tangloute adem ua, Vangam kailou diing pou in agen uhi. Tuaban ah, apawl ua lutte baptisma atangtha sah zel uhi. Tam khu pawl suina lel ahinuom mama hi.

**3.1). Koite’n Baptisma atan diing e?** Baptisma tan ding thu ah zong ngaidan kibahlouna aumkia hi. Chi-ni (2)-in a khenthei hi. Tuate ahileh, Piching leh Naupang Baptisma pomte leh Piching Baptisma maimai pom a Naupang Baptisma pomloute ahi uhi.

**3.1.i). Piching Baptisma:** Jesu gingta masate khu mi piching ngen ahizieh un piching Baptisma tansah khu Hattuum masate chindan khat zong ana hi mawng uhi. Ahivang in, i Bible uah pichingte maimai baptisma tansah diing thu aumtuom dieh sih hi. Tualeh, pichingte maimai baptisma tansah ding ahi chi pom pawl, adiehin Unau Baptist hattuumte leh adangdangte ahi uhi.

Amaute, pomdan, in Bapsima khu atangpi in kum sawm-le-nga (15)-nuailamte baptisma atangsah sih uhi.

Tualeh, baptisma tang dingte khu atan masangun apientha ding uh ahi chi zong a pomdan uh ahi. Mi piching lou leh piengtha loute khu baptisma tansah lou ding ahiban uah, atanchieng ua zong Tui a phumlut vateh ding chi zong apomdan uh ahi. Tualeh, naupang baptisma leh thethaw atansah zong apom sih uhi.

**3.1.ii). Naupang Baptistma tansah khu Judate bawldan zong ahi:** I sahkhuo biehdan u'leh zuidante u'khu atangpi in masanglai, Juda sahkhuo zui tute chindante ahitangpi uhi. Tam baptisma tungtang ah zong malai a Judate chindan leh bawldante zong zuithei tan in i zui uhi. Thuhun Lui ah, Abraham hun a pat in nausente khu thuhun a ateltheina ding un 'Teep' atansah uhi. Thuhun Tha Hattuum in 'Teep' tangsahlou in Baptisma atangsah zaw uhi. Ahivang in, Hattuum hing lien deudeu in innkuon a Baptisma tang ang um zelzel uhi.

#### **4). Nausen/Naungeh Baptisma thu:**

Naupang baptisma tangsah hattuum liente ahi uh leh, Roman Catholic, Orthodox, Protestant Hattuum a pawllien khenkhat-Anglican, Presbyterian, Lutheran, Methodist leh pawldang khengkhatte in nausen/naungeh baptisma apom un atangsah uhi. Nausen, Baptisma tansah tungtaang ah ngaidan tamtah umnanleh aziehte igen diing uhi.

**4.i). Thuhun Tha ah innkuon a Baptisma tang thum aum ua, Tuate khu:** Innkuon a Juda sahkhuo a lutthate in zong a innkuon un Baptisma atang uhi. Tami bawldan zui in Hattuum masate zong, innkuon a Khristian a lut ut aum leh a innkuon un Baptisma ana tangsah uhi. Tualeh, i Bible uah innkuon a baptisma na tangte igen ding uhi. Amaute:

i). Ludi leh a innkuonte (Nasepte 16:14-15), ah imu ua,  
ii). Phillippi Suongkul ngahpa leh a innkuonpi (Nasepte 16:33)-  
te leh iii), Stephen leh a innkuonpiten, (I Kor.1:16)-ah, baptisma  
anatan thu uh imu uhi. Tamna, igen innkuon thumte baptisma  
tangte lah uah naupangte zong a pan/tel ngei ding uh gintat ahi  
uhi. Khristian innkuon hing pung in innkuon a Baptisma tan khu  
Hattuum masate bawldan ang hita hi.

Tuabanah, Penticost ni a Peter thugen a piengtha mi  
sangthum (3000)-ten, baptisma a tanlai un zong naupang bangza  
e khat pangngei ding a gintat ahi uhi. Tuata zong baptisma a tansah  
laiun khatkhat a tui ban phumlouin a thethaw pawl a baptisma  
tang pawl zong aum ngei ding ua hisap leh ginta ahi uhi. Tualeh,  
atung a igen uh innkuon thum baptisma tangte lah leh Pentecost  
ni-a Peter thugen gingta a baptisma tangte lah ah zong naupangte  
a pang /tel ngei ding uh chi khu i kingahna uh ahi.

### **5). Naupang Baptistma thu Thuhun Tha gendan in:**

I gensa mabang un, i Bible uah Naupang/Nausen Baptisma tan-  
le-tanlou diing thu atuong sih hi. Ahin, Jesu'n zong Naupangte  
akipahpidan leh angaidan imu uhi (Mak. 10:14). Juda sahkhua  
hunlaiin, atate uh Teep atansah u'leh Juda sahkhua sang a lienzaw  
Khristian sahkhua ah vang Juda mi Khristian hite in atate uh  
Baptisma atangsah ngeingei diing uhi.

Tualeh, Baptisma khu Pasion thuchiem bang a hundam tanna  
diing a ingai u'leh Naupang Baptisma khu adeihuoi sem diing hi.  
Baptist Theologian W. Robinson in "Baptisma hi Hattuum a lutna  
lampi ahi" achi hi. Tuaziehin, naupangte zong Hattuum a lut in  
mun anei ngei ding uhi. Reformed Church (Siemphat hattuum)-  
kichite in gingtu nu-le-pa leh atate uh Hattuum member a ngai  
in Baptisma atangsah uhi. Thuhun Tha ah zong gingtu innsung  
a pieng a, a pichin chieng ua baptisma tang imu dieh sih uhi.  
Naupang khu ang pichin leh deiteel theina ang nei hun ngahlou

in, gingu hingal diing a nu-le-pa mawpuohna ahi uhi. Tualeh, Baptisma in “Hattuum mi hina chiemteena leh khiel kisiana etsahna leh Hagau Siengthou a kituitapna etsahna ahileh gingu Baptisma tansah khu sil hoivawt” ahiding hi.

**6). Hattuum masate’n Nausen/naupang Baptisma atangsah uhi:** Awle, Kumzabi thum (3)-na laivel in innkuon leh Naungeh lai a, Baptisma atansah u’khu Hattuumte chindan/zahdan ang hita hi. Tualeh, Naupang/nausen Baptisma tungtaang a Hattuum Pa (Church Fathers)-khen khatte thugen en va-ui:

6.i). Justin Martyr (100 AD)-leh Irenaus (14-200 AD)-te laigel a kipat in Hattuum masaten zong naupangte Baptisma ana tangsah uh ahidan imu hi.

6.2). Hippalytus (170-236 AD)- in pichingte mabang in naupangte zong Baptisma tansah ahi thu uh agen hi.

6.3). Origen (186-253AD), Augustine (354-430)-te’n zong naupang Baptisma tansah ahi thu ana gen uhi. Hattuum masate’n naupang ana Baptis leng zieh un, eite’n zong dan a nei in, i Baptist uhi.

Tualeh, naupangte baptisma itansah chieng un ipawng tansah sih ua, ang pichin ua sie-le-pha ang thei masang ua, anu-le-pa ahiei, a enkoltu penpen in Pasian deibang a, a etkol ding chi a thuchiemna anei zoutah chieng un baptisma tangtu Nu-le-pate’n, atate uh Khrist leh Pasian kung ah, pui in a apkhie uh china ahi. Mangpa thununna leh zilsahna a khanglien sah diing in akichiem ua, amau zong akilan ngal uh chi a ensah hi. Tam khu, Nu-le-pate bawl lawm mawng zong ahi. Tuabanah, naupangte khu ang pichin ua sielephpha ang thei chieng un, hattuum in pichingin ilalut ua, tuami nua a khelna abawl u’leh ama uh mawpuoh ahita uhi.

## 7). Baptisma phattuumnate:

Baptisma khu hundamna itanna diing ua itan diing uh ahisih a, hundam taten hundamna itan ziehua itan ding uh ahi. Pienthana etsahna, namdetna, leh puonzahna chiemtenate ahi uhi. Mangpa Jesu ngel in amite chiemtena (seal)-diing leh Hagau sil poimaw a tanna uh hi diing in ana siem a, ana namdet ahi.

Awle, ken zong naupang ni baptisma ka tang sah hi. Vangsiet umtahn, ani-un ang muolliem san ua, ashi ni-un a programme ah baptisma katan sah thu a kigel uhi. Tualeh, tangsah lou-in shi le uh anu-le-pate ding in lungsim nop louna anei ding uhi. Nu-le-pate bang a, Pasian gam luo ding leh satan nei ngei ding ihisapna ua itansah uh chi lei zong i chi khiel sih ding uhi.

## Dohnate:

- 1). Baptisma tansahdan chibangza aum ei?
- 2). Baptisma bangzavei tan diing e?
- 3). Piching Baptisma bang china e?
- 4). Judaten baptisma lim-le-guong ding anabawldante uh gen in?
- 5). Bang ding a Naupang Baptisma itansah uh e?
- 6). Hattuum Pa (Church Fathers)-khenkhatten Naupang/nausen Baptisma anatansah dan uh gelte koikoi e?
- 7). Baptisma phattuumna bang e?

~~~~~

## Bung -22

# MANGPA NITAH ANN TOH KISAI A NGAIDAN LEH GENDAN TUOMTUOMTE

### ***Thuchiin ding:***

*“Tuachia ann anehlai un Jesu’n annpheng a la a, guoljawl in aphalsuo a, a nuazuite pie in “Tam ka tahsa ahi, la unlen ne un” achi hi (Matt. 26:26).*

### **1). Thumapui.**

Mangpa Nitah Ann (Holy Communion)-khu hattuumte silbawl/zah poimaw khat ahi. Masanglai a pat tunitan in, hattuum hindan tungdingtu leh hattuumte Pasion biehna poimawtah ahi. “Mangpa Nitah Ann” khu Mangpa shina thei zingna ding a Annpheng leh Grape tui nehkhawm leh dawnkhawmna ahi”

### **2). Ang umna zieh leh aphutkhetu:**

Mangpa Jesu khu ashidiing kuon in anuazuite toh Peikan kut annkuong a im ua, ann aneh lai un Mangpa Nitah Ann (Sacrament)-ang siemkheta hi. Tami, Sacrament tungtaang a thupiehte khu Khantanhoi bute leh Korinth laihahte ah imu uhi (Matt. 26:26-29; Mak. 14:22-25; Luk. 22:17-20; I Kor. 11:23-36). Tami, Bible tangte a pat in Mangpa Nitah Ann khu Mangpa Jesu siemkhiet ahi ngeina chi akilang hi. “Nang theizingna diing un tam khu bawl zing leng un:” achibang ngei in, hatuom masate a kipat tunitan in i bawlzom zing uhi. Tualeh, Mangpa Nitah Ann ang pienkhietna zieh ni aum hi:

2.i). Khrist toh annkuong im a kipawlkhawmna ahi. Jesu leitung aleenlai in anuazuite tami Nitah ann a impi a, tuni dawngin tami annkuong toh apawl zel a, athawkiazou in zong annpheng leh Grape (Leengga)- tui in apawl kia hi.

2.ii). Jerusalem Pindan tungnung a Jesu thugen leh silbawl khu (I Kor. 11:23-26; Mak. 14:22-25; Matt. 26:26-29; I Kor. 22:1-20). Annpheng leh Grapetui ala a, athuoh diing etsahna in a zang hi. Tamna annkuong a im u'khu Peikan kut chi'n Mak in ang hil hi. Hundang a Peikankut ann a neh leng u'khu tuahun in umzie neitah in a impi hi.

**3). Hattuum pawl tuomtuomte pomdan/ngaidan:** Awle, sildang bangma in Mangpa Nitah Ann tungtang ah zong ngaidan tuomtuom a um a tuate i suiding uhi.

**3.i). Roman Catholic hattuumte Ngaidan:** Mangpa nitah ann (Annpheng leh Grapetui)-khu Mangpa kung a lat a, Siempi in phuiteng asamzou chieng in, Annpheng leh Grapetui hitalou in, Mangpa Tahsa-le-sisan tahtah ang suohta hi achi uhi. Tamkhu Transubstantiation chi ahi.

**3.ii). Lutheran Hattuum Ngaidan:** Pastor/Siempi in phuiteng asamzounua in zong Annpheng leh Grapetui ma ahinalai/veve ua, ahin, Mangpa Tahsa-le-sisan khu Annpheng leh Grape tui ah ang tel a, ang kizopta uhi Tuakhu, Consubstantiation akichi hi. Tuami in Khrist Tahsa leh sisan ah silbawltheina ang neita hi. Gentena dingin, sia (iron)-mei a i em leh hingsa in ang sanpimpem a, ahivang in sia ahina abeituom sih hi. Tuabangma in, Khrist sisan in ang kizopi/pawlpi zieh in thahat in sil abawlthei hi achi uhi.

**3.iii). John Calvin Ngaidan:** Annpheng leh Grapetui ah Khrist khu Hagau in ang jau/tel hi. Hagau lam guoljawlna leh kipawlina siengthou in ang zopta hi. Khrist tahsa-le-sisan etsahna ahi a, a etsahna maimai vang ahisih a, Mangpa khu Hagau in ang tel hi. Tam khu ei Presbyteriante ngaidan zong ahi.

### **3.iv). Zwingli Ngaidan:**

Khrist thuohna leh tatna i theizingna diing ua ibawl uh ahi. Tuami, theizingna khu i Hagau ua diing in ann ahi. Annpheng leh Grapetui khu tuami chiemtena a muthei a ineh leh dawn diing uh ahi achi hi.

### **4). Mangpa Nitah Ann toh kisai a gendan tuomtuomte:**

#### **4.i). Mangpa Nitah ann (I Kor. 11:20).**

Mangpa Nitah Ann chi ahichieng in, theizingna lam a uong gen hi. Khrist in ei-a dia a sepsa leh ang seppieh nahlai diingte ang theisah hi.

**4.ii). Kipawlana siengthou (Holy Communion):** Tualeh, kipawlana siengthou chi khu (I Kor.10:16)-ah i mu uhi. Hattuumte'n, ahingzing a Mangpa uh toh kipawlana siengthou in azang ua, tamnah mizousie/gingtu zousie tami kipawlana ah a pang uhi.

**4.iii). Kipahthu genna (Eucharist) ahi.** Tam khu Thuhun Tha hun in alang seng sih hi. Ahin, kumzabi Nina ah **Ignatian** in ang zang masa pen a, masanglai in Hattuumte'n azang uhi. Khrist nnasep ziente, Thawkiana leh guoljawlna ziente, Mangpa umpina ziente, Pasian in neh-le-dawn diing ang pieh ziente a kipahthu genna lam akawh hi.

**4.iv). Kithoina (Sacrifice):** Tam khu Leitung khelna a diing a Khrist nnasep gingtu in apuonzahna leh Khrist a diing a gingtu kilatna/kipumpiehna lam a ensah hi. Tualeh, Mangpa Nitah Ann genchetna diing in hamkam kiching aum thei tahtah sih diing hi. Ngaidan khat ah gingtute kung a hagau silpieh tanna diing a vanzah khat ahia, alelam ah ahileh, gingtu in Pasian itna/ lungsietna atanna vanzah zong ahithehi hi. Tualeh, tam Mangpa Nitah ann (Sacrament)- ineh chieng un loupitah a Khrist hing peikiana diing khu i ensah leng uhi (Mak. 14:25; I Kor.11:26), chi zong i manghil sih ding uhi.

## **5). Mangpa nitah ann vanzahte'n a etsahte uh:**

### **5.i). Annpheng:**

Anpheng in Hagau lam ann, neh diing mawng ahi chi a ensah hi. Koizong, tam annpheng nete khu ahingzing diing uhi. Jesun “Kei Van a hing kipan annpheng ka hi” achi hi.

### **5.ii). Grapetui:**

Grapetui dawn diing dihtah khu ahi. “Adawntapou in kumtawn hinna anei diing uhi.” Leitung damna diing a Kalvari a kipat Jesu tahsa a kipat a sisan leh hinna tui hing luong khu a ensah ahi.

## **6). Ahawm diing hun leh dante:**

Hattuumte sih-le-taang a, Mangpa Nitah ann hawm diing in Pastor-te guot ahi ua, amaute kithuohpi diing in Hattuum Upate guot ahi uhi. Mangpa Jesu in Mipi sangnga (5000)- avahlai a, anuazuite kung ah mipite kung a hawm diing a apieh bang in, eite'n zong mipite kungah atouna mun uh izuon un ipeleng uhi. Hattuum khenkhatte'n ahi kia leh maitam phung ah vapeiua, tuachin a hawmten ana apie uhi.

Tualeh, Mangpa Nitah ann lui/hawm hun thu ah Thuhun Tha in puihuoina chiengtah asiem sih hi. Nasepte 2:7-in agendan in, Pasianni chin in ahawm uhi'n agen hi. Tueleh, Nasepte 2:46-ah, ahileh nichin a ahawm uh bang a ngaituo thei hi. Kumzabi nina, lamah khun ‘Didakhe’ bu in agen dan in, “Mangpa Ni’ chin in ahawm uh hi’n a gen kia hi. Ahun binei vang a hamsa a, i Dan bu un kum khat sung a a tawmpen a thumvei beh hawm diing in agen hi. Ahivangin, tuaza mai hawmding ahiei ahisih leh bieltot ding china vang ahisih hi.

## **7). Mangpa Nitah Ann hawmdan/bawldan tuomtuomte:**

7.i). Nasemtu, Pastor in nuazuite (Upate)-khu Maitam phung ah ahan a, adinguolsah a, akung uah Annpheng leh Grapetui apie a, tuazou in mipite kung ah ahawmsah hi. Tami'n a etsah ahileh

- Khrist khu eite kithoina diing in ama-le-ama ang kipie a, ama ngel khu midangte a diing in akipie chi a ensah hi.

7.2). Nasemtu, Pastor khu Maitam bul a ding in mite khu han in ana pie hi. Tami'n a etsah ahileh - Jesu nei diing in akunglam izot uh angai hi chi a ensah hi (Johan. 6:37). Jesu Khrist in "Koizong ka kung a hing peitapou a notkhe sihvang" achi hi (Johan. 6:7).

### **8). Mangpa Nitah ann inehna ziehte uh:**

8.i). Mangpa shina zieh a hundam ihi uh itheizingna diing un (Luk. 22:19). 8.ii). Jesu Khrist kithoina Pasian hing pieh ahi (I Johan. 1:3). 8.iii). Jesu Khrist khu igintat ua ipom zieh uh (Late 116:12). 8.iv). Ashina khu ihundamna diing uh ahizieh in (Heb. 10:10; Eph. 2:4)- chite ahi uhi.

### **9). Mangpa Nitah ann nedingte thei diingte:**

9.i). Akhelnate uh akisia diing uhi (I Kor. 11:28; Joel 2:12). 9.ii). Hinna tha a ahin diing uh ahi (Rom 6:5). 9.iii). Khrist amau ua dia akipiehna khu apoimawtahzet uhi chi akithei diing uhi (Mak. 10:45; Johan 10:11). 9.iv). Kipahtah in Khrist shina atheizing ding uhi (Rom 5:8; Kih. 1:5). 9.v). Mizousie a it/lungsiet diing hi (Matt. 5:44; I Pet. 1:22)- chite leh adangdangte zieh ahi uhi.

### **10). Mangpa Nitah ann phattuomnate:**

Mangpa Nitah Ann (Sacrament) phattuomna leh lawhna khu avanzah ahei, ahisihleh a semtu ah akinga sih hi. Ginna a im a netu in, Hagau Siengthou zieh in guoljawlna atan zieh in aphatuom hi. I tahsa in Annpheng leh Grapetui ahatpi leh hoipi mabang in, i hagau lam hinkhuo uh suhhatding leh suhhoina diing in Mangpa Nitah Ann khu aphatuom hi. Gingtu hinkhuo sudettu, kipumkhatsahtu leh Khrist lam a kainaitu zong ahi.

**Dohnate:**

- 1). Mangpa Nitah Ann koi siemkhiet e? Asiemkhietna mun hei sung e?
- 2). Mangpa Nitah Ann in a etsah chini hing gen in?
- 3). Roman Catholics te'n Mangpa Nitaah Ann bangchibang in agen uoi?
- 4). Lutheran Hattuumte'n Mangpa Nitaah Ann agen dan uh hing gen in?
- 5). Ei Presbyterian Hattuum (John Calvin)- in Mangpa Nitaah Ann bangchiin agen ei?
- 6). Mangpa Nitaah Ann inehna ziehte bangbang e?
- 7). Mangpa Nitah ann phattuumna bang e?



## Bung -23

# GINGTUTE BAWL DIINGTE

### ***Thuchin ding:***

*Mi pawlkhate bangin ikikhopnate uh tawpsan sih vai, hinanleh khat leh khat kihantawhtuo vai zaw vai, tualeh ni a hing naita chi na thei ziehun kihantawh tuo semsem vai.” Hebru 10:25).*

### **1). Thumapui.**

Awle, tuin gingu khat hina dawl a i sep ding u’leh bawl ding ua kul-le-poimaw khen khatte igen ding uhi.

### **2). Thumna neizing ding ahi.**

Thumna khu ei gingtute a dingin hagau lam a i nahna uh ahi. Thumna khu i Mangpa Jesun tam leitung a aumlai in nasatahin athum zing hi. “Tualeh ama khu kidapguh in munsip lah ah thu angen tuuh hi” (Luk. 5:16). Thumna khu Pasian toh kipawl na leh ikul-le-poimawte akung a tutna leh ngetna ahi. Tualeh mihing leh Pasian kihouna zong ahi.

Tualeh, gingu thumna ngaisahloute khu Hagau lam ah ahat ngaisih diing uhi. Gamdai gangaw a singkung pou tui kitaploute khu akhantheilou bang un, gingu thum ngailou khu a khangthei sih diing ua zong ahat theisih diing uhi. Miten, Billy Graham adam lai a, ahatna thuguh adawh uh leh: i). Thumna, iii). Thumna leh iii). Thumna ma achi hi. Amamai ahisih a, khawvel

a Pasion mizah leh lawchingte thuguh khu tami Thumna ma ahi chiet uhi. Thumna inei chiengun, Pasion toh kihou i hiban uah, adieh a en, Pasion kung a i kul-le-poimawte genna ahi. Martin Lutherin, hattuom sung a, Reformation abawllai in, “Tunin ka buoita luo dahkal thum (3)- maimai ka thum ding” achi hi. Abuoilou chiengin dahkal bangzat a thumta diei?

### **3). Bible sim zing ding ahi.**

Bung masalam ah, Bible apoimaw dan leh nnasepthei dante igenta uhi. Tualeh, Bible isimchieng un Pasion in ikung ua thu ang gen china ahi. Masanglai hileh tu a, Pasion mizahte khu atangpi un, Bible sim taima leh ngainate ahi uhi. Eiten Bible sawm guh-le-guh (66), ineitah ziehun, Pasion in tami Bible sung a thute in ang houpi in pawl zing hi. Tulai, hagau mi kichi khen khatte in, Bible sim a Pasion aw zahsengin amau ngaidante khu Pasion Aw bangin agen ua, tambang a peite khu apei khiel/suolthei uhi. I Bible ma ua i kibunphu zing ding uh ahi. Tua hileh, tahsa-le-hagau ah i khang dih thei ding uhi.

### **4). Mangpa Ni nit siengthou.**

Nipini/Pasianni/Mangpani (Sunday/The Lord’s day)-khu Hattuomte a dia Ni poimaw tah ahi. Bible geltute in tami Ni khu ‘Nisagi ni masa pen’ achi uhi. Sunday tan ahina zieh khu i Bible uah chiengtah in imu uhi. Paul leh Tras khuo a Khristiantie in tami Ni sagi nimasa pen ah kikhawm in Tanghoute aphalsuo uhi (Nasepte 20:7). Paul in Korinth Hattuomte khu Mangpa Ni (Pasion ni) ni-a kikhawm a silpiehte lakhawm diing in angen hi (I Kor. 16:12).

I Mangpa Jesu thawkiani ahizieh in gingtute’n kipawlkhawm a ann pheng phalsuo a, thumkhawmna diing leh kisuhhatna diing in izang leng uhi. Sabbath sang a Sunday zah ahi thu khu Hattuom Pate (Barnaba, Ignatist, Justin, Martar, Ireniast, Tertulian, Origen, Cyprean) laigelte ah chiengtah in atahlang uhi.

Kihilna gieltu Johan ngel in zong, Jesu kihilna amuna ni ahi (Kih. 1:10). Tuaziehin ei, gingtute in tami ni khu hoitah a init a Pasion toh kipawlna ni a i zah diing uh ahi. Tualeh, Sabath Ni man khu unau Sabath hattuumte zah ding mong ahi a, ei Khristiante khun i Mangpa shina zou a, athawkiani imang uh ahi chi imanghil sih ding uhi.

#### **5). Biehna nei diing a kimutuo zing diing ahi.**

Khristian, mawpuohna leh hagau lam khanletna diing a sil poimaw khat khu Biehinna kai ahi. Gingu hat leh hatlouna khat zong khu Biehinna kai taima leh taimatlou ah a akitheithei hi. Hebru 10:25- ah “Khenkhat chindan bang hilou in akikhop uh tawpsah sih va-ui” chi imu hi. I dam liei leh kikhop/Biehinna kai pibawllei Hattuum hat leh pichinlam manaw zing i himai diing hi.

#### **6). Silpieh:**

Khristiante mawpuohna khat ahikia leh Pasion guolzawlina imu bangbang a sawm-a-khat leh silpieh tuomtuomte Pasion kung a pieh ahi hi. Luk. 6:38-ah “Pie in tuachi in pieh in umvateh” chi imu uhi. I Bible i et u’leh Pasion in mizousie kung a, aphut khu Sawm-a-khat ahi (Malaki 3:1-10). I Haitha masa penpente zong ipe diing uhi (Exo. 23:19). Mangpa masang ah koima khutguoh in ikilah diing ahisih (Exo. 16:16) chite imu uhi.

Pasion kung a silpieh pe utlou khu Pasion suomna leh guhtatna ahi. Pasion guoljawlna hing lut diingte dalna zong ahi chi in agen hi (Malaki 3:10-11). Pasion in A tapa neisun ang pieh ziehin eite’n zong i neizousiete itlou kei in ipediing uhi. Tulai a sildahuoi khat ahileh, Pasion thu-awi leh sakhuomi dihtah hi a kingai a, Sawm-a-khat leh silpiehte ngaisih chia zilsahna khu ahi. Tambang khu i Bible uh toh kikalna leh pawldihlou ahina kilahna ahimai hi. John Wesley in, “Mi apientha leh asumbawm zong apientha ding ahi” achi a, agendih hi.

## 7). Manggam nasepna.

Gingtu zousie leh Hattuumte nnapi pen khu Missionary nnasep ahi. Tam khu Pasian lungsim leh adeidan ahi. Pasian in Missionary nnasep angaikhoh mama a, tuachi'n Atapa neisun ahingsawl a, tualeh Jesu'n eite ahing sawlsawn hi (Matt. 28:18-19). Missionary nasepna khu lam thum in isem thei uhi: Tuate:

7.1)- Eima vakuon diing, 7.2). Silpieh a sep diing leh 7.3). Thumna/Thungetna toh sep ding chite ahi uhi. Tamteng lah a khat teitei a gingtute ipan diing uh ahi. Hattuum Missionary nnasep ngaisahloute khu Tuipi shi/Dead sea toh gente ahi uhi. Tuipi shi khu hinna neilou kei in a pumvei depdup toh akibang uhi. Ahin, Pasian thupieh bang a Missionary nna sem dia hattuumte'n pan ilah chieng un hagau guoljawlna tamtah idong diing ua, Galili Tuipi bang in hinna leh sienthoua in idim diing uhi.

## 8). Jesu hing pei ding lam en tah a ngah ding ahi.

Ei gingtute pen, Mangpa Jesu hingpei/kilah hun ngah a gin-umtah a hing diing a hatte ihi uhi. Pasian in ama diing a shingal pai diing in ang han sih a, ama diing a gin-umtah a hingzing a, ama lam-enzing ding in ang dei hi. Ama a diing a hin khu Khristian hinkhuo ama deibang leh Khantanhoi toh kituohsah diing china ahi. Tam khu, Leitung leh Pasian in gingtute hinkhuo a, a lam-etzing ahi. William Barclay in "Pasian gam kehletna hoi pen khu Khristian hinkhuo hoi nei ahi" achi khu agen dih mama hi.

### Dohnate:

- 1). Thumna poimawna gen in?
- 2). Bang dia Mangpa ni (Sunday) i nit diing uh e?
- 3). Bang dia Pasian kung a silpieh ipieh diing uh e?
- 4). Bang dia Missionary nna isep diing uh e?
- 5). Jesu hing peikia hun bangchi ngah diing e?

~~~~~

**MISIENGTHOUTE LAHTOUNA (RAPTURE),  
HUN HAMSA (TRIBULATION), JESU NIVEI  
HINGPEINA (SECOND COMING)  
LEH KUMSANG VAIHAWMNA THUTE**

***Thuchin Ding:***

*“Ngaiun, thuguh kiphuol ka hing hilding hi, i unpi un i imu sieng sih dingua, hinanleh i unpi un suhlandang in i um sieng ding uhi.” (I Kor.15:51).*

**1). Thumapui:**

I Thugin uh tawpna khu Mangpa Jesu hing peikia diing thu ahi. Tualeh, ang peikiana diing khu nivei ahidiing hi. Amasa khu misiengthoute ladiing in ahing pei ding a, ani-veina khu migiloute tung a vaihawm pieh diing in ahidiing hi.

Ahin, tam atung a thute rapture, second coming leh kumsang vaihawm ding thute ahi uh leh hattuom din chil a kipat tunidong in mite lung buoina leh ngaidan/pawmdan tamtah a umziehin, isuiding uhi. Mangpa Jesu Khrist hing pei ding thu leh tamna igente uh khu Kihilna bu sung a alai/thugil pen achithei ding hi. Tamte khu Bible in ‘thu guh kiphuol’ achi hi. Tam ‘thuguh kiphuol’ chi hamkam Greek hamin, ‘mysterion’ ahi a, Saphamin, ‘mystery’ chi ahi.

Tualeh, Thuhun Tha ah 27-vei akigiel hi. Sawltah Paulin, “Ngaiun, thuguh kiphuol ka hing hil ding hi” (I Kor. 15:51)-ah achi hi. Aumzie khu, ‘sil kiphuol’ ahi a, sil kiphuolte khu atangpiin, Pasian kumtawn lemguat, ahuntah a hingtung leh puonzah a umte ahi uhi. Tualeh, mitamtahte ngaidan in rapture leh second coming-te khu akibang leh khat vei atungkhawm ding bangin ngaidan aneithe i ua, ahin ahiloudante isuiding uhi.

## **2). Misiengthoute lahtouna (Rapture):**

Saphama a ‘rapture’ chi khu Latin ham a, ‘rapere’ chi a kipat a kiletkhie ahi. Rapture pen Jesu khu tam leitung a hattuumte (Ama gingtute), amousiengthoute hing pui ding a huikhuo a, ang peina ding khu rapture ahi. Mangpa hing pei ding dan, Sawltah Paul in “Mangpa khu Pasian pengkul aw toh Van a kipat in hing kumsuhva” (I Thes. 4:16)-chi’n agen hi.

Rapture hun chieng in Mangpa khu leitung ah ahing kum sih ding a, huikhuo ah, a misiengthoute toh kituoh ding in suhlam dang in ium ding uhi. Sawltah Paulin chiengtahin a gen a, “... kinepna neilou midangte banga, na lungkhamlouna ding un, i mute tungtang na theilou uh ka deisih hi.... Eite Mangpa hing pei donga, dam a na um nalaiten i musate/mishisate i makhel sih ding uhi. Aziehpén, Mangpa ngei khu kikou aw toh, tualeh pengkul ging toh Van a kipat hing kumsuh ding hi.

Tualeh, rapture chiengin gingtu Khrist a, shisate, Abel a kipat a tuahun tan (rapture)-tan a shimasate athou masa ding ua, tualeh gingtu ahing nalaite suhdang lam a um in, huikhuo ah lahtouin i um ding uhi. Tuazou chiengin, ei hing a na umnalaite huikhuo ah, Mangpa tuoh ding in amau toh meipi lah ah lahtouin i um ding ua, tuachi’n kumtawn in, Mangpa kung ah i umta ding hi. (I Thess. 4:13-17).

Ahin, silda umtah khat ahileh, ginglou/piengtha lou a shite khu rapture chieng in kaithawin aum sih ding ua, Mangpa hing pei kia chieng (Second Coming)- chieng in siemlou tang ding in kaithou in aum giap ding ua, tuachin siemmaw tangin kumtawn gotmun lam zuonin aumta ding uhi.

### **2.1). Rapture bang chih chieng a tung ding e?**

Tualeh, rapture khu bangchih chieng a hingtung ding e chi akitheitheih sih a, thakhat thu a i theilou kal ua hing tungding ahi a, hun khat pou pou a tung thei zing ahi (Titus 2:13; 1 Thess.

4:13-18; 1 Kor. 15:50-54). Mangpa Jesun zong ahunding ahileh, Tapa leh Vansawltahle'n zong a theisih ua, Pa lou ngalin atheisih achi hi. Tualeh, ahun thu ah 'Guta' bang a hing pei diing (I Thes. 5:2)-ahidan agen hi. Guta bang in ang pei diing achina khu kiging zing a um apoimawdan agen utna zieh ahi. Nungah sawm mounaipa ngahte thu, suoh gin-um leh gin-umlou thute in Jesu hing pei diing thu toh kisai a kisahhol leh kigingsa a um zing apoimawdan ang hil hi.

Tualeh, rapture zou chieng in hun hamsa (Tribulation)-kum sagi sung aum ding a, tuazou chiengin Jesu hing pei kiana (Second Coming)- ang um kia ding hi chi khu igin dan uh ahiban ah Bible in ang hildan zong ahi.

### **3). Tribulation umding dan:**

Kihilna bu a gingtute lah touna (rapture)- nua ah, hun hamsa (Tribulation)- tunding dan gindan chithum in akhen uhi. Tuate i en ding uhi:

#### **3.i). Pre-tribulation rapture:**

Tami umzie ahileh hun hamsa (tribulation) hingtun masangin, misiengthoute lahtouna (rapture)-aum masa ding chi ngaidan nei pawl aum `uhi. Tami ngaidan khu eite ngaidan leh pomdan uh zong ahitangpi hi.

**3.ii). Post-tribulation rapture:** Tami umzie ahileh leh hun hamsa (tribulation) hingtung masa ding a, tami hun hamsa khu ei gingtute in zong i paltou/phutou ding uhi. Ahin, tami hun hamsa lah ah zong Pasian in ang kemit ding hi achi uhi. Tambang, hun hamsa lah ah zong gingtute khu dettah leh hangsantahin iding det ding uh chi'n ngaidan anei uhi, Tambang pawlte ngaidan in, Kihilna 13:7, 10-te ah, atung a ngaidan bang a, misiengthoute lahmang sieng hita leh, tam bung sungte a 'misiengthou' achite khu koite ata diei le? chi'n panmun akhaw uhi.

**3.iii). Mid-tribulation rapture:** Mi khen khatte in misiengthoute lahtou hun khu hun hamsa (tribulation) laikim tah a hing um ding in ngaidan anei uhi. I gensa bangin eite ngaidan leh pomdan khu amasa pen ahi chi khu imanghil sih ding uhi.

#### **4). Second Coming (Mangpa hing pei niveina).**

Tami ahileh, Khrist leitung a, ahing pei kiana tahtah kum sang Manggam tungding ding leh vaihawm ding a ang peina niveina hun ahiding hi. Tuachin, vansawltah zousie leh mi siengthou rapture a lahtou a umte zousie toh ahing pei kiana ding hun ahiding hi. Tam khu, Khrist kihilna/kilahna nukhia pen zong ahiding ziehin, ‘Kihilna bukim’ (Final revelation) akichi hi.

Tuabanah, second coming chiengin Mangpa Jesu khu huikhuo mai hilouin, leitung Olive muol khu akengin ang tuon ding hi (Zak 14:4). Tuachieng in, leitung a mi siengthoute leh Nam telte khu Gamsahang bawlgentheina lah a kipan in ahundam ding hi (Kihilna 19:14).

#### **5). Rapture leh Second Coming kibahlou dan.**

Atomkim in gentalei, ‘rapture’ leh ‘second coming’ kibahlouna ahi uh leh- rapture ahileh Mangpa Jesu amisiengthoute lading a, ahing peina (coming for the saints) ahi a; second coming ahileh amisiengthoute toh vaihawm ding a, ang peikiana (coming with the saints) ahiding hi. Tualeh, rapture misiengthoute lahtou ni ding hun theichet hisih nan leh, loupitah a hingpei kia ni (second coming), ahileh rapture zou/nua kum sagi zou chieng in ahiding a, Daniel hapta nua ahiding khu guolnei/zawlnei Daniel in ana gen zouta hi (Dan.9:27).

Tualeh, rapture leh second coming pen akibang/hunkhat hitaleh, gingtuten kum 7-vaihawmna chizathuoi atuoh uh angai ding hi (1 Thess. 5:9; Kihilna 3:10). Ahin, Pasian in amite genthei ding aphalsih a tuazieh in gentheina athuoh masang un ala tou sieng ding hi.

**Dohnate:**

- 1). Sawltah Paulin thuguh achi khu bang e?
- 2). Misiengthoute lahtouna (rapture) umding dan gen in?
- 3). Hun hamsa (Tribulation)- umding dan gindan chithum gen in?
- 4). Second Coming (Mangpa hing pei niveina)- umding dan gen in?
- 5). Rapture leh Second Comingte kibahlounate gen in?

~~~~~

## Bung-25

# THAWKIANA, THUKHENNA, KUMSANG VAHAWMNA THU

*Thuchin ding:*

*“Kei Thawkiana leh Hinna ka hi, koi zong kei hing gingta khu shinanlezong a hing zing diing” (Johan 5:28).*

### 1). Thumapui.

Awle, tami bung a igending uh thute khu atung a toh kizopmat ahi uhi. Tualeh, atung a i gen bangun nitawpni chieng a, siltung dingte atangpi in isui ding uhi. Tamte khu silhamsa leh thei chet hamsatah ahi uhi.

### 2). Thawkiana thu:

Mishite adiehin gingu sisate kaithaw in umva-uh. Tualeh, Paul hunlai a pat in mi khenkhat in thawkiana khu gingta louin, ‘tuhun a tung ahita’ achi uhi (II Tim.2:18). Zilsahna dihlou khen khatten, mishite thawkiana khu Khrist gintat zieh a hinkhuo tha nei na ahi achi uhi. Tuabanah, Thuhun Tha a kilah/mubangin in apomthei sih uhi. Gingu ashi leh ahagau khu Pasian kung ah apei a, amau diing in Jesu ang peikia ahitamai a, tahsa Lei nuoi a phumsa leh ganhing in a nehmang siengsate khu athawkia diing dan atheizoulou zieh un agingta thei sih uhi. Tuabang mite kung a Jesu dawnna khu: “Khum in Jesu’n akung uah, theikhiel

ma u chie, Laisiengthou thu leh Pasian silbawltheina na theilou zieh un hizuh a” achisan ding hi (Matt.22:29). Eite’n a umzie/ angaina itheilou zousie uh zong khu Pasian in abawl thei ahi chi imanghillou diing uh ahi.

Tualeh, mishi thawkiana thu khu Jesu thawkiana thu ah akinga hi. Mangpa Jesu thawkiana thu khu genmang sawm a, thudihlou chia gen in aumzing a, nuazuite’n aguhmang uh chite bang, anuazuite’n amukhiel uh hiva chite bang, thu kigen maimai hiva chite leh a shibang a kilang, a shitahtahlou ahi chibang, zuoule-nal thu tampi Mangpa Jesu thawkialai in ana um hi. Ahivangin, Jesu thawkiana adihna khu koiman anielzou sih ua, nuazuite khu adihna mit a mutute ahi uhi. Jesu thawkiana thugin khu Leitung a Hattuum zousie thugin ahi a, ‘Tahsa thawkiana ka gingta’ chi khu ipomdan uh ahi. Gingtute tahsa thawkiana khu bangchibang hi diing ahei chi pen mi tamtahte in na sui in na ngaituo uhi. I theithe diing ua um khu ahileh Khrist thawkiana tahsa bang ahi ngei diing chi khu igintat dan uh ahi.

Tualeh, atomkimin, Tahsa thawkiana igenlai un bangpen e athoukia diing? I gensa bang in ahasa mama a, itahsa muotthei pen ahisih diing chi achieng mama hi. Suhlamdang tahsa nei in ithoukia diing uhi. Aziehpén, tahsa leh sisan in vangam aluo thei sih diing hi chi imu uhi. Thawkiana thu khu haichi toh gente thei ahi. Haichi itu pen khu ang pou chieng in ang lamdangta a, tua toh kibang diing ahi.

### **3). Thu khenna aum diing hi.**

Thuhun Tha in thu khenna aum ngei diing chi ang hil hi. Tam thu khenna a siemmaw tang diingte dinmun khu ahuoise diing hi. Laisiengthou in adinmun uh sietding dan tambangin gen hi - “Leitung pumpi nei uhenlen, ahin na uh taan u’leh amau a diing in bang aphatuom diei”? achi va-ia hi. Tualeh, Juda Iskariot

zong khu pienda konleh ama diing in hoizawva achi hi. Tamte in adieh a piengthalou a Pasian thangpaina vaihawmna tang diingte dinmun azauhuoidan a ensah in agen hi. Khantanhoi thumte in vaihawmna khu leitung tawp chieng a um diing in agen uhi.

Gingloute leh migiloute khu siemmaw tansah in aum diing uhi. Aziehpen, adamsung ua a hinkho mandan bangtah ua vaihawm pieh a um diing ahi uhi chi khu Laisiengthou in ang hil dan ahi. Mizousie tung a thu khenna um diing a, igintat bang un mizousie thawkiana zong aum diing hi. Jesu'n Martha kung ah "Kei Thawkiana leh Hinna ka hi, koi zong kei hing gingta khu shinanlezong ahing zing diing" (Johan 5:28)-chi'n agen hi. Tualeh, "Sil gilou bawlte zong siemlou tang in athoukia diing uhi" (Johan 5:29)-ah imu uhi.

#### **4). Kumsang vaihawm hun.**

I gensa bangin, Kumsang vaihawmna thu khu masanglai a kipat, tuni dawng a mite buoipi leh ngaidan zong akibang sih hi. Hei pen ngaidan ah ium uoi chi khu eima-le- eima iki-en ding uhi. Tuate khu:

4.i). Kum sang vaihawm masangin Mangpa Jesu ahing pei ding hi (Pre-Millenium). 4.ii). Kum sang vaihawmnua ah Mangpa Jesu ahing pei ding hi (Post-Millenium). 4.iii). Kum sang vaihawmna aum sih ding hi (A-Millenium). 4.iv). Kum sang vaihawmna khu Mangpa Jesu satan/mawpuoh ahi (Pro-Millenium). 4.v). Kum sang vaihawmna ah i umzing uhi (Realised-Millenium). Tam ngaidan ngate khu Pasian thu siem (Thelogian)-te ngaidan tuomtumte ahi uhi.

Ahin, tam ngaidan chi nga (5)-te lah ah, amasapen khu eite ngaidan toh akituoh pen ahi. Aumzie ahileh, Kum sang vaihawm masangin Mangpa Jesu ahing pei ding hi. Tuaziehin, adangte gen tamlouin eite ngaidan toh kituoh pen tawmkim in igen ding uhi.

### **5.1). Mangpa Jesu khu kum sang vaihawm tunmasangin ahing pei ding dante:**

5.1.i). Khrist hing peikia masangin leitung ah ginna tawpsanna/nuatawlina thupitah aum ding hi. 5.1.ii). Khrist khu thakhat thu in aguh in, amisiengthoute ladingin ahing pei ding hi. 5.1.iii). Khrist doudalpa'n kum sagi sung leitung ah vai ahawm ding a, tuahun sung khu thuohgimna hun ahiding hi. 5.1.iv). Tualeh, Khrist khu loupina leh silbawltheina toh hing pei kia ding hi. Tuabanah, Armegedon kidouna ah Setan azou ding hi. Khrist in Jerusalem ah kum sang khat sung vaihawm in, tempul silte leh kithoinate atung ding kia ding hi. 5.1.v). Kum sang gam nua in, Setan khu hakhieh ahiding a, Pasian dou in, atawp ah zaw in aum ding hi. Tam khu, migiloute thokiana leh vaihawmna nukhia in zui ding hi. 5.1.vi). Setan leh Khrist doudalpa khu akidouna ah atawp ah zaw in aum ding hi. 5.1.vii). Mishite khu hing thou in, misiengthoute'n Khrist toh van laizawl ah kituoh in, tahsa pumpi tha khu atang ding uhi. 5.1.viii). Vaihawmna nukhia ahing hi ding a, Setan leh migiloute khu gawtmun a pai a um in, mi dihtatte khu Mangpa toh kumtawn a tengkhawm ding in, apeita ding uhi. 5.1.ix). Leitung khu mei a suhsiet in aumta ding a, Pasian in van tha leh lei tha bawl in, tuanah midihtatte ateng ding uhi. Tam lei tha khu misiengthoute'n kumtawn, kumtawn in aluota ding uhi.

### **6). Gingtute dinmun diing khu.**

Gingtute um dingdan chithum aum thei hi. Tuate ahi leh:

**6. i). Silsiemtha:** Tam Leitung beinua chiengin silzousie siemtha in aum diing ua, gingtute zong siemtha ahi diing uhi (Matt. 19: 28; Nasepte 3: 21; Heb. 12:27).

**6.ii). Vanggam a umna diing:** Vanggam ah umna diing mun tamtah aum hi (Johan. 14:2). Gingtute khu Vangam ah a um diing ua, Gingloute vang apulam ah aum diing uhi (Matt. 22:12-13; 25:10-12). Midihte in silsiemtha zousie aluo diing uhi (Matt. 5:5; Kih. 21:1-3).

### **6.iii). Gingtute nuomman:**

Mishite piengthate in kumtawn/tangtawn hinna atang diing uhi. Hinkhuo tawpthei nawnlou ahita diing hi (Matt. 25:46; Rom.2:7). Pasian toh kipawlna hinkhuo amang tading uhi (Kih. 21:3; Dan. 12:3; II Kor. 9:6). Tamte khu gingtute satan loupitah khu ahiding hi. Hundamna leh thawkiana khu akizui ding ua, akikhen theisih ding uhi.

### **7). Thukhum sin:**

Awle atung a, igensa bangun tamna thute khu hun hingtung nailoute ahiziehun, theichien leh gen chien hamsatah ahingei mai uhi. Ahin, i Bible uh hoitah a isim leh ahiding dan leh umding dan kichientah in ang hil hi. Tamna, igendante u'khu adihthei pen ding leh Bible toh kituoh pen ding a, isui uh ahi.

### **Dohnate:**

- 1). Thawkiana um ding dan tomkim in gen in?
- 2). Thu khenna um diing khu bang chi bang ahi diei le?
- 3). Kum sang vaihawmna toh kisai ngidan ngate gen in?
- 4). Gingtute um dingdan chithumte bangbangte e?

~~~~~

## Bung – 26

### BIBLE A GAM SAHANG NAMBAT 666 THU

#### ***Thuchin ding:***

*“Tanah pilna apoimaw dan alang hi. Koipou theisiemna neiten gamsa nambat tuot heh, aziehpén mihing nambat ahi, anambat pen zaguh sawmguh leh guh ahi” Kihilna 13:18).*

#### **1). Thupatna.**

Tami nambat 666-thu khu tulai mai hilouin, hattuum dinchil/kipatchil a patin, tuni dongin gingtute buoipi leh mi khenkhatte ngel in Bible sung a athupipen in zong angai va-ia uhi. Thamlouin, Pasion thu siemte leh pawl tuomtuomte’n zong ngaidan leh pomdan tuomtuom a nei uhi. Adiehin, gindan dihlou leh Pawl neu khenkhatten zong pawl dangte demna ding leh apawl ua mite a lahlut/na ding un zong van jah in azang leng uhi. Ahin, tami thu khu silhamsa tah ahiziehin tamna i gendingte uh khu adih pen leh buching thei pen ding a ingai uh ahi.

Tualeh, tami Gamsahang nambat khu Kihilnabu (Revelation) bung 13-leh 17-na, ten Nambat 666- agente u’toh amehmat uhi.

#### **2). Gamsahang Nambat 666 kisimdan suimasa va ui.**

I Bible kigiel hun laiin, laiteng Alphabets (A, AW, B, C)-te khu Nambat simna in amang uhi. Tuabang, nambatte a pat in mihing min amah thu umzie nei khenkhatte asuikhie uhi. Tuabang sutdan

khu Hebrai ham in ‘GIMTRIYA’ achi uhi. Tuami a kipat in English a ‘GEMATRIA’ chi ang pieng khie hi.

Tualeh, Gam Sahang nambat khu Greek leh Hebrai laimalte a pat a kisut ahi uhi. Greek alphabet khu 24 ahi. Hebru mabang in nambat 1-900 genna ding in ajang uhi. Tuaziehin, a alphabette un adailou zieh in alphabet ban ah alah/zetel anei leng uhi. Tuate khu Stigma=6; Koppa=90; Sampsi=900-te ahi uhi.

Tualeh, i Bible gam uah nambat ahitah a jah ahilai in, akhenchieng in jong akim sipsip a ajahtheilouna uh jong aumna lai hi. Etsahna ding in, mun khen khat ah ni 40- khu ni 40 chiet genna a ajah lai un, akhen chiengin hunsawttah genna in ajang kia zel uhi. Tuaziehin, tambang nambat hilchetna bawlina tungtang ah pilvan angai mama ban ah ajah dan uh theichien jong angai mama hi.

Thamlouin, Bible thutah hilchien ding in ahunlai a mite silngaituo dan leh lungsim puohdan, atenna leitung a siltungte tanpha thei a sut angai hi. Tamte theichienlouin, Bible thu in atup leh ngimlou lam a hilchien khelthei jong ahi. Tualeh, Bible gam mite in a alphabette un nambat khuotna/sutna in jong ajang zelzel uh chi jong igente uh thei kawmin ajahdan uh isui ding uhi.

Tuleh, Kihilna laibu gel hun lain Roman Nambat khu akijangpen khat jong ahi. Tunitan in zong tambang in izang ua- I, II, III, IV chiin igel uhi. Tuachin LV-50, C-100 chite in agel uhi. Tuaban ah, nambat khenkhatte in hina neisah uhi. Etsahna dingin nambat 7- khu nambat bukim leh Pasian nambat ahisah uhi. Nambat 3- khu van lam nambat in angai ua, thamlouin nambat 4-pen ahileh, khovel lam nambat in angai uhi. Tualeh, nambat 6-khu mihing nambat ahiban ah, adiehin tahsalam silbawlthei mihingte nambat genna in ajang uhi. Tuachiin, nambat 666-ngelpen ahilehvang mihing tahsalam, Pasian dou zieh a Pasian

a kibawl hielte genna in ajang uhi. Tualeh, Gamsahang pen amin uapat gamsahang hilou in atanchin uh leh annasep ua pat ahijaw ding uhi.

### **3). Tuin Nambat 666 suohtheina ding ageldan uh leh aminte isui ding uhi.**

Tualeh, Nero khu leng gilou mama ahi a, thamlouin, Khristiante asugenthei mama hi. Ashinua ajong hingthoukia phiel ding in agingta va-ia uhi. Amin, NERON ahi a, Greek laiteng a koi ahichieng in N=50; E=6; R=500; O=60; N=50; = 666 asuahthei veve hi. Tuabanah, Rom Lengte khu NERO a patin Pasian in akigen uhi. Pasian Kaisar achi uh khu jong Greek ham in ‘KAISAR THEOS’ ahi. Tamkhu jong nambat 666 asuohthei uhi.

Thamlouin, Pawl khenkahtten ‘POPE’ Lallukhu tung a Latin ham a laiteng kigel ‘VICARIUS FILI DEI’, aumzie khu “Khrist sihlehtang/palai/ai-awh’ china ahi. Tamjong, asuichieng un ‘U’ khu ‘V’ in aheh ban uah akikimpi umloute blank akoi chiengun nambat 666 ahisah sawm teitei uhi.

Tuaban ah, mindang khenkhatte jong i enkia ding uhi.

#### **ARNOUME**

A=1

R=100

N=50

O=70

U=400

M=40

E=5

#### **HITLER**

H=107

I=108

T=119

L=111

E=104

R=117

Atung a teng i gawm leh nambat 666-a potheichiet moh uhi. Ahin, a tung a Gamahang nambat pawding a, angawte uh dih hileh tuinin isutsut angainawn sih ding hi.

#### 4). Ahitahleh Kihilna laibu a Gamsahang nambat 666 koi ata dieile?

Atung a igenbang un, Gamsahang nambat 666- khu Kihilna bung 13 leh 17-te a kipat a hi uhi. Tualeh, Kihilna bu in a It Johan in amangmuna/kihilna amute khu atangpiin atungsa pawl, atung lel pawl leh hing tung nalai ding pawl aum nalai uhi chi khu ipomdan uh ahi. Tuaziehin, tami gamsahang tungtang thu zong masang lain, ana tungsa bang a genna zong aum a, ahin hingtung nailou ahi chi zong ipomdan uh ahi. Ahin, Kihilna bu a Gamsahang achi khu atangpi in Rom Lengte (Roman Emperors)-te agenna uh ahideupen uhi. Tualeh, Kihilna bu a kisawm achite khu Kaisar biehnna kipat hun a pat a Leng, Kaisar Augustas (Octavianus)- a pat kipan in, Titus tan ahithei ding un ana sut uhi.

Tuaban ah, Rom Leng (Roman Emperors)-te zousie khu Gamsahang bangin agenchieth ua, ahin Nero a pat Domitian tan khu Kihilna geltu in angai diehte ahi uhi. Tuaban ah kisawm leh lu sagite khu tamte ahithei ding uoile?.

| LUSAGI NEI           | KISAWM NEI         | ALAL KUM UH |
|----------------------|--------------------|-------------|
| 1). Kaisar Augusta   | (Octavianus)       |             |
| 1). Kasar Augustas   | B.C 27-14 A.D      |             |
| 2). Tiberia Kaisar   | 2). Tiberea Kaisar | A.D 14-37   |
| 3). Galegula (Gaius) | 3). Galigula       | A.D 37-41   |
| 4). Klaudia          | 4). Klaudia        | A.D 41-54   |
| 5). Nero Kaisar      | 5). Nero Kaisar    | A.D 54-68   |
|                      | 6). Galba          | A.D 68-69   |
|                      | 7). Occho          | A.D -69     |
|                      | 8). Vetelies       | A.D -69     |
| 6). Vespasian        | 9). Vespasian      | A.D 69-79   |
| 7). Titus            | 10). Titus         | A.D 79-81   |

Tualeh, lu-sagi lah a lienpen khu 5-na Nero khu ahiding chin a gingta uhi. Agietna Lengpa/Gam sahang khu Domnitian jong ahithei hi achi uhi.

**5). Tulai misiem khen khatten gamsahang leh chiemtena pedingpa khu mimal hilouin ‘European Union’ hiding in agingta uhi?**

Tamna gamsahang khu sildang hilouin khawvel khantouna in a kentel computer leh technology-te hidingin agingta uhi. Tueleh, ‘European Union’ (EU)-te khu Europe gam a solkal leh leng hattah sawm (10)- kipawl khawmte ahiding uh achi uhi. Amauh, akipawl khawmna uh tami computer tungtawn in angbawl ding uhi achi uhi. Computer nnaseptheina tungtawnin EU-te in mijousie khu chiemtena akhut tahlam e ahisih leh atalpang uah akitah ding uhi. Tami chiemtena gamsahang chiemtena ahiding hi.

Tualeh, tami cheimtena ah khu mimal chiemtena siljousie koi ahiding a, tuachin, tami chiemtena khu amanu/pa atahsa sung ah guonlut ahiding hi. Tami chiemtena atahsa sung ua kikoilut tungtawn in EU-in, computer silbawltheina tungtawn in ahong thei ding ua, jong a en un avel thei ding ua, athunun ding ua mijousie kichientahin umna leh annasep jouise athunun ding uh achi uhi. Tami, gamsahang chiemtena “666” khu huntom nou sung in khawvel pumpi ah akithejah ding a, tami chiemtena panglouin, mi koiman alei in azuathei sih ding uhi a chi uhi.

**6). Thukhumsin:**

Igensabang un, tam Kihilnabu gel lai in Greek leh Hebru nambat sutna ding in azang uhi. Tueleh, Kihilna bu-a Gamsahang achi u’khu atangpi in Rom Lengte (Roman Emperors)-te agenna uh ahideupen uh chi in Bible suitu khenkhatten agen uhi. Azieh ahileh annasepdan uh leh gamtat dante ban uah, amin uh kisuina a pat un 666 asuohthei uhi. Ahin, eite gindan in Gamsahang nambat pen, tunua/dachieng in zong atahtah in ang kihawm ding

chi zong igintat dan uh leh pomdan uh ahi. Akihawm hunding ahileh rapture (Misiengthou)-te lahtou zou chiengin ahiding chi khu ipawmdan uh leh gindan uh ahi.

**Dohnate:**

- 1). Gamsahang nambat khu heisung Bible bungte toh kimehmat ahi uoi?
- 2). Gam Sahang nambatte khu koite laimalte a pat a kisut ahi uoi le?
- 3). Kihilna laibu a Gamsahng nambat 666- koite ahita diei le?
- 4). Tulai misiem khen khatten Gamsahang leh chiemtena peding khu ‘European Union’ hiding in aging tat dan uh gen in?
- 5). Gamsahang nambat khu akihawmzou e ahisih leh kihawm nailou na ngaidan gen in?

~~~~~

## Bung-27

# NIDANG LAI A KIPAT GAMSAHANG NAMBAT HIDING A KIGENTE LEH UNIQUE IDENTIFICATION NUMBER OR AADHAARD CARD THU

### *Thuchin ding:*

*“Tua chiemtena ahiei, gamsa min ahiei, ahisihleh amin nambat ahiei, neiloute poumain aleithei sih ding ua, azua thei sih ding uhi.” (Kihilna 13:17).*

### 1). Thumapui:

I gensa mabang un masang a pat in Khristiante lah ah gamsahang nambat 666-hiding a kingawna leh kidemtuana aum jing hi. Nidanglai a pat a Gamsahang nambat suitu tamtah in Gamsahang ding a angawte uh, Pope, Martin Luther, Calvin, John Knox, John Husst, Hitler, Mussoline, Nepolean, World Council of Churches (WCC), United Natioon Organization (UNO)-te leh tulaitah ‘Unique Identification Nambat’ or Aadhaard Card, tanpha hiding in ana ngaw uhi. Ahin tamte khu akingaw khiel chi lei ichi khiel sih ding uhi.

Ahileh, koi amaw/khielta diei le? Angawtute ngaidan dihloou zieh ahi uh chi i muthei uhi. Tualeh, Unique Identification Nambat’ or ‘Aadhaard Card” tungtang ah ngaidan leh pomdan akibahtah lou ziehin, buoitheina ahiziehin genlou kiphawmaw asuohta hi.

## **2). Gamsahang nambat 666 leh Unique Identification Number' or Aadhaar Card thu:**

Awleh, phuolpi solkal in India khuo-le-tui simna kumsawm dan in anei leng uh toh kituoh in 2009-a pat in nidang bangloun deu in, khangtoun zaw leh chieng zaw sem ding lunggelna in Biometrics tungtawnin kisimna limlah ang pan uhi. Tami khu 'Unique Identification Number' or 'Aadhaar Card' in ang siemta uhi. Tuami khu Unau Myanmartan 'Matpong' ananei dan uh toh kibang lel ding in agintat huai hi. Tambang a pan ang lah zinglaiun, mi khen khatten, tuni dawngin, i Bible ua nambat 666-kihawmpatna ding hita chi in limna la ngamloun in ka lah sang in shipi maizaw vang chikhop a napang pawl bang aumta uhi. Akhente in ahileh, ata/anaute nangawn uh sekulte kaisahloun leh sepna zong tami Aadhaar Card lahngai a Government nna sepna (Job)-ka neisingin, Private a sepna sui in nei zaw vang chi zong atamta uhi. Tualeh, a lanuom lou ten, Kihilnabu (Revelation) bung 13-leh bung 17-na Number 666-toh amehmat uhi.

## **3). Aahaard Card Nambat in atup leh apoimawnate:**

India khuo-le-tui midihthah kitheina ding leh hina dingin ahideu pen hi. Tuachin, mikhat in ID card khat leh number khat bou nei dinga tam ineipen khu dam sung dai ding a bawl ahi. Ei India gampen democracy ihidung jui un, gam zalen ihi ua, India population jong tuban tomnou kalsung a China sang a hingtam jaw mai ding in akilangta hi. Tampen, phalna neilou a igam ua hing lut gamdang mite zieh ahi uhi. India gam a kipat mi hoi leh hoiloun aguh agal a hinglutte dalna leh kivenna ding ahi deu pen mai hi.

Tualeh, identicard dangte khu ahun nei a renew ngaizing ahi uhi. Ahin, tami Aadhaar Card pen dam sung dai ding ahi a, mi khat ni leh thum zong kilatheilou hi.

## **4). Gamsahang nambat 666 leh Unique Identification Number' or 'Aadhaar Card'-te kibahloun dan:**

4.1). Tualeh, Unique Identification Nambat khu number 12-(digits)-nei a bawl ahi. Ahin, Nambat 666-in nambat thum mai

anei giap hi. Tuabanah, nambat 666- pen number kibang ngen tang ahi uhi. Ahin, Aadhaard Card pen, nambat kibanglou ngen tang digit 12- ahizieh un nambat 666-toh akibang sih uhi.

4.2). Nambat 666-khu gingtute lahtounua (rapture)- zou chieng a, hawmding ahi a, Aadhaard Card pen sawtpi a patin kilain kihawmta a, amangsahten zong nua lah kia uhi. Tuaban ah, nambat 666- pen akihawm chiengin, atalpang uh leh akhutte uah kaplut ahiding a, Aadhaard pen Identocard ahiziehin isumbawmte uh amaw akhenten singkuong sung ah ikoi uhi.

4.3). Tualeh, nambat 666-kihawm ding hita leh Setan in zong ei India gam khelkhel za lah a, Khristan percent (10%)- zong chinlouna gam ang zang kholsih ding hi.

4.4). Thamlouin, tami Aadhaarda Card in India solkal in gamdang toh kisaina leh kijopna aneikha sih a, thamlouin unau gamdang i kinaipi mama uh Myanmar, Pakistan, Bangladesh chiten zong anei phasih ua, zong anei kha sih uhi. I gensa bangun, ei India khuo-le-tuite ding liulieu ahizieh in, tam pen nambat 666-toh kisaikhalou hi. Tualeh, number 666-pen ang kihom tahtah chieng in gamchin namchin a miten atang ding hi.

4.5) Thamlouin, ei Khristiante ngaidan leh pomdan in tuhun pen Hattuumte tungtawn a Hagau Siengthou nnasep hun ahilai zieh in misiengthoute lahna (rapture)-ang tunjaw chieng a hun hamsa leh bawlsietna umpan ding ahi. Tuahun chieng in, Danbotse pa ang kilang pan ding hi. Tuahun chieng in, nambat 666-ang kihawm leh zong rapture nua a, piengtha louten atang ding ua, thamlouin a number 666-pen akihawm chieng in mizousie adiehin piengthalou leh rapture a lah a umlouten atangteitei ding ua, tua UID-pen aut loute ki-force thei lou hi. Tualeh, ei apiengtha tahtah a langamlouten nambat 666-dei lei jong kitang khalou ding hi, aziehpeng vangam a gingtute aumnua chieng ua kihawm pan ding ahiziehin.

Tualeh, gingu leh piengtha kichi ngal a Gamsahang nambat iginthei na lai leh aginna uh chienglou china ahi ding ziehun hagau lam a kivel chieng ding in adeisah huoi zaw uhi.

### 5). Thukhumsin:

Tualeh, UID-toh kituohtheilou ahidan zong imuthei uhi. Ahin tami, nambat 666-pen, ei hun nukhiaa um gingtute ihizieh un bangpen, koipen ahidiei chi itheisih na ua, ahin a process vang akipan toutouta ding in aging tat huoi hi. Tualeh, tuhun leh da chieng in jong aumthei jing ahi chipen imanghillou ding uh ahi. Azieh ahileh, Khrist doudaltu, Khrist sang a thupi jaw leh silbawlthei jaw a kingaite khu Gamsahang din mun a dingte ahitheih uh chi ei ama-le-eima zong i kivel ding uhi.

Tualeh, tulaitahin, Aadhaar Card zong pomtah tahtah lou a bahtahziehin, phuolpi solkalin, voter card hoitahin ahing bawltha (verify)-ua, i zaupen uh Aadhaar Card sangin i voter card uh khu hing poimaw zaw ding in aumta hi. Ahin, Aadhaar Card pen thusimlou uh china vang ahisih uhi.

### Dohnate:

- 1). Nidanglai a kipat tuni dawnga Nambat 666-hiding a angawte uh leh gintatte uh koite e?
- 2). ‘Unique Identification Number’ or ‘Aadhaar Card’ bang tupna a phuolpi solkalin ang bawlkhieuh uh e?
- 3). Tami Unique Identification Number’ or Aadhaar Card in Nambat 666 toh kichimatna aneitheih ding uoi le?
- 4). Ei gingtute a ding in Aadhaar Card nei azauhuoi diei?
- 5). Gamsahang nambat 666-khu bang hun chieng a kihawm ding e?

~~~~~

## Bung-28

# GAWTMUN MEIDIL THU

### ***Thuchin ding:***

*“Hun kipah um ah ka hing na ngaikhie a, Hundamna ni ah ka hing na panpi hi. Ngai un, tukhu hun kipah um ahi a, ngai in tukhu hundamna ni ahi” achi hi (II Kor. 6:2).*

### **1). Thumapui.**

Awle, Gawtmun thu khu i Laisiengthou in aha gen mama a, tuleh Pasian thu i awi (Kristian)-ihina zieh uh zong khu shi zou chieng a Gawtmun meidil a i lutlouna ding uh chilei i chi khielsih ding uhi. I Laisiengthou in gawtmun um tahtah dan agen a, adieh in Thuhun Tha ah 162- vei atuong a, tamte lah ah 70- sang a tamzawte khu Khantanhoite (Gospel)- sung ah a tuong a, atamzaw khu i Mangpa Jesu gen ahi tangpi hi.

### **2). Gawtmun kigena ham-kamte isui masa diing uhi:**

**2.i). SHEOL:** Sheol chi khu Hebrai ham a pat a lekhieh ahi a, aumzie khu ‘Mun Miel’ amaw, ‘Mun guoh’ chinate ahi. Tamkhu Sapham in ‘Hell’ akichi hi. Tamkhu Thuhun Lui ah sawmthum-le-khat (31)- vei atuong hi.

**2.ii). HADES:** Tam zong atung a toh kibang sim ahi a, a Greek ham in, ‘Mishi khuo’ china ahi.

**2.iii). TARTOROS:** Tam khu Angel gilou leh helte vaihawmna ngah a tou/umna mun ahi (II Peter 2:4).

**2.iv). GEHENNA:** Khopi sung nin paina mun, mitlou a kuong zing, migiloute tan ding mei mit ngailou mun china ahi (II Khang. 33:6; Matt. 10:28).

**3). Tam mun (Gawt mun)- khu Jesu'n tam bang in agen hi.**

i). Migiloute hagau leh tahsa kigawm a pailutna mun ding ahi (Matt. 10:28; Luk. 12:5) a chi hi. ii). Vaihawmna leh siemlou tanna mun ahi (Matt. 23:33). iii). Mei zong ami-ngailouna mun ahi (Mak. 9:44; Kihilna. 19:20; 20:14-15).

**2). Gawtmun hei a um ding adiei?**

Laisiengthou in gawtmun hina agente igen zouta uhi. Ahileh gawtmun hei a um adiei? chi khu mite thei ut mama khat ahi. Rozer Scarle, University of Durham a Professor in agen dan in, Ama uh pawl in gawtmun meidil aum theina ding mun amukhieh dan uh tam bang in agen hi. “Leitung (Earth) lailung (core)- khu asatna 6000 Circus vel a sa ahizieh in, nidang a ka gintat meidil umna pen khu leitung lailung ahiding chi khu adih theisih ding achi hi. Leitung a, aum theina ding mun umsun khu, tuisuogiet tawdop a tuisa pawtna khu, satna 450oC a, asatna mun ahi ding” achi hi. Tualeh, Van gam (Heaven)-umna ding mun, agendan in, “Huihkhua (atmosphere)- a, Thermosphere kichina mun khat aum a, tuamun hidiing in agingta” uhi. Tamte khu adih tahtah hi ichi theisih ua, ahin ginglounge'n zong Van gam leh Gawtmun tungtang a na buoipi uh zong alungdamhuoi veve hi.

Tualeh, Russia Scientistte'n Siberia gam a, anasepna uh mun khat mel kuo (9)- a thuh in a lai/tawna uah Isai 5:5 a kigen Meilipi (Hell)- amukhieh thu uh agen uhi. Asatdan 2000oF (Degree Fahrenheit) ahi achi uhi. Tamna a Doctor pa uh Dr. Victor Azza in agenna ah, “Tam mun ataw khah uh ahuoise/gimnei mama a, a awzah uh khu ana e! ana e! chia ka-le-mau thawm kikou zengzung husa ka za uh” achi hi. Tamna asil mukhieh lamdangtah ajah uh a gingta ua, Scientists tam tah in annasepte uh tawpsan in

apien tha law ua, Pasion nna aseplaw uh akichi hi. Tamna ka-le-mau thawm huoisetah azah u'khu Lai siengthou a kigen gawtmun (Hell) hi diing in agingta uhi.

Thuhun Lui leh Thuhun Tha gendante toh i ettuoh leh zong akibang hi chiin Lai siengthou siemte'n zong apompi uhi. Aziehpén, gawtmun khu leinuoi a um ahi a, Van gam pen tunglam a um ahiziehin chi'n zong agen uhi. Tualeh, Russiate khu, Pasion aumsih, gawtmun zong aumsih chia doudal gam ahizieh un, tambang a ang mu uh khu Pasion aum tahtah na chi a suhlat utna zieh zong ahi ding hi. (The Glorious Hope'-April 1994).

Abangteng hizongleh, Gawtmun umna mun dihtah theisih nanlei zong Lai siengthou leh misiemte (Scientistte)- a pat in aum ngei hi chih khu niel guol ahisih hi.

### **3). Gawtmun sat dingdan:**

Ahileh Gawtmun bangchi bang a sa ding adiei? chi zong mi zousie thei ut mama khat ahi. Tualeh, satna degree 100oC vel ah khun tui asousah vungvung thei hi. I tung ua nisa (sun) satdan khu degree 6,000oC vel hi ding a gintat ahi. Tambang a sa ahi ziehin nisa kim a um zousie atui mang zelzel uhi.

Gawtmun khu satna temperature 445oC a sa ahi ding chi in Mark Austin in Newspaper khat ah agiel hi. Tam sat ding dan khu tui kisuongsou (tuisa tawp)-te lethum leh akim vela sa ahi ding hi. Tualeh, Lai siengthou in gawtmun sat dingdan agen khu Kihilna 21:8 ah "...Meidawite leh gingta loute... jousie tan ding kaat (brimstone)- leh; sulphur huon sou, sat bang a sa ding ahi".

### **4). Gawtmun bangchi bang mun ahi diei?**

Gawtmun khu kihuotna mun ahi ding hi. Zudawn leh thanguhoi tampite khu gawtmun zauhuoi dan igenpi chieng un, gawtmun khu anuom ding hi, azieh ahilehpén i it-le-ngai teng kimna ding

mun ahiziehin achi uhi. Jail (thongsung) bang diing a nuomlou e? ichi leh migilou chinteng umkhawmna mun ahizieh in ahi. Tuabangma in, gawtmun pen gitlouna leh khelna pumdim ding ahizieh leh lungsietna mawngmawng umlou a gawtna mun ding ahiziehin mun nuomlou topkhawh ahiding hi. Tualeh, gawtmun khu awsia chinteng kilaw khumna mun leh tanchinpha agen ding uh zong khu shina tanchinpha ahiding zieh in mun nuomlou tawpkhawh ahi diing hi. Meilipi sungkhat or tui kisuongsou sungkhat ah leitung a na itpen toh umkhawm lechin anuom diei? Tamkhu, Gawtmun noplou ding dan genna hoihtah khat ahi.

Tualeh, Gawtmun khu shina nasan zong mu zou nawnlouna ding mun ahi. Tam leitung a, i zau pen uh khu shina leh natna ahi. Ahin, gawtmun ah pen shina nangawn akimuzou sih ding hi. Tam thu khu Sadhu Sundar Singh laibu gel “Hagau Leitung” (Spiritual World)-ah chiengtahin i mu uhi. “Angkawm lai khat hagau khu hagau gam atun masang in, adangtah mama a, alei a ha zatzat a, anah gin thawm khu angai mama a, mei satah in akah bang mai in abante khu meikuong in akang vom vetvut hi. Amapa khu lungkhamtah leh mangbangtah in akipei akipei a, ama-le-ama na ngawn akikidah a enzong aki-engam va-ia sih hi. Ka hagau khu hamsie dong in umta hen, tamna suhdamna dingin shina aumthei nawn sih a, ka hagau lah ashi thei sih a, shi thei hileh leitung a ka shi bang in ka Pistol in ka kikaplum kia ding” achi hi. Gawtmun natna khu leitung a natna aleza tamtah in ana ding hi. Tuazieh in, tam mun khu tangtawn a shithei nonlouna mun ahi hi.

### **5). Gawtmun khu theigigena mun leh kisiana mun ahi ding hi.**

Jesu’n, Luke 16:19-31-ah, Mihausapa leh Lazar tangthu a genna pat in imuthei hi. Mihausapa khu gawtmun ah alut a, gawtmun ah ahausatnate khat zong apawlut theisih hi. Ahin, sil ni akenglut/pawlut a, tuate khu angaituona (memory)-leh abawlkhielte kisiana lungtang ahi. Amapa khu kisia in gawtmun ah Missionary

nna aseph sawm a, ahin, ama ding in a kikhelta hi. Tuanah sang in tui tah khat na ngawn zong amuzou nawn sih hi.

Tualeh, anet pha ding uh zong khu zang-eh (than) –ahi a, apuonsil ding uh zong khu than ahiding uhi (Isai 14:11). Tueleh, mi tamtah umkhawm ding hinanlezong, thawmhauna leh zauthawng in apum dim ding ua, khat-le khatte kimuda leh kihuotna ngen in zong adim ding uhi.

Tualeh, gawtmun meidil in a tahsa zousie uh akat sieng sah ding a, ahin, alei (tongue) uh leh alungtang (heart)-uh ahileh leitung adamsung ua Pasion thu azuilounate u'leh a bawlkhielte uh a kisiana ding un a kangsih diing a, ka-le-hagawi in kikou ding uhi.

#### **6). Gawtmun khu abeithei ngailou mun ahi.**

Gawtmun beitheilou ding thu khu Kihilna Bu ah sawm-le-thum (13)-vei atuong hi. Gawtmun beithe ngailou ding thu tam bang in gentena in akigen hi. Suong lientah khat kum za dan in leitung a vasa neupen khat in a nephu in vatat henlen, a hun sau sengseng in suongpi khu a tat bei cheing in zong gawtmun khu akipan pan ahiding a kichi hi. Tuabang deu in, Tuisuogiet khu kum 1000-dan in, nou/hai neukhat in khatvei kithal leh a kumsawt seng in a tuiteng a kan kilkel nua in zong Gawtmun pen a kipan pan ding ahi kichi hi. Tamte khu sil hi thei ahi sih ua, tuabang in Gawtmun zong khu a Beitheilou ding chi etsahna ahi.

Tualeh, Gawtmun a meikuong khu Pasion lungthahna ahiding hi. Deut. 32:22 ah– “Ka lungthahna meikuong hing bang van in, Vannuoi a sil um zousie khu kangtum siengta va. Khum in mishikhuo haltum peh van, muol-le-tang bulte zong ka tumta va. Sodom leh Gommora-te tung a Pasion thangpaina bangin aum ding hi” chi thu imu uhi.

## 7). Ahileh gawtmun koite umna ding?

Awle, gawtmun huoisiet dante igen zouta ua, tu'n koite umna ding e? chi khu ingaituo ding uhi. Atomkim in, genlei – Dawimangpa leh akaizatamte banah, mi piengthaloute umna ding mun ahi. Jesu'n mi koizong tui leh Hagau a apienthah sih leh tam mun khu atang ding uh ahi achi hi. Nang-le-nang kigintat zieh leh hoi kisah zieh a, tammun pumpel mawh thei na hisih hi. Alampi umsun khu Jesu'n "Kei lampi leh thutah leh hinna ka hi" achi bang in Jesu bou ahi tami ipumpeltheina ding lampi umsun khu hi.

Tualeh, tuni-a Gawtmun a um tamtahte zong tam leitung adamlai ua nang bang a ngaidan mothuai pipi neite ahi ngei ding uhi. Ahilouleh, nang sang a gilou zaw zong ahi tuomsih ding uhi. Eite zong kingaituo vai! Na pientha sih leh tam mun nang tan ding ahi.

Tuaziehin, nang-le-kei a ding in ihun neisun ahimaithei hi. Pasion thugen ngai in "Hun kipah um ah ka hing na ngaikhie a, Hundamna ni ah ka hing na panpi hi. Ngai un, tukhu hun kipah um ahi a, ngai in tukhu hundamna ni ahi" achi hi (II Kor. 6:2).

### Dohnate:

- 1). Thuhun Tha a gawtmun thu banzat vei a kigiel ei?
- 2). Gawtmun kigena ham-kamte bangbangte e?
- 3). Tam mun (Gawt mun)- khu Jesu'n bang chi bangin agen ei?
- 4). Lai siengthou in gawtmun sat dingdan bang chi in agen ei?
- 5). Gawtmun bangchi bang mun ahi diei le?
- 6). Gawt mun a katumlou dingte bangte e?
- 7). Gawtmun a meikuong ding khu bang ahi diei?
- 8). Gawtmun koite umna ding a kibawl e?



## **Bibliography (laibu ette):**

- 1). Aizawl Theological College. *Thuthlung Hlui bu zilna, Aizawl*. (Aizawl Theological College), 1985.
- 2). Berkhof Lovis, *Khristian Thurin tlangpui*, Aizawl, (Aizawl Theological College), 1985
- 3). Challianngura, Rev. Kohhran Chawmna, Aizawl, (Synod Literature & Publication Board), 2002
- 4). Ginzalian T. Upa & Thangpu H. Pastor, *Church of Jesus Christ Doctrine Bu*, (Imphal: Church of Jesu Christ), 1998
- 5). Guite Paukhanmang, Rev. *Saptuam Pawltuamtuanme Thu-sinsak Tomlak*, (Churachandpur : Grace Bible College), 1994
- 6). Khristian Thalai Pawl. *Leadership Training Hand Book*, (Aizawl: Khristian Thalai Pawl Central Committee), 1989
- 7). Killuaia H, Rev. *Kohhran Chawmna*, (Lunglei: Literature Committee Baptist Church of Mizoram), 1991
- 8). Khupkhawthang, Rev. *Lampi- Thutah-Hinna, Doctrine Bu*, (Churachandpur: Young Christian Organisation), 1972
- 9). Lalchuanliana, Rev. *Sacrament Zilna Bu*, (Aizawl: Synod Literature & Publication Board), 2002
- 10). Lalchungnunga, H. Rev. *Isua Krista Hnathawh leh Zirtirna*, (Aizawl: Synod Publication Board), 1990
- 11). Lallchungnunga, Evan. *Nunkawng Hruaitu Part I*, (Aizawl: Agape Gospel), 1990

- 12). Lalsawma Rev. *Khristian Thurin Zirna*, (Aizawl: Synod Literature and Publication Board), 1999
- 13). Lalzawnga, V. Rev. *Zirtirna Him Tawkhlothe*, (Lunglei: Literature Committee Zoram Baptist), 1989
- 14). Taithul, Lianchinkhup Rev. *India Malsuolam Presbyterian Hattuom Danbu*, (Churachandpur: Manipur Gam Presbytery), 1984
- 15). Mizoram Presbyterian Kohhran, *Presbyterian Hand Book*, (Aizawl :Synod Literature & Publication Board), 1995
- 16). Pazawna, et. al. *Hruaina Eng VIII*, (Aizawl: Synod Publication Board), 1986
- 17). Pazawna C. & Lalchuanliana, Rev. *Khristian Thurin*, (Aizawl: Aizawl Theological College, 1986
- 18). Raltawnga, Rev. *Bible Chanchin*, (Lunglei: Baptist Literature Committee), 1990
- 19). Raltawnga, Rev. *Kristian Thugin Tlangpuite*, (Lunglei: Literature Committee Zoram Baptist), 1989
- 20). Ralte Lalngurawma, Rev. *Nazareth Isua*, (Aizawl: Synod Publication Board), 1992
- 21). Ramthanga, H. Rev. *Rawngbawltute Thian*, (Aizawl: Mizo Theological Literature), 1989
- 22). Saaithanga, Rev. *Thurin Zirna*, (Aizawl: Synod Publication Board), 1998
- 23). -----, *Kohhran Enkawlna*, (Aizawl: The Mizo Theological Literature Committee), 1998.

- 24). Sangzuala C. *Kan Kohhran hi*, (Aizawl: Synod Publication Board), 1992
- 25). Siamhnuna, Rev. *Khristian Sakhua Lungphum*, (Aizawl: Synod Publication Board), 1982
- 26). Pasian Laisiengthou (Holy Bible in Zomi) Bible Society of India, 1991-1992

**Periodicals:**

- 1). Vanlalauva, H. “Presbyterian Thurin” *Dedakhe* Vol. XXVII No.2 (March-April, 1998) 21-22
- 2). Neihsial Tualchin, “Aprocrypha Laibute” *Krist Pallai* Vol.10 (May - 1998 No.5) 18-19

**KHRISTIAN THUGIN ZILNA**